

ПЕТӖ 1926 ВОСЯНЬ

ЛЭДЗӖНЫ: КОМИ ГИЖЫСЬ КОТЫР, ПЕЧАТЬ ДА ЮӖР СЕТАН КОМИ  
РЕСПУБЛИКАСА АГЕНТСТВО

# ВОЙВЫВ КОДЗУВ



ISSN 0134-4323

БЫД ТӖЛЫССЯ ЛИТЕРАТУРНО-ХУДОЖЕСТВЕННОЙ ЖУРНАЛ

10  
ЙИРЫМ (ОКТЯБРЬ)  
2008



## ТАЙӖ НОМЕРЫН:

|                                                 |    |
|-------------------------------------------------|----|
| Алёна ЕЛЬЦОВА. ПомтӖм менам муслунӖй...         |    |
| Кывбурьяс .....                                 | 3  |
| Александр ШЕБЫРЕВ. Куим висът .....             | 7  |
| Любовь АНУФРИЕВА. Черань везьяс сотчисны...     |    |
| Кывбурьяс .....                                 | 29 |
| Андрей ВЛАСОВ. Кык рыт. Пьеса .....             | 31 |
| Александр ПИВКИН. Сыктывкар—Кудымкар—Перым.     |    |
| Очерк .....                                     | 45 |
| Нина ОБРЕЗКОВА. Эстонияса зарни ар. Очерк ..... | 57 |

## ЛИТЕРАТУРА ИСТОРИЯЫСЬ

|                                                 |    |
|-------------------------------------------------|----|
| Владимир ШИРЯЕВ. Он вун тэ, Озъю. Повесът ..... | 64 |
|-------------------------------------------------|----|

Обложка вылын снимокыс Фёдор МакаровлӖн.

© «Войвыв кодзув» («Северная звезда»), 2008 г.

**СЫКТЫВКАР**

# СЕВЕРНАЯ ЗВЕЗДА



***Ежемесячный  
литературно-художественный  
журнал***



**Учредители:**

**СОЮЗ ПИСАТЕЛЕЙ РЕСПУБЛИКИ КОМИ**

**АГЕНТСТВО РЕСПУБЛИКИ КОМИ ПО ПЕЧАТИ  
И МАССОВЫМ КОММУНИКАЦИЯМ**



## ***РЕДАКЦИОННАЯ КОЛЛЕГИЯ:***

Главный редактор

ЕЛЬКИН М.А.

Зам. гл. редактора

КОЗЛОВ Е.В.

Ответственный  
секретарь

ПОЛУТРУДОВ А.В.

ТИМИН В.В.

УЛЬЯНОВ А.В.



Алёна ЕЛЬЦОВА



## Помтõм менам муслунõй...

\* \* \*

Арыслысь синвасõ  
Надзõник чукõрта соддзõ —  
Войт бõрся войт.  
Õтнадõн тõдан тэ, мый лоõ олõмас водзõ,  
Пыдõстõм вой.

Арыслысь кывбурсõ  
Сьолõмõй паметяс видзас —  
Кыв бõрся кыв.  
Мыйкõ õд вõлi жõ шуда, и югыл, и мича,  
Кытчõдз эз быр.

Кытчõдз став зарниыс  
Муас эз гылав —  
Кор бõрся кор.  
Позьõ на бергõдны ставсõ, тэ кылан?  
Абу на сёр...

\* \* \*

Шоныл лун тõлыс  
Вильшасьõ менам занавесõн:  
То гартовтлас,  
То лэдзас бõр,  
То мый вынсьыс пõльтас  
Еджыл парусõс моз.  
Бытьё корõ и корõ  
Сьолõмõс  
Кывтны саридз кодь  
Югылдõз сõстõм енэжтӣыс  
Ылõ-ылõ...

\* \* \*

Сё киа дой  
Косявлö менсьым сьöлöмöс  
Посни торпыригöдз.  
А тэ пукалан воча,  
Гусьöник ас кежсьыд нюмъялан  
Да видзöдан менам синмö.  
Мый тэ öнi сэтысь кöсьян аддзыны?

## Тулыс

Войяснас му вылö  
енэжлөн синваыс киссьö —  
Надзöник тулысыс ловзьöдö му шарсö бөр.  
Шудаа нюмъялиг,  
шоналöм зэр ванас мыссьö  
Муыс, и юыс, и вөр.

Еджыдик дзоридзөн  
гöрддзасьö енэжас Тöлысь.  
Тувсовъя луныслөн морöсас сьöлöмыс пым.

Öтнамөн шогся да гажтöмтча талун ме тэысь,  
Помасьöм тöлыслөн  
сьöлöмöс югзьöдысь лым...

\* \* \*

Вот аддзан —  
арыс ставсö тöдöма,  
И öнi нинöм нин он веж.  
Лöз лым нин öшинь сайын мöдöма  
Да тыртö мусö вежон чöж.

И колö кызкö водзö лолавны,  
И овны вой,  
и овны лун.  
Кöть ковтöм тэныд менам олöмöй,  
И тайö некызди оз вун.

Ме му шар дорöдыс дзик восьлала,  
И дорыс сылөн матын зэв.  
А менам кийн шуда кодзувъяс,  
Но вывтi чорыд лымъя зэр...

\* \* \*

Видзöд, видзöд кодзувсö —  
бытьö посни беринъяс  
Войся енэж чужöмас

койыштõма рыт.  
Тиралыштõ кодзулыс,  
пемыд ваыс вералõ.  
Усьõм лõняс кылõ мен  
тәнад сьõлõм шы.

\* \* \*

Жугыль, чõв олысь õткалун  
Видзõдõ ме вылõ нора.  
Õткалун, õткалун, вешты вай ме вылысь синтõ...

\* \* \*

Ме кыла чõв-лõнныслысь кок шысõ керка гõгõрысь. Ме кыла сылысь лов шысõ õдзõс сайысь. Весиг вашкõдчысь кыз пу кор чõв олõ вõсни ув вылас, быттõ водзвыв тõдõ му вылас арся усьõмсõ. И варов, сибыд сьõлõмõй талун олõ чõв — нинõм оз кõйы висътавны. Став кывсõ нин сылõн шуõма, став синвасõ бõрдõма. Морõсын турõбыс ланьтõмõн водõма — шы ни тõв.

Чолõм тәныд, еджыд помтõм чõвлун. Кутшõм ёна нин ме тәнõ виччыси.

## Менам шудõй

Менам шудõй, менам ярьюгыд, ылі да судзõдтõм кодзулõй. Õтнад тә менам. И некодлõн сәсся абу. Коркõ, важõнсьыс-важõн, аддзи ме тәнõ пемыд чужõма тõвся енәжсьыс — и тәнад куслытõм дзирдыд югзьõдїс менсьым сьõлõмõс ыпъялысь биõн.

Сәксянь тә мекõд, помтõм менам муслунõй. Кольõны лунъяс и вояс, кадыс визувтõ ваõн, но мый кõtь ог вõч ме — бõрда кõtь серала, вылысь и вылысь кõtь помтõм туйясõд пышъяла ачымысь, радейта кõtь енәжсьыс мукõд кодзувалысь мичсõ,— век ме кыла и аддза, кыз видзõдõны, тõдõны, сотõны менõ тәнад чõв олысь синъясыд.

\* \* \*

Пемыд рытыскõд ми медся матыс ёртъяс. Кор воывлõ рыт, ме кольча дзик õтнамõн, кусõда керкаысь став бисõ, пукся õшинь водзõ да видзõда сылõн пемыдлõз синмõ. А сәсся босьта киõ рытыслысь шоныд кисõ, и ми гõгõрвоам õта-мõд йывсьыным ставсõ.

Рытыслõн синмыс пыдõстõм — позьõ помтõг гумлавны содз тырнад сәтысь меддона кывъяссõ, кодõс луннас и шуныд он лысьт; позьõ гõгõрвоны медся гудыр вõттõ да збыльмытõм мõвптõ.

А ещõ рытыслõн пемыд синмыс позьõ аддзыны асьтõ да гусьõник ләдзы югъялысь синва войт. Рытыс оз дивит, сõмын õкталас чунь помнас чужõмтїгд тюрысь тусьяссõ да вõчас наысь аслыс му вылас медмича сикõtшсõ.

---

## Тэтөг

Водз асывсянныс нин талун сьолөмөй инас оз өшйи — пессьö, быттьö пу увъясö дзугсьом лэбач. И ставыс орлытөм кытшөн бергалö син водзті: сувтлытөг, дугдывтөг котөртö — өддзö и өддзö. Вояс и төлысьяс, лунъяс и здукъяс еджыд лым чиръя турөбөн локтöны кыськö и мунöны кытчöкö бөр. На бөрся тшөтш вөрзёны местасьяс да ме гөгөр гартчöны пызан и улös, өшинь и стен, книгаяс, гижтөм да гижалөм листъяс, тічкысь дзоляник часі. Юрöй бергөдчö, кольмö и кольмö. Ме нюжöда киös, көсьяс сувтöдны тайö турөба вабергачсö, но вына төвруыс кватитö менö да кыскыштö тшөтш аслас помасьлытөм бергалысь кытшö.

Но друг тайö сувтлытөм гудырас кылö мен тэнад гөлöсыд. Сійö сёрнитö мекöд, мыйкö меліа надзöник висьталö. И ставыс лөньö да воö ас местаас: пызан и улös, өшинь и стен, книгаяс, гижтөм да гижалөм листъяс, весиг тічкысь дзоляник часі. А сьолөмөй морöсын дугдö лёк ногөн нетшкысьны да пессьыны.

И талун асыв ме бара на гөгөрвоа: сöмын тэнад гөлöсыд вермас кутны менö тайö му вылас.

## Гожөм эштигөн

Кыдзкö төдлытөг, кывалытөг ни аддзывтөг, небыдик кока рыжöй кань моз пырöма да тапикасьö пуяс костöд ар. Гожөмöй, менам шуда гожөмöй, вот и колин тэ менö дзик өтнамös. И ог көсйи, да мөвпавсьö, быттьö мунö ме дорысь менам олöмын медбөръя гожөм.

Став шоныдсö, шаньсö, став мичсö да муслунсö видзлöмыд тэ менлы вылö: и шоңдіыслысь вижов-зарни югöрсö, и енэжыслысь лэбач тыра синсö, и весиг зэрыслысь ки пыдös вылын дзирдалан югыд войтсö.

Но лыа моз кадыс, и синва моз кадыс киссьö муас менам тіралысь чуньяс костöд. Сувтöдны сійös да кутны киын ме ог куж ни ог вермы. Прөстит менö таысь, гожөмöй. Прөстит, гожөмöй, да прөщайт...



Александр ШЕБЫРЕВ



## Куим висът

Фараон

(СИЗИМБЕРГӨДАНА ОЛӨМ)

*Рамсесгъяс, Тутанхамонгъяс...  
Ловгъя енгъяс. Фараонгъяс.  
Вөлі тiян кад!  
Жаль, мый воши лад.  
Ра-Амонаѳс он ылөд!  
Гөтрасинныд чойяс вылад!  
Рөдыд чини. Быри. Сылi.  
Абу енгъяс!  
Мортгъяс, кылө...*

Нелямын вит арөса... пөрнөй мужик... бөрдiс. Эз кыз синваөн, а лов пытшкөснас. Сiйө пукалiс пашкыр лагъя, неуна вежынт-чыштөм коз улын да веськодпырысь видзөдiс орччөн сулалысь кыз вылө. А сы вывсянь мортлы воча дзоргис перк. Неуна чуймөмөн, но — повтөг. Ичөтик вежөрнас «вөрсa катша» гөгөр-воис: морт сылы лөксө оз нин вөч. Да и некодлы да некор сэс-ся оз вөч. «Но мый, пикө воин?— юрнас катлөдлiгмоз быттö дэльөдчис перк.— А өд лун-мөд сайын на асьтө пармаса көзаян-нөн лыддин! Ачылд ыджыдыс-паськыдыс вөлин! Тадз тэныд и колө...»

Перктө кыйсысысъяс оз радейтны... Аддзас тэнө дай юр вылад на өшйөдчас. Помтөг мыйкө ас ногыс броткөдчө. Став вөрсө шызыөдлас. Висьталө вөрсa олысыяслы, буретш пö тэ татчө лок-төмыд... Вешйөй пö ылөджык да өдйөджык! И вешйөны өд. Чук-чисянь ошкөдз. Дявөл кодь перкыд, нөшта и уна ногөн на чук-сасьö! Вермас колипкай моз сывны, а вермас и рака моз кра-вөстны, кор скөрмас. Вөрсa катша, мый сэсся вөчан...

Вась Митрей Уляшов олөмбыднас гоз-мөдысь лыйлiс жö перк-тö. Да и лэчкас тайö лэбачыс унаысь на пысасьлiс. Мукөддыр-йиыс ловйөн на суас, да Митрей юрсө вөлі песовтас. Эз жалит. Кыдзи эз жалит и йөзсö. Сэтшөм сiйö мортыс. И öнi эськө ка-мөбтiс, пищальыс кө вөлі...

Но лэбач тōдіс, мый Митрей пищальтōм. И пыр на дэльōдчис. Сэссия кызкō зэв дурка карōзтіс: «Кара-орр! Ар-ра ор-р-р!»

Митрей пыр на руалōм синмōн моз видзōдіс перк вылō. Но вежōрас мыйкō пысасис... «Ара-ор... Пара-ор... Фара-ор... Фараон...» Тыпу, чōрт! Мый йылысь думайтсō? Кутшōм «фараон»? Кутшōм Тутанхамон? Ловйōн кольōм йылысь колō думайтны, а оз Египетъяс йылысь...

Визнитіс мōвп да другысōн швачкис юрас. Дум вылас Митрейлы уси колян वोся ōти лōмтор... Ыджыд лун дырйи Модест Вань, суседыс, нимтіс Митрейōс «фараонōн». Весиг тышкō волісны. Воськыда кō шуны, кулакнас суйсис Митрей, а Вань сōмын водзсасис. А мыйысь косясьныыс, вōлі... Митрей ōнōдз асьсō правōн лыддьō. Сылōн лэч туйсянь дас кык верст горув, вōр ю бокō, Модест Вань лэптōма выль керка. Юасьтōг-тōдтōг. Сэн кōзяинтōм нэмōвōйся вōр керка сулаліс, вит во сайын пракмунліс, и со сэтчō шашаритчōма Ваньыд. Удитōма тай! Кыдзи аддзис выль керкатō Митрей — синмыс чашкавліс. Со и зэвтіс Ыджыд лун дырйи Ваньтō... Аддза кō пō маті вōрысь — виа, тэ пō менō тōдан... А мōдыс эз жō ёна повзъы, асьсō на правōн лыддис. Митрей ōнōдз быттō кылō сылысь кывъяссō.

«Тэ коркō пōтлан он! — горзіс сэк Модест Вань. — Абаритін став вōрсō, и горшад оз тасасы! Мылвожсянь Эжва йылōдз медбур местаяссō квательалін, некытчō кокōн тальччыны! Став вōрса суседъясыдкōд воуйтан, мūdзōмаōсь нин тэысь! Медся ыджыд али мый? Али помещик? Ōні вōрыс ōтувъя! Тайō керкасō ме йōз ради вōчи, эг ас ради! Чери кыйыштны. А то волōны мужикъяс, и юр сюянін абу! Ачыд жō и пыран сэтчō, кор приспичитас! Ачыд сэн шōйтан, арся комсō кыян, кōть лэч туйыд бокын. А мен тэнад вōрса йōрыд оз ков! Лэчъяс ог лōсьōд, абу тэ кодъ! Фараон!»

Тайō кывъяс бōрас кык мужик вель ёна ōта-мōдсō дубитісны. Ōдва и торйōдісны найōс. Но Митрей скōрджык да жлечджык Ваньысь. Вель ыджыд «пōнар» син улас аслыс ōшйис, но Ваньлысь кык ордлы чегис. И вōр керкасō сотны грōзитчис. Видлы пō, — сōмын и шуис сэки Вань.

Эз сот керкатō Вась Митрей. Повзис жō. Тōдіс: таdzi вермасны и аскōдыс вōчны. Парма законыд стрōг. Кулакнад да пиньнад быдōнōс он повзъōд. Жлеч вылад кодкō и жлечджык сюрас...

А выль керка дорас Митрей гоз-мōдысь воліс жō. Мича керкаыс, нинōм и шуны! Ставыс дзим-дзурк. «Газон» машина кōлеса дискъясысь сваритōм кōрт пач пунктōмаōсь. Югыд ōшиня. Кык нар, шōрас пелькиник пызан. Сёръяс вылын эшкынъяс ōшалōны. Но тōдчис, мый тайō керкаас этшаōн пыралōны. Прамōй трōпа со абу. Ывлаас пызан ни лабич, весиг биपुर места эз тыдав. «Мōрччōмаōсь Модест Ваньлы менам кывъясōй... Полō волыны... И мукōдыс тшōтш полōны, — кутшōмкō нидзув кодъ радлун гильōдіс Митрейōс. — Мед сōмын волōны! Ставнысō иза...»

...Мыйла Ваньыс дум вылас уси? А-а-а... «Фараон» кыв вōснаыс. Аддзыліс кō ōні кодкō Митрейōс! Ротсōм паськōма, косясьсōм резина сапōгъяса, лы вемōдзыс изōймитōм морт... Тіралō... Боксянь кō видзōдлыны, абу нин и морт кодъ? Но коді ōні видзōдлас... Этія перкыс?

Унатор эськō сетіс Митрей, мед аддзысьны кодкōдкō. Буретш ōні. Кōть медся лēкыскōд. Кōть Модест Ванькōд!.. А водзті



Митрей бокөвөйтө эз радейтлы. Вöрас Митрейлы быдөн — бокөвөй. Друг көть брат, кыз шуласны. Паныдасьліс кө вöралыськөд, да ещö нопъякөд, морöспань улас быттö шылаөн чуткылісны. Пыр кажитчыліс Митрейлы, мый сылысь звер-пöткасö мырдöны. Кöзяин...

...Öнi ставыс вöлі веськодö. И помасьлытöм слöтыс, и этійö мустöм перкыс... Митрей тöдіс: регыд сійö кулас. Став ловгöныс сулалö талы паныд, но нинöм он вöч... Судьбатö он ылöд. И колö жö! Пöрнöй мужик, некыт оз вись, а сентябр помö пармаын кокъяс нюжöдны лоö! Вотöс эм, ва эм...

Митрей весиг ымöстіс... Забеднö. Перйис кушмöм лемень портсигарсö, азыма дукуштiс. А табак дукуы! Öти папирос кө öнi. Öтчыд көть кысмыштмөн! Да нöшта кө öти истöг тув!

Нинöм сылөн эз вöв. Öтитор кольö: гирстыны ёсь изторйөн нимсö да вичсö, и сатшкыны портсигарсö ув йылö. Лысьöмсö зверьяс көть и разöдасны-чашъясны, но лемень портсигарыд коляс. Майбыр, оз сім. Позяс надейтчыны, мый кутшöмкө вöралысь коркө да аддзас сійöс — и то ладнö. Век нин семьяыс сэки тöдмалас...

Семья... Митрей кунис синъяссö, думыштчис... А мый семьяыс? Олöмыс тай колис, а казътыштны быттö и нинöм. Гöтыр, пи да ныв... Любовь да сöвет Нинакөд, гöтырыскөд, эз артмы. Некор эз радейтлы Митрейöс Нина, и та йылысь сійö тöдіс. Мырддис Нинаöс Митрей аслас ичöтдырся ёртыслысь, Дзоля Кöсьталысь. Кыдзкө лөк ногөн ставыс артмис. Первой больничакöдз Кöсьтатö вайöдіс (тышкасигас зорйөн көвдыштiс, сюрсалисö дойдiс). Сэсся мырдысьөн моз Нинаöс босьтiс. Мырдöналöм и артмис. Кысь сэсся любовыс? Чужтiсны-быдтiсны эськөныла-пияöс, но тöлкыс... Нылыс — надейнö, дзик öти морт, кодöс радейтліс Митрей — бöжнас швичнитiс да карö усьыштiс. Ачыс öнi ыджыд-паськыд, верöса да челядя. Эз юась ни висьтась тай, ас ногыс вöчис... Лөг петö öнi. Кыдзи и пи вылас. Писö роддомысь босьтiгөн Митрей йöймымöныс радліс, гöтырсö окаліс весиг. Мужикöс пö меным козыналін! Отсасысь лоö, вөрö кыскавны кута... Эз тай сiдз ло. Нямöд кодö кутшöмкө пиыс быдмис. Мамыс кодö рам, быдторйысь родö. Челядьдырсянныс некодкөд весиг эз чашйысьлы. Мыйкө книгаясөн нускө... Синсö тшыкөдіс. А вөрö сира гезйөн он кыскы! Мырдөн сорөн некымынысь нуліс жö Михайлö писö вөр керкаö, а сэсся кинас öвтыштiс, гөгөрвоис: тöлкыс оз ло. Быд вуджöрысь полö, кыйкъялö мунігас öтарö-мöдарö. Кык пу костö век вошöма. Мукöддырйи Митрей весиг думайтліс: абу-ö Дзоля Кöсьталөн Михайлöыс? Сэтшöм жö «тюпень». Öти кадö öд Нинакөд барьялісны Митрей да Кöсьта... Синмыс эськө мамыслөн кодö, а нырыс... Но кыз докажитан? Да и мыйла? Тöдмалан збыльсö, и öшöдчыны ковмас... яндзымыдла. Митрейлы тайö оз ков. Да и пиыс важөн нин бокын. Чойыс моз жö пышйис карö. Университет помаліс, мыйкө нускө сэн, важ мойдъяс да коми сыланкывъяс корсьысьö деревнясын. Нинöм абусö вöчö. Тьпу! Удж жö мужиклы!.. Трактористö либö шоперö кө велöдчис, тöлкыс ыджыдджык эськө лои... Ачыс тай Митрей öнөдз вöрын тракторён пессьö, оз кайтчы. Öкмысдасöд воясас посёлокын вөр лэдзысьяс öтруб сёйлісны. Ставыс киссис сэк, уджныс бырлі. А öнi, майбыр, уджтö

позьё нин аддзыны. А дышыс мед кулё! «Троя» вылё уськөд-чысьыд абу жаль. Некод абу жаль Митрейлы. Весиг ачыс аслыс.

Пукалё Митрей, мөвпалё... Чеччыны дыш. Да и нинөмла. Татчө и кольччас, коз улас. Мед татысь и аддзасны лысьёмсө. Аддзасны кө... А лолыс? Лолыс кытчө инасяс? Төдан кө эськө, мый мөдар югыдыд эм, и кувнытө кокныдджык... Но и тані абу ставыс лючки-ладнө. Некор эз эскыв Енмыды Митрей. Серавліс юрбитысяс вылё. Клёнганныд пө образ водзын, святөйөн асьнытө петкөдданныд. Вичкоысь петанныд да здук мысти нин сө грек вөчаннныд, а мөд луннас грекъястө бара прөститны кораннныд. Бура лосьыд! Нэмтө грекын ов, и ставыс прөститсяс?! Енмөн сайөдчаннныд? Колө ас умөн овны. И — некодысь не дзөрны! А то сөясны... Мортыд — медся лёк зьверыс. Көть и кык кока. Виас, и синнас оз лапнитлы. Зьверыд сөйөм ради виас, а мортыд — сідз... И ас кодьсө жө мөдар югыдас мөдөдас. А ачыс талаас кольччас! Мыйлакө оз тэрмась гуө пырны! Сюрс вояс олө, а тыш бөрся тыш... Оз и вежсьы мортыд. Космості лэбалам, а өта-мөдөс гындам... Тадз либө Енмыслы и колө? Сідзкө, абу бур да рам тіян Енмыд...

Митрей дрөгмуніс. Эз мөвпгьяссьыс. Бур вөралысь, сійө кыліс ув трачмунөм шы. Кодкө матыстчө. Видзчысьөмпырысь, лөня... Морт? Али абу? Митрейлөн сьөлөмыс топавліс. Радлыны али?... «О, Господьёй-Енмөй,— и тайө Митрей?— эм кө тэ, отсышт... Мед локтысьыс морт жө...»

Верстьө мужиклөн топалісны синъясыс. Бытьтө бритваяс... Пөрөм пу сай... Вужля... Гөгөрвоис. Абу морт тайө. Пармаса көзяин! Енмөн сетөм, вөр-ваөн сетөм. Абу Митрей кодь... Ош! Төдса ош. Вєськыд пельыс со косяссьөма.

Сувтіс Митрей. Дас вит метра кост... И видзөдісны син на син! Морт да зьвер. Коді ёнджык? Коді вынаджык? Коді тані көзяиныс?

Важ төдсаяс... Воддза во паныдасьліс Митрей тайө топтыгынискөд. Пищала сэк вөлі, кык ствола. Пуля да картеча. Көть и понтөг жө. Позис чергөдны. Но эз лый Митрей. Мирөн сэк разөдчисны. Прав вөлі ошкыс сэк, ас ногыс прав. И Митрей гөгөрвоис тайөс. Сійө сэк буретш ордымаліс вьль лэчкасян туй. Вуджис ас районлысь вөр границасө, тувччис Мылдин районө... А сэні ставыс мөд ног! Вөр кварталъяслөн прөсекъяс везйөнымунөны асыв-войсянь рытив-лунө. Оз лунө-войө, оз рыт-асылө... Ёна шензис первойсө Митрей. Компассө голя вылас өдйөджык өшөдіс. «Сьөд» прөсекө коркө пырис, рассялөмө, важөн нин весавтөмө. Радліс, мый абу на удитөмаөсь прөсексө мөдъяс лэчтуявны. Мича местаяс сюрисны... Верст куим муніс Митрей өтарө-мөдарө видзөдалігмоз. Пөрласьөминъясті уялыштис, ковтысьясө на тшөтш вєськавліс... Он тай зырөд пармаөдыд! Часнад верст-мөд и венан. Важ комиыд чомкостысь унатө луннад гежөда и ветлөма. А чомкостыд — квайт сайө верст, өніа ногөн кө. Збыль, пармаад коктө вывлань лэпталан, а он водзлань шыблав, кыдзи мир туй вывтід.

...Бокусь трачкөдчөмсө сэк Митрей пыр жө кыліс. Метр кызькомын сайысь, шуйгавывсьыс. Тіля, да нинөм оз тыдав. Километр джын кымын сэсся орччөн кодкө повзьөдчис. Дышөдіс весиг Митрейлы. Важөн нин гөгөрвоис: ош. Тшөктө тай прөсексьыс вешйыны, вєсьсөн, пөшти дзєбсьытөг висьталө. Но тайө

туйыс и Митрейлы колө! Оз сет сійөс некодлы! Көзьяиныс сійө!  
Но өтиыслы быть ковмас вешйыны.

Чорыд сьөлөма мортлы, буракө, веськаліс чорыд сьөлөма  
звер. Рассялөм, неуна тыдалыштысь ордым вылысь Митрей  
аддзис руалысь ош сит. Кызіника асмогасьөма вөрса Михайлөыд,  
дзик на өні. Оз пов, сідзкө... Мырдөн тшөктө кежны. Митрей  
сюся видзөдліс гөгөрбок... Оз на тыдав. Горөдіс сэсся: «Вай ачыд  
кеж! Лыя өд! Менам местаыс тайө, ме аддзи! Лэчкала, и тэнсьыд  
ог юав. А кутан кө пакөститчыны, начка!»

И сійө здукас аддзис оштө. Вужля сайын мыгөртор вөрзис,  
сэсся и юр мыччысис. Скөр да сьөд синъяс — быттьө кеслөм  
пуртыяс. Веськыд пельыс со косяссьөма, ротьялө лестукөн. Пов-  
төм видзөдласа. «Мун,— синнас висьталө ошкыс.— Кыкөн ог  
төрөй. Либө ви... Тані ме, тэ водзын...»

Эз лый Митрей. Көть кык пуля виччысисны нин стволын.  
Шензьөдіс Митрейөс зверыс. Сэтшөм збой! Гөгөрвоө өд, мый  
пищала мортыс, а вот петө! Характер! Сэк кажитчис Митрейлы,  
мый тайө ошкыс — сійө ачыс, Митрей! И мыйөнкө найө өт-  
кодьось...

— Давай разөдчам, Михайлө!— горөдіс сэк ошкыды. Пытш-  
көснас кыліс: оз уськөдчы. И збыль: здук мысти ош кытчөкө  
воштысис. Некутшөм трачмунөм эз кывлы. Кужө ветлыны, тра-  
сичаыд, кор аслыс колө!

Недыр мысти Митрей гөгөрвоис, мыйла сійөс панлаліс зве-  
рыд. Метр куимсө сайысь аддзис ошгьяслысь чувалан места. Кос  
нюртор шөрын сулалісны жебиник пожөмъяс, а гөгөр — нэмө-  
вөйся козъяс да сусъяс, найө помся жмитөны пожөмъястө, оз  
лэдзны быдмыны да сөвмыны... А вот кос нюр шөрад тай кызкө  
быдтысьөмаөсь! И местаыс кажитчөма ошгьяслы. Свадьбуйтан  
места, абу сідз-тадз! Неважөн на пируйтөмаөсь. Чуймаліс Мит-  
рей, дивуйтчис. Со өти пожөм пу... Стөчджыка кө, сылөн ко-  
лясыс. Метра кык кузя діныш кольөма, йылыс орччөн туплясьө.  
Пу гөгөрыс — талялөм кытш. Ай ошкыс тадзи чирсөма-пөрөдөма  
путө, энъ ош водзын удаллунсө петкөдлөма... Неылын со мөд  
чегөм пожөм. Мөд ошлөн «уджыс». Надейнө, ордйысьөмаөсь,  
коді водзджык ассъыс пусө пөрөдас. Жебтө иньыд ас дінас оз  
сибөд!

Митрей нормыштліс весиг. Төдіс: тайө свадьба местаыс регыд  
эндас. Морт дуктө кывлөм бөрын зверыд вешъяс. Сідзи и лои.  
Мөд онас, арнас, Митрей бара воліс сэтчө, но эндөма нин...  
Ошгьяс вешйөмаөсь.

...И со тай, бара паныдасис важ төдсакөд! Орөм пелькөд!  
Гашкө, Вөр-пөлыс вайис татчө сійөс, мед петкөдлыны, кызди  
помасьө-вийсьө морт? Либө водзөс босьтны көсйө пируйтан  
места арашуйтөмсьыд?

И бара сулалісны син на син. Морт да звер. Вежөр да ве-  
жөртөмлун. Важ төдсаяс. Но врагьяс али өртгьяс? Öні ошкыд  
кыліс, мый морт пищальтөм, а сідзкө,— эбөстөм. Вермис вөчны,  
мый көсйис. Вужля сайсянь со бара петкөдчис. Дзөньнас. Но  
мыйлакө тай кын мыр моз сулаліс! Эз сувтөд тшөтьсө, эз топөд  
пон моз пельяссө. Сідзкө, думыс абу уськөдчыны. Но мыйкө  
быттьө виччысис...

Зэвтөм сөнъяс... Первой орины мортлөн, Митрейлөн.

— А-а-а!— горзіс сійö.— Локтін!? Давай! Чайтан, пола? Этійöс аддзылін? Мен сёр нин повнысö! Сёян кө, аттьö шуа! Оз ков сэк мучитчыны! Давай! А-а-а!

Морткöд öттшöтш лёкысь карöзтіс перк... Öти, мöд, сэсся коймöд... Стаянас чукöртчöмаöсь кодакостікö. Виччысьöны вира спектакль. Давай пö, морт... Давай пö, ош! Мый виччысянныд? Сöмын сьöкыд гөгöрвоны, код вöсна сулалісны öні «вöрса катшаяс». Ышöдісны ошкös? Дорйисны мортös? А гашкö, вöзйисны: «Вай дугдöй, торйöдчöй, вöрад местаыс ставлы на тырмö?»

А морт да ош — пыр на воча нырöн. И бара ори зэвтöм сөн... Митрей ачыс уськöдчис зьвер вылад. Некутшöм думтöг, некутшöм мөвптöг. И некутшöм лөгтöг. Кулакъяснас шенаситыр шыбитчис вужлялань. Думсьыс корсис аслыс пом. «Öні... öні... öні...»— тіпкис вежöрас. Но некутшöм «öні» эз ло. Люкасис вужляö, патурликасис да нюжаліс ва нитш вылас. Коксö на мургыльтіс... Сідзи и колис сэсся му вылад, пыдзырттöм ва ветьök кодь. А вот ошкыд воши! Быттьö эз и вöv, быттьö асья руön енэжö качис.

Эз-ö Митрейлы ставыс тайö каститчы? Но кытчö воштыны этійö зьвер кок туйяссö? Митрей пуксис, нёриньтчис вужля бокö: «Вöлі, вöлі зьверыс! Сволочь! Нарошнö менö эз крöмсайт, мед дырджык на мучитча! А-а-а! Ставыс меным паныд! Весиг кувнытö оз сетны!»

Скöрысла да забеднöйсла окота вöлі юрсисö нетшкыны. Пикö воис... Оз нин тöд, мый вöчны: «А кыдзи эськö мукöдыс? Этшаысь мöй вöрас вошлöны, этшаысь мöй ошкыскöд паныдасьлöны? Со шонъян пöльöй... Матö нелямын ошкös чергöдлöма, тöдса вöралысьöн вöлöма. А мый эськö пöльöй вöчис тані, ме местаын? Вай отсышт, шонъянöй, велöд!»

...И кутшöмкö вын быттьö тойыштіс Митрейös. Сувтöдіс кок вылас. «Чеччы, мун, мый базгысин!? Мужик али ветьök тэ? Арся вöрас кувны лöсьöдчин? Йöз серам. Кок улад тшак и вöтös, ваыд кок улад. Кутшöм тэ вöралысь! Кутшöм тэ фараон?»— кодкö горзіс Митрей пытшкын.

Мöдöдчис Митрей. Воськов бöрся воськов, и мед кө мургыльтчöма кокыс. Усяс — чеччас. Беддясис. Водзö, водзö... Водзö! Йöзлань!

...А öні кад воис висьтавыны, кыдзи Митрей сьöд вөр шöрас воштысис.

Ставыс вöлі, кыдзи колö: сентябр пом, вöралан кад. Тайö кад-сö Митрей вобыд виччысис. Со и мöдöдчис нопъя черань моз вöрад. Вөр кыскалан машинаön шувгис-муніс гортсянныс квайтымын километра, сэсся и трöпа вылö кежис. Сьöкыд ордым вылö. Рассялöм местаясті, пöрöминъясті колö на дас вит верст лёнчикайтны. Коми ногөн кө,— кык чомкост. Сэні Митрейлөн выль керка. Куим во сайын на и лэптыліс. Майбыр местаяс! Гөгöр — ыджыд эрда нюръяс, багатыр кодь козьяс да сусьяс... Сяльгысь ёльяс, вöрса ю... Зьвер-пöткалы сöмын овны да йывмыны! И главнöйыс — йöзсянь ылын. Шулім нин тай, мый Митрей йöзтö маті берегö ас дінас эз сибöдлы: ю горулынджык кыйсьысяслысь туйяссö тупкаліс-вомöналіс. Медся матысса керкаön öні лои Модест Ваньлөн чери кыян керкаыс. Но сэтчö Митрей некор сэсся оз пыр! Воас кад, и резьöдас на Ваньлысь

керкасö. Нинöм шöйтны бокöвöйяслы! Тані ставыс Митрейлөн! Веськыда кö шуны, сійö ачыс на помöдз оз тöд местаяссö. Компаснас на весиг гоз-мöдысь вошліс. Мылдин районса вөръясын кызвынсö лэчкасьö, партизан моз. Сэтчöас вуджигөн век шулö: «Чолöм, Мылдин... Номсöдлышт!» А бөр вуджигас, куш нопйөн кö: «Мед горшад тасасяс, Мылдин!»

...Коркö воис жö керкаöдзыс. Квайт час асылын петліс горт-сьыс, нель час лунын — места вылын нин. Сöмын тай туйыс сьöкыд... Абу öд нин кызь арöса. Кадыс мунö, сёмокасьт. Весиг йирмөг босьтлö, кор думыштчас, мый воас кад, и пöрысьысла вөрö мунны оз вермы. А кыдзи мужиклы вöртöгыс? Мый ради сэк овны? Абу олөм...

Керкаыс Митрейлөн чача кодь. Стенъяс лöсйöма, югыдöсь. Вель паськыд кык öшинь. Пелькиник посводз. Пытшкас кык нар... Мöдсö думсьыс пиыслы вöчліс... Сэсся сваритöм, öдйö шоналысь кöрт пач, кодöс бокъяссяныыс вевттьöма изъясөн, шоньд кутöм радиыс. Дум эськö вöлі кирпичысь плитаа пач тэчны, но эновтчис. Öти-кö, та ылнаö кирпичтö кыскалöмыд — грыжа нажöвитöм. Мöд-кö, татчö Митрей сöмын арнас волö. Мый кирпич пачсьыс? Кöртыс сідз жö шонтас. Арыд абу тöv, Мороз-пöль оз на курччась. А кöрт пачсö да мукöд кöлуй чарöм вывті свöякыслөн «Буранөн» лои катлыны. Вель уна сьöм сэк зепсьыс муніс. Бензинысь вештысь, мöдторйысь вештысь... Нель-ö-вит штопөн быд пöрйö юктöд... Век на кезйöдлö. Колöма аслыс мыш вылас пачсö катöдны.

...Кайигмозыс Митрей кык сьöла лыйис. Öтиыс матынджык пукаліс, да дрöбсьыс весиг ротмунöма. Мöдыс, кыдз шуласны, виртöм. Айяс, тошкаöсь. Нинöм, пажун-ужын вылö туясны. Мый-мый, а Митрей вöрад бура сёйліс. Кыйдöссö эз жалит мукöд моз, да и код ради жалитныыс? Сьöла либö гырысь пöтка пытшкöсьысь пуөм шыд — медпервойя сёяныс сылөн. А мукöдыс тіралöны быд сьöла вöсна, гөнсö арталöмөн гортас лэччöдны дасьöсь. Чесьтö гöтыръяс водзас уськöдчöны! А асьныс тшыгъялöны вöрас. Ылöдз-ö мунас тшыг мортыд? Верст джын бöрын веньгыртчас! Кутшöм сэк вöралысь? А пöтыдлөн выныд лунтыр кешлö тырмас. Быдлаті шычкыртны удитан, уна выль места аддзылан да уна прöмыс босьтан. Тадзи колö овнысö!

Чай пыдди Митрей юліс пакула. Да мед сійö вöлі мырд, сук сьöд краска кодь! И чай заваркакöд сорлавны оз ков. А нöшта пакулаа чайникö колö шыбитыштны сус лыс. И артмас «суспак» (тадз нимтіс юанторсö Митрей). Сакаралан, да эсійö «кока-коласьыс» сё пöv чöскыдджык. Гырк висьöмтö вунöдан, сьöлөмтö ёнмöдан. Весиг томмылан!

...Митрей ломтіс пачсö, котöртліс вала... Сöдз ёлыс орччөн и визувтис... Пуктіс плита вылö чайник да пöрт. Он и тöдлы, пузясны... Дыш лои куштысьны, да кулис сьöлаяссö: перйис пытшкöссö, мыськыштіс да шыбитіс пöртйö. Регыд мысти керка жармис... Пöрчис вылыс кöлуйсö, пасьталіс важиник гач да дөрөм.

Онялö керкаын. Майбыр жö нин! Некутшöм курорт оз ков. Дзик вежöртöмөн колö лоны, мед бокö, курортъясö, мунны... Митрей пыр чуймаліс татшöм йöз вылас: кыдзи позьö лун-лун пляж вылын кöлтыкайтчыны, рушку гыжъявны? Мый, шондід тан оз тырмы? Воысь-во тай со поводдяыс жармö. Митрей эсь-



кө мөдөд луннас и косьмис курортад. Унаысь вөйылысны путёвка, да век кинас өвтыштіс...

Колө на картофель вөчны, шыдө бруткыны. А сэсса позяс и царскөя ужнайтны! Со, нопьяс куим «Троя» зельөдчө, читкылясьö! Митрейлөн — принцип. Вөрө кайигад век «Троя» босьтө. И оз сьом видзтөм понда, а сьокта радиыс. «Трояыд» кокныдик, а сорлалан вакөд — уна водка артмас. Сэтшөм жө юантор. А пагавнытө и лавкаысь босьтөм водкаысь поэьö. Пагалөны тай со. Вижөдөны арся кыз пу кор моз. Судьбасыд он пышйы. Колө фаталистөн лоны.

Но шуам збыльсö: Митрей гортас водканад да «Троянад» эз балуйт. И алкашөн сійөс он шу. Видлы шуны! Регыд сьылідзиртө бергөдас! Да и некор балуйтнысö, уджтө воштан...

А со и шыдыс пусис! И «суспак» дась. Митрей сорлаліс ва сорөн спирт, дасьтіс пызан. Лук-чеснок, нянь, салө шмат, помидор-огурцы... Ресторан! А сьөла шыд дукуыс! Бульонсö — торйөн, öти сьөла туша — торйөн... «Но, Вөр-пөль вөсна!»

Лемень кружка тыр сорлалөм спиртөн Митрей петіс керкасьыс да неуна кисьтыштіс му вылас курыдторсö. Эз уна, вомтыр. Нинөм Вөр-пөльтө ёна юктөдны, юрыс висьмас, пөкмелля вөдитны мөдас. Но кисьтыштны колө быть, мед Вөр-пөльыс оз скөрмы. Сійө өд мужик жө, курыд зельөтө оз жө бөрыныт. А вот Ва-пөчкөд кызди, чери кыйигөн? Чай кисьтны?.. Митрейлөн весиг нюмыс петіс. Воськыда кө шуны, сійө нинөмлы да некодлы эз эскы. Йөйталөм ставыс. Асьтө ылөдлөм. Аслад кө сямыд да выныд абу, некутшөм Вөр-пөль да Ва-пөч оз отсавны.

...Чөскыда вомад пырө сьөла яйыд! Быттө ачыс сылө. А гыркыд корө «биа ваөн» сьөла яйсö мыськыштны. Мудз вылад Митрей гажмыштіс... Но штопысь унасö оз жө ю. Норма! А немеч эськө и тайө штопсьыд чермунас! Мыйла вот сідз? А чөртыс төдө! Мөд олөм налөн, мөд культура. Сійө жө французыс. Сөйө пө, и сөянсö чөскыд винаөн «запивайтө». А ми юам, и водкатө кос нянь торйөн «закусывайтам». Со көні торьялөмыс! Бара жө культура! А Митрейлы лөсьыд нин... И быттө мирыс небзыштіс, и быттө лөгавны некод вылө нин... Сійө жө Модест Вань вылас... И весиг понйыс жаль лои. Кутшөма никсіс Бимыс, вөйысис татчө! Кыз синваөн быттө бөрдіс. Öні эськө пөтка пытшкөсөн да лыяснас чөсмасис... Но Митрей шуис: тшөть! Воддза кайлігас Бим пакөститчис, лэчкысь кулөм тар кватитіс. Вель ёна дубитіс Бимөс Митрей, куим лун бокын пышъяліс сэсса понйыс. Öні со бара нин чирьштіс, аскөдыс эз босьт. Дорын узылыны велөдө. Мед төдө местасö, вежөрмыштө. Нөшта кө пакөсьт вөчас, Митрей лыяс на Бимсö. Кыв шутөг. Нинөм урөссö видзны...

«Но, Вөр-пөль, давай нөшта кыксө грамм! Ми өд тэкөд мужикъяс! Ми өд тэкөд вермам на!»

...А недыр мысти Митрей лөсьыда нин шкоргис дубитөм көр куясөн вольсалөм нар вылын. Кутшөм местаясын сійө шөйтіс аслас вөтъясын, ми ог төдөй.

...Вөр-пуяс костті петысь асылыс заводитчис юр висьөмсянь. «Троятө» он ылөд. Көть «Мартини» гиж сулеяс, технической спиртсьыд «благороднөй» юанторйыд оз артмы.

Митрей съкыдырысь восьтіс синъяссө, ружтігтыр чеччис, пачсө ломтіс. Сентябрь төлысь, а кыз ыркалма керкаыс! Абу-ө нин восьса өдзөсөн узьсьома? И поводдяыс сэтчө жö... Йöймöма... Тöрыт на шондіа вöлі, а талун со слöт нисьö зэр петöма. Арланьыд век тадз. Зэртöм луныс этша овлö. Кор оз ков, сэки и зэрö! Гырысь нюръясыс, буракö, ас вылас кымөръястö кыскöны, мед лым пуксьытöдз удитны дундöдчыны-пöльтчыны... Шуласны тай: нюрад кө тыр ваыд абу, төвтö эн на виччысь.

Петіс ывлаö Митрей, мөвпалö... Страк мунны вöрас: «Трусикöдзыд көтасян. А-а-а, гуляйтыштам водзö! Лэч туйыд некытчö оз пышйы! Аски мунам!»

Митрей быдсөн долымис. Пырис шонавны нин удитöм керкаас, бара сорлаліс «Троя». Крапнитіс стöкан, нуръясьыштіс тöрытъя колясьясөн. Бара на мортъяммис! И быгтьö поводдяыс абу нин сэтшöм урöс... И быгтьö вöрыс кыскö... «Гашкö, петавны неылö? Сідзи, шöйтігмоз? Керкасянь верст джын сайысь коркö пуртікасян места сюрлі, но лэчяс сэн абуöсь на. Гашкö, видзöдлыны? И страк петны... Но и луныс жаль. Локті кө та ылна-öдз,— мыйкö вöчны колö!»

Вель дыр катласис мөвпъяснас Митрей. Нöшта исасьыштіс курыд зельöнад. Гажмис. И шуис сэсся: «Ветла... Прöстö сідз. Пищальтöг ни компастöг. Плавкнита ас ылö этійö важиник плащсö и петала...»

Сідз и вöчис. Весиг важиник резина сапöгсö брöдни ылö эз веж. Сюйис плащ зептас портсигар да зажигалка, нöшта «сё граммасис», и...

Тасянь ставыс и заводитчис. Прöклинайтіс асьсö бöрти Митрей, мыйла петіс керкасьыс. Мутиыс кыскис, вина гагйыс йöткыштіс.

Öдйöкодъ и воис пуртік дінас. Но кок чуньöдзыс көтасис. А, нинöм, керкаыс матын! Вескыда мöдарöсö петас, ылö-салöмөн. А пуртікыс абу ыль, эндöма нин. Сöмын кад воштöм артмис. А поводдяыс! Уль лым со шлапкыны мöдіс... Да, татшöм поводдянад бур көзяиныд и понсö ывлаö оз лэдз. Бимыс кө орччөн вöлі, гажаджыка эськö асьсö кыліс Митрей да... Час, куритчас да бөр надзöникөн швункъяс... Аддзис Митрей коз ув места, пуксис куритчыны. Портсигарас гоз-мöд куритчан эм на... Но вот чöртыд! Зажигалкаыс көтасьöма. Чиркйöдліс, чиркйöдліс көтасьöм кияснас, немтор эз и артмы. Съöлыштіс вазьöм сигаретсö, бөр сюйис ва зептас портсигарсö да зажигалкасö, чеччис... «Кытчö мунны? Вескыда али параллельті, кыті локті? Сэті ыджыдджык крук артмö. А-а, муна вöртіыс!»

Слöт сора уль лым шлапкис и шлапкис. Медводдза лым. Водз мыйкö таво повзьöдчö! Абу на кад быгтьö... Йирмöг босьтö. Öдйöджык, öдйöджык керкаö! Сэні шоныд, сэн спиртыс на виччысьö!

Зумыд воськовъясөн мöдöдчис Митрей. Вескыда вөрöд. Керкалань! Керкалань! Съöкыд жö нин пармаöдыд мунны! Öтарö пөрöмин вескалö. Кок улад нитш чавкайтö. Либö тільö люкасян. А вазьöм вöрысь мустöмыс нинöм абу.

Думайтö тадз Митрей, лёнтікасьö... Жуяліс нин быдсөн. И «вина жарыс» вожөн петіс. И керкаыс оз мыччысь, трасича! Кытöнкö тан колö сылы лоны, орччөн... Кадыс, көнкö, уна нин коли, и часітö эз босьт. Рök ылад, некутшöм прöсек либö ор-

дым оз тыдав. А вылісянь слөтитө и слөтитө... Рытивлань колө петны, а көні сійө рытылыс? Пу да кодзувкоткар серти эськө позяс ылөсавны, но бара жө — ылөсас... Гөгөрвоис Митрей, мый неладнө. Вошис, буракө. Со кутшөмкө ёль мыччысис, но тайө ёльсө Митрей таөдз эз на казьявлы... Немтор, абу пер-войысь! Кытшлалыштас да петас! Öтитор лёк: пищаль, компас да истөг аскөдыс абу. Вот тайө лёк! И көдзыд ваыс трусик пырыс нин йиджис. Кынмыны да висьмыны абу дыр...

Кызкө пытшкөснас весиг дрөгнитис Митрей. «Ййө ру! Шулис жө шонъянөй батё: вöрад весиг асмогасьны петігад пищальтө аскөдыд босьт! Этшаөс ошгьяс парсавлісны?» Митрей сэк сералис... А öні абу серам. Ывлаыс вочасөн рөмдыны кутіс. Узьмөдчыны ковмас. А весиг черыс абу! Ныв пу лаптө он керав, шалаштө он вөч. Нетшкысьны кияснад ковмас. Но главнөйыс: истөг, истөг, истөг! Зажигалкалы — пом! Сійөс шыбитны позьö. Ылөджык. Кимлескивыв! Öні колө мунны, мунны! Гашкө-й, люкасяс на керкаас?

Эз люкась. Пемдытөдз муніс. Став эбөсыс быри. Усьö-чеччө, усьö-чеччө... Кыкнан сапöгыс косяссис пöрöминъясті кыскасигөн. Гоз-мөд нюр нин вуджис, нөшта вель паскыд ёль. Али ю? Но кытысь найö? Некор эз аддзив Митрей!

Узьмөдчис нэмөвöйся коз улө. Дубалөм киясөн чегьяліс коз лапгьяс, вольсалис ас улас. И вывсьяньыс на вевтгысис лапгьяснас. Ыркыд... Став лысьöмыс горзö: «Шонты, шонты! Бипур öзты!» Да, унатор эськө сетіс öні Митрей öти истөг тув ылө. Либö пон ылө. Бимыс кө орчөн вөлі, шонтіс эськө. Да и воштөдчыны эз лэдз, керка дорад эськө вайөдіс. Но мый öні та йылысь гаравны? Киссьөм ватө он курышт. И мыйла тайө рөкыс Митрейлы? Гашкө, оліс талунөдз не сідз?

Думайтө Митрей... Казьтылө важсö. Томдырсö, семьясö... Воштысьны эськө вөтö көть час-мөд кежлө... Но оз тай узьсы! Оз лэдз көдзыдыс.

Эз и унмовсьлы Митрей. Муртса мынтөдчисны асья рөмыдысь пу йывьяс, шуис аслыс: водзö мунны. Мөд войсö битөгьд он ов, көдзыдысла кувсян. Дугдывтөг слөтитө да лымъялө... Пеж поводдя, пеж! И кодарлань мунны? Сöмын рытиввылө. Сэні йөз, сэні сикт-посёлокгьяс. Но ылын, öти лунөн он во. Аскиөдз жө көдзыдысла кувсян. Мый нө вөчны? Пукавны да сьмерт виччысьны? Но Митрей абу блин сөйысь рөдысь, сідз оз сетчы. Мунны колө!

Ылөсалис коз пу серти рытивсö, вөрзьөдчис... Эбөстөм, но мунö. Усьö-чеччө. Бара нюргьяс, бара ёльяс... Коркө дзикөдз слабмис. Бруткысис васөд му ылө. Пом... И бытгьö кокньөдіс! Öні ставыс гөгөрвоана! Тайө и эм Митрейлөн помыс! Тасянь и мунас мөдар югыдас, эм кө сійө! Косаа старукаыд быд морт дорö ас кадö да ас ногөн локтө. И мый öні жалитныыс? Абу лёк сьмерт: абу висьöмысь, а вöралігөн, майбыр, сьод вөр шөрын! Мый каитчынысö? Мед лоö, кызд лоö! Öні унмовсяс, и оз чеччы. Нюмъялөмөн енэжас мунас... Мужик... Воин...

Митрей шоналіс. Кажитчис, мый гөтырыслөн небыд да шоньд киясыс малалöны сійөс. «Нина... Нина... Прөстит...»

И со этійө перкыс! Ставсö торкис, трасича! Садьмөдіс, дэльөдіс! Чеччөдіс! Скөрмөдіс. И этійө важ төдса ошкыс... Кодлыкө ёна



колө, мед Митрей мучитчис на таладор олөмас. Сэтшөм нин лөсьыд вөлі, шоныд...

...Бара лоө мунны. Беддя, лёнчиктө... Пөльыслөн ортыс тодышкаліс-чеччөдіс-ө, кутшөмкө вынтор сетіс? Дыр-ө кежлө? И коліс-ө? Но кутшөмкө вын йөткө бөрсяньыс, Митрей тайөс кылө. А слөтыс оз дутды... И регыд рөмдас. Мөд асылыс оз нин ло Митрейлөн. А сійө мунө. Беддён. Мургыльтөм кокнас. Абу нин морт кодь. Ранитчөм зывер.

Пемдігас нин Митрей люкасис рассялөм вөр туй вылө. А радлыны выныс эз коль. Да и радлыны-ө коліс? Вөрөдыс шөйтігөн эськө аддзыліс татшөм туйсө... Но сійө-ө? И местаыс төдтөм. И кодарлань колө мунны?

Мөдөдчис веськыдыв. Съөкыдырысь, куим кокөн. Сувталөмөн. Сө-мөд метра мысти сьолөмыс топавліс. Оні — радысла нин. Туйсө вомөналіс косьмөм вөр ю. Ар, слөтитө, а ваыс — абу. И мед! Мед! Тайө юсө Митрей төдө! И тайө местасө төдө! Со этійө пөрөм коз дорас коркө шойчыны пуксьыліс, куритчис. Чигарка пом сэн шыбитіс. Орччөн сулалысь лежнөг кустысь моляссө сөйис... Сійө местаыс али абу? Сійө... Со пуксьылан местаыс, а со и лежнөг кустыс...

Митрей бөрдіс. Эз кыз синваён, а бара пытшкөснас. И эз нин шогысла, а радысла. «Петі, петі, петі,— войлалісны юрсигусьсөн тэрыб мөвпгяс.— Ловъя, ловъя... Вот олөмыд! Регыд на кок нюжөдөм йылысь думайті, а со... Сизимбергөдана олөм!»

Дум вылас учины кыськө кывлөм кывбурысь строкаяс: «Сизимбергөдана олөм, сизимбергөдана, а ме көкъямысысь сійөс, видла, бергөда на..!»

Бергөдас! Став олөмсө на бергөдас Митрей! Став врагьяссө на педзыртас! «Кувсьөм виччысянныд! Со тиянлы... Этійө оз ков?— Митрей весиг кулактас шеныштчис.— Эг повзъы, эг гартыштчы нямөд моз, ачым ачымөс дорйи! Ме — мужик! Ме — көзяин!»

Тайө бара нин вөлі важкодь Митрейыс. Öдйө тай вунөма сьөкыдыд! Дженъыд тай морт паметъыд!

Но радлыны вөлі водз на. Митрей весиг тшөкмуніс, кор гөгөрвоис тайөс. Онія пукалан местасянь вөр кераөдзыс, веськыда кө вөрті мунны, — верст дас. Прөсекъяс кузя кытшлалөмөн дас вит лоас. Сідзкө... О, Енмөй! Оз во сэтчөдз Митрей! Пемдө нин... А вөрын узыны нөшта вой — сьмерт!

Бара килькулі мужик. Со тэныд сизимбергөдана олөмыд... Сөмын на радлін, а... Бөръя надеяыд воши. Водзджык горзін, водзджык кулакнад шенасин. Көзяин! Фараон! И бара — юрсигусьсөн мөвпгяс...

И бара кыткө быттьө лэчыд пуртөн чалснитіс Митрейөс «фараон» кывйыс. «Думайт, думайт, мужик! Корсь петан туйтө!»

...Аддзис. Кор гөгөрвоис,— пөсъявліс. Синъяссө кунис. И колө жө тадз лоны! И колө жө вунөдны?!

Митрейлөн юр вемыс сетіс дзик өти, но ясыд петан туй. Тайө местасяньыс буретш верст сайын и сулаліс Модест Иванлөн выль керкаыс. Буретш сійө керкаыс, код вөсна Митрей Иванлысь ордлысө чегліс. Воөдчас кө сэтчөдз,— ловйөн кольө. Спаситчас. А оз кө... Абу ставыс прөстө сідз. Ывлаыс дзикөдз нин рөмдіс. Регыд сап пемыд лоө. Керкаыс ю бокын, но колө воөдчыны рассялөм важ керасъяс пыр. Некутшөм трөпатөг. Кызь

метра ошыбитчан,— и керкасö он аддзы. Водзö мунаң,— ассъяд помтö корсян. Зорöд пиын — ем. Вöсньыдик сунис, абу кыз, да сира гез. Но тайö сунисыс — öти, мөдöс абу сетöма. И мыч-чö сийöс — «врагыд»...

Карнаныс катовтчис. Ловъялы колö овны. А Митрей — ловъя на. Öти воськов, мөд... Керкалань! Керкалань! И нинöм öнi юр жуглыны! Сöмын көнi тэ, керка-матушкаöй, олан гажöй, шоны-дiнöй? Митрей чегъялö чужöмас вачкалысь кыз пу вожъяс, нетшкысьö водзлань...

Кöнкö матын керка... Но сийö — абу! Сийö — вуджөр! Сийö сöмын Митрейлөн висьмöм вежöрын! Сизимбергöдана олöм, сизимбергöдана... Уськöдчыны. Уськöдчыны муас, сывйыштны медбөръяысь сийöс, окыштны! Вот и пом... Примит менö, матушка-муöй, примит сэтшöмөн, кутшöм и эм. Примит, шонъянöй пöльöй, став грекъясөн... Вот и бур... Вот и шоныд... И жынняян-ныслөн эзысь шыыс сьölöмтö мавтыштö... Корö...

Бум! Бум! Бум!

Митрей пыр на ловъя. Олöмыд вынаджык сьмертсьыд. Тöдöй та йылысь, бур йöз! Бум, бум, бум! Митрей нетшкысьö-кыссьö тайö шыяс вылас. Ымзöмөн, горзöмөн... Гөгөрвоö: тайö — олöм шыяс! Водзö, водзö, водзö!

...И люкасис керкаö. Юрнас. И таысь вежöрыс кыткö ясыд-мис, помтöм-пыдöстöм руыс разалис. Öти кинас малыштіс керка стенсö: гуын кодь, нинöм оз тыдав. Воöдчис посводзöдз, кималасөн восьтіс öдзöссö. А радлыны выныс абу нин... Юрас вачкаліс: «Истöг, истöг колö, истöг...» Воддза пыралігас син улас усылі стенас вöчöм горс, и сэн — истöг көрöб. Корсис. Бара кималасөн. Аддзис. А киясыс — ваöсь... Пемыдас квать-лаліс нар увсьыс кос пес, ылöсас сюяліс көрт пачö. Чиркнитны, чиркнитны! А көрöбас — кык истöг тув. Öтиыс чеги, уси... Мөдыс коли на. И тайö тувъяс — став олöмыс. «Чирк!» И чужис би. Чужис олöм. Кодлөнкö выль олöм.

...Митрей эз вежöрт, кор шоналіс керкаыс. Сийö ыпъяліс ас-лас пытшкөсса жарын. Удитіс гартыштчыны эшкынö, и кытчöкö сыліс, разалис, вошис... Но дыр на швачкис юр вемас: «Бум, бум, бум!»

...Асывнас ойзiгтырйи чеччис, петіс ывлаö. А поводдяыс! Шон-дiа, мелі! Неуна төврутор. И нем виччысьтöг: бум!.. Митрей вөркань моз бергöдчис. Сутуга йылö öшöдöма сюра мыссян доз, ыргөн дозмук... Керка пельöсö... Бум! Бум! Бум!

Митрей бөрддзис. Öнi — синваөн нин. И вöльнöй светыс югзис! И воши олöмсьыс нöшта öти «фараон», и чужис нöшта öти морт.

Чужан лунөн тэнö, мортанöй-ёртанöй! Аддзы ассъяд гортад петан туйтö! Сэнi тэнö виччысьöны!

Став вöльнöй светсö дзевис  
Дзик öти синва войт.  
И вошис мирысь мичыс,  
И гөгөр лои рудөн...  
А югыдыс тай — лэбис.  
Мый тайö вöлі? Мойд?  
Кыз сылөн овыс-вичыс?  
Ме шулі сийöс — Шудөн...

## Морт

Посёлокын стöча некод эз вермы шуны ни казътыштны, кор да кытысь воис тайö мортыс. Кыдзкö друг быттö чужис... Сы- нöдсьыс. Важ катище дорын сулалысь пöлынътчöм, джынвийö муö пырöм балок пач трубаысь öти тувсовъя лунö мыччысис тшын. Кодкö сэтчö явö овмöдчис. А йöзыдлы — веськодь. Оз кö дзерöд некодi, миянлы тай пöсь ни кöдзыд.

...Коркö балокса выль кöзяиныд и посёлокö мыччысис. Тош- сялöм чужöма, кузь, лёзьмöм юрсиа, блед чужöма. Он гөгөрво, кымын арös мортыслы: гашкö, комын, а гашкö — сизимдас. Камуфляжа гачсö сюялöма резина сапöг гөленяс, вылас — ва- жиник купайка... Но кутшöмкö вынөн öвтiс мортсяньыс! Кор первойысь пырис посёлокса коммерческой лавкаö, йöзыс öче- редьын ставөн вешйисны, сылы сетiсны ньöбасьны... Эз ку- тшöмкö полöм ради вешйыны, а дзик мöдторйысь... Абу прöстöй бомж, нинöм и шуны. Вежавидзöмөн чолöмасис ставкöд, весиг копыртчылис. Сёрнитiс лöня. Босьтiс куим водка доз да ыджыд пакет тыр быдсяма вöлөгасö. Тöдчис, мый мортыс абу сьöмтöм. Тешкодь бомж! Али гусялис кыськö? Сы дорö пыр жö пысасис Коктöм Кöсьта. Курыд зелятö сийö ёнакодь радейтлис. Инвалид сийö, да унаөн сибöдлисны доз дiнад. Öтлаын сэсся и петiсны найö лавкасьыс.

Тöлысь-мöдөн посёлоксаяс велалiсны морт дiнад. Весиг нимсö тöдмалiсны: Павел. Участкөвöй висьталiс. Ветлöма балокöдзыс видзöдлыны, мыйся «зъвер» сэн олö, бöрас кодсюрöлы шöп- нитöма: ылитiджык пö ветлöй сы дортi, абу прöстöй морт... Морт виысь...

Дрöгнитлис посёлок: орччөн морт виысь олö? А сiдзи кö, мыйла абу дзескыдiнын? Друг да и танi кодöскö начкас? Öти здукөн кодзалiсны посёлоксаяс морт дiнас, полан ру чужис... Öтнас Коктöм Кöсьта лун и вой коллялис балокын, Робинзонлөн Пятница моз котралiс лавкаö водкала. «Он пов?» — тшапкылисны инвалидöс посёлокса мужикъяс. «Ха! — вашъялис Кöсьта. — Тi- янысь колö повны, а оз сыысь. Нинöм он тöдöй! Сöмын суклясь- ны кужанныд да орччөн олысьтö няйтö вöйтны...».

Посёлокын медся озырыс — коммерсант Иван Изъяуров. Джек Вань. Куим лавка мортыслөн, кужис ас кадö ыджöдчыны-пась- кöдчыны. Шоперөн вöвлi! Тöлка морт быттö вöлi, а вот харак- терыс пыр и вежсис, и эз бурланьö. Ышнясьыштны мöдiс йöз водзын, и читкыр синъясөн мукöддырйи морт вылад видзöдö: со пö ме кутшöм, а тi... Карысь друг-коммерсантъяссö вайлö, ёнакодь гужуйтлöны, рытнас сэсся ракетницаысь либö пищаль- ысь камгöны, посёлоксаöс весьöпöртöны. А участкөвöйлы — веськодь. Да и кыз мöд ногыс, кор ачыс тшöкыдакодь карса «олигархъяскöд» чöскыд вина румка сайын пукавлö?

Изъяуровлөн ыджыдджык пиыс, Денис, сэтчö жö... Школа на помалö, а нырыс Буратиноысь кузь. Век чеччалö ас коддöмъяс вылас. Овлö и, — верстьö вылö. Субöта рытö кö лавканыс дiнысь код мужиктö аддзас, чужъявтöг-вачкавтöг оз коль. «Зарни том- улов» котырысь, буракö, асьсö кылö. Авторитет аслыс перйö. Сöмын öдвакö... Школаас муртса кутчысьö. Важөн нин эськö

тодмышкалісны, да бать пондаыс учительяс кутёны. Родыштёны... Местной «олигархыдкөд» пинясыны некодлы абу окота.

А вот тшөтшгьяясыс вель унаысь нин дітшкөдлісны Денистө, налы веськодъ, кодлөн тэ пи. А Иван Изъюров өтарө писө дорйыліс, да нөшта и судөн на грөзитчыліс. Пиукөс пө калечитөмныд! Но судөдз делөсө эз вайөдлы: өти посёлокын йөзыскөд олө, регыд «гөрд петуктө» лэдзасны, лавкаястө и керкатө тшын йыв лэптасны...

Өтчыд Денисыс вошис. Муніс быттьө школаө, и — абу. Кытчөкө воштысьөмаось и кык велөдчан ёртыс, Миша да Матвей. Кок йылө став посёлоксө сувтөдіс Ыджыд Изъюров. РОВД-ысь опергруппа корис. Сутки чөж муысь и ваысь асалісны зонъясөс. Эз и аддзыны. Весиг сьөдөдліс сэк Изъюров. Кодкө «ляпнитөма»: вөйисны пө, көнкө, зонъясыд, гажа юрнас путкыльтчисны. Эжва вылө морт ветымын петавліс, васө и берегсө гутөдісны. Бара эз аддзыны. Да и пыжыс Изъюровлөн места вылас, вөрзёддытөм.

Гожөм, шоныд... Пөднытө татшөм кадас кужны на колө. Иванлы кутшөмкө «бур морт» бара шөпкөдөма: бомж дінсьыд пө, балоксьыс, аддзылөмаось...

Скөрысла вирөсь синъяса, Изъюров босьтіс «зауэрсө»\*, патронташ да варыш моз лэбыштіс сэтчө. Отсөг вылө нөшта кык грузчикөс лавкасьыс корис. Воисны, гурйыв восьтісны өдзөс, аддзёны: пукалөны ичөтик, ас вөчөм пызан сайын Коктөм Көсьта да Павелыс, гажакодъось нин... Чуймөмөн дзоргөны өружиеөн пырысьяс вылө. А Изъюров Павеллы чужөмас горзө:

— Көні менам пийө, урөд? Кытчө гуалін, тюремщик? Чайтін, ог туялөй? Аддзылөмаось йөзыс, челядь пө татчө волөмаось! Кытчө дзебин? Лыя урөдөс!

Чепөсйис воча Коктөм Көсьта, тупкө аснас ёртсө. И паныд горзө:

— Тэ, Изъюров, кывъяснад эн шыблась! Мыйысь пежалан мортсө? Вөлі кө дзескыдінын, сэсся и морт виысь! Тэ водзджык виан! Со тай, ружьетө чургөдөмыд... Курок лэдзны дась. Ме куим лун дорвыв Павел дорын «гужуйта», петавтөг. И эг на воштыв садъөс! Тэ моз быд юөм бөрын ва гуранө ог лясъяв! Некутшөм челядь татчө эз воыны! И Денисыд тэнад ныр эз мыччыв татчө. Мөдлаысь корсь! Быд баба сёрнили эн эскы!

А Изъюров дась нин лыйны. Некыз оз «көдзав». Но бара на Коктөм Көсьта...

— Меным лый!— горзө сійө.— Лый меным! Думайтан, повзи? Думайтан, меным жаль этія олөмыс? Лый!

Изъюровлөн пытшкөсыс кыткө ори. Лигышмунісны киясыс...

— Мед лыйө,— кыліс пызан сайсянь «бомжлөн» гөлөс.— Меным ставыс дышөдіс... Но лый өтчыдысьөн, эн ранит. А то ачим виа...

Изъюров аддзис Павеллысь синъяссө: лэчыд пурт кодъ видзөдлас. Он шу, мый мортис гажа юра. И синъясыс быттьө пыдөстөмөсь... Көдзыдөн өвтёны. Йиөн. Сьмертөн...

Весиг бөрыньтчис Изъюров. Но кыв вылас пыр на тшөтшясь.

— Ладнө, урөдъяс,— лөньджыка нин сөдзөдіс сійө.— Öні пока мынінныд. Но ог аддзы пийс — кыкнаннытө гуала!

---

\* Пищаль марка (ред.).

— Давай, давай!— бара пузис Коктөм Косьта.— Гуалысьыд тай тырмө! Пежалысьыд тырмө и! А вот бур йөзыс быри! Мый чөртла овны татшөм вольной сыветас? Кытысь тэ коддьомъясыс чужоны?— Нем виччысьтөг Коктөм Косьта нора бөрддзис.— Прөстит, Павел,— лимзалис сійө.— Прөстит ставнысö, и этийö йөйяссö тшөтш... Асьныс оз тöдны, мый вөчöны...

Изьюров да ёртъясыс шемöсa видзöдiсны Косьта вылö. Öти-ыс весиг чуньнас кöсича дорас вöчис: вошласьö пö Косьтаыс, мый сыкöд вöчан...

Сьöкыд сьöлөмөн бергöдчис гортас Изьюров. Кутшөмкö гө-гөрвотөм лов кылөм коли бомжкöд аддзысьлөм бöрын.

...А пиыс мöд лунас и воис. «Робинзонъяс» юасьтөг-висьтась-төг пызнитлөмаось карö. Кутшөмкö пöдругаяс дорö пö... Первойысь сэки пи вылас ки лэптiс Иван. Дубитiс тасмаөн. Кыв ни джын шутөг. Чöла. Пиыс дурпоп моз бергалiс да чилзiс... «Баба...— кезйöдлөмөн пи йывсьыс думайтiс Иван.— Абу мужик... Код рöдö рöдйöма?»

А вот бомж водзад прöща эз и кор. «Нинөм быд лөп водзын копрасьны,— думайтiс Изьюров.— Вывтi ыджыд честь».

...Сентябр шөр. Иван аслас коммерсант-ёртъяскöд öти луно пукалiс Эжва дорын, «пикникасисны». Волiсны карсаясыс вотчыштны да чери кыйыштны. Вежон чöж Ан ю дорын, Иванлөн вөр керкаын, олiсны, талун посёлокö бөр воасны. Шуисны нöшта öти вой узыны, аски пö нин карас лэччам. Вöскресенньö... Со и «пикникасьöны». Пуксьöмаось Изьюровлөн кымынь бергöдөм пыж вылö. Мöд пыжнас со Денисыс ризъялö дай: сөвтöдöма ас кодыс жö кык дундукöс да на водзын этшö петкöдлö. Бара «авторитет» содтö. Позьö, майбыр, «Ямаха» моторнад ризъявны! Сöмын Иванлөн татшөм моторыс посёлокын. Донтөм донысь сетiсны карса ёртъясыс, позьö шуны, козьналiсны...

...А Денис батыс водзын да ёртъяс водзас öдöбөн öтарö кытшъяс вöчалö. Кымынысь Иван шулiс, мед асьсö эз петкöдлы! Оз и вежсьы, трасичаыд. Помся юр висьом, абу пи... Вежöрыс ва челядльөн. Мукöддырйи збылысь йöзсьыс яндзим овлывлö. Кымынкö грекысь писö дорйылис нин Иван! Армияö колö туркнитны, мед умсялыштас... Регыд дорын узылыны велöдасны.

А неылын Изьюровлөн суседкаыс, Модест Наде, песласьö нылыскöд. Карнан Надеөн и шуöны, век карнана ведраа да...

...Изьюров весиг дрөгмунлi Наделөн чилöстöмысь. Мамыслы «отсасьны» босьтчис и нылыс. Повзьом чужöмаось, найö видзöдiсны ва вылö да шенасисны кияснаныс. А сэнi... Гы вылын нöйтчис Изьюровлөн увлань юра пыжыс. «Ямаха» мотор пыр на муркöдчис, бергöдлiс винтсö.

Пыжкöд орччөн ыпкисны да пессисны куим вакуль. Со мыччысьли Денислөн юрыс. Денис... «Да сійö öд вартчынысö оз куж!»— визнитiс Изьюров юрын мөвп.

Шемöс чужомъясөн видзöдiсны гугасьом пыж вылö и карса ёртъясыс. Быттьö парализуйтöма ставнысö.

— А-а-а!— уськöдчис валань Изьюров.— А-а-а! Спаситöй, бур йöз! Сійö вартчынысö оз куж! Денис, кутчысь! Пыжас кутчысь! Зонъяс, отсалöй, вöяс öд!

Кöдзыд ваас ачыс эз жö пыр. Котралiс берег пöлөн, шенасис

кияснас, лёкгоршён горзіс. Сыкөд өтүв өні горзісны и мукөдыс: Карнан Наде эня-ныла, коммерсантъяс да кытыськө усьөм мукөд йөз. И быдөн мыйкө вөзийө, велөдө, кызди эськө спаситны вө-йысьясөс.

Денис со шашаритчөма гуга пыжас, оз көсйи мынтөдчыны. А ёртъясыс берегань нин уйёны... Гөгөрвоёны: көдзыд ваад дыр он кутчысь.

— А-а-а!— ранитчөм зывер моз омлялө Изьюров.— Кытчө колинныд, урөдъяс? Берегас воанныд да виа! Спаситөй Дениссө! О-о-о!

Бузгысис, кылө, кодкө ваас. Ыджыд сывъясөн со вундө васө. Со и пыж дорас нин... Кватитіс юрсиөдыс Денисөс, кыскө ас бөрсяыс...

Изьюров пидзөс вылас лэдзчысис, кияссө лэптөма, быттьө юрбитө. «Аттьө, бур мортөй, аттьө...»— вомгорулас шөпкөдө.

Пыр матынджыкөсь, матынджыкөсь... Регыд позяс и кок чунь йылад сувтны. Öні, öні... Но мый тайө?

Денисөс вайөдысьыс тойыштіс водзлань зонтө, лэптыліс ки пөвсө, быттьө чолөмасис берег дорын сулалысь йөзкөд, и... вошис көдзыд ваас.

Öти здукөн берегсаөс шымыртіс чөв-лөнь. Войтырлысь горшъяснысө быттьө топөдіс.

— Коді, коді вөлі?— ас садяс воис Изьюров. Уськөдчис ваысь ыпкөмөн петысь Денислань.— Коді сійө вөлі?!

— Миян бомжыд...— гусьөн шөпнитіс Карнан Наде.— Морт виысьыд...

— Морт виысь!?— пөдөм гөлөсөн чилөстіс Коктөм Көсьта.— Ті морт виысьясыс! Ті! Пөгубитінныд мортсө! Нинөм ті он төдөй... Вєськодъ ставныдды... А ме төда! Павел фермерөн вөлөма. Бандитъяс воөмаөсь сы вылө, став семьясө сотөмаөсь керканас тшөтш, гөтырсө да куим челядьөс! Төдлінныд энө ті та йылысь, йөз? Лыйөма куим бандитөс... Тюрмаад сюйлөмаөсь, но правдайтөмаөсь... А ті — морт виысь... Олөм сюрөсыс орөма... Сійөн и муніс ваас...— Көсьта ымөстөмөн бөрддзис да уськөдчис валань.— Прөстит, Павлушко, прөстит миянөс... Ме тэ бөрся жө...

Öдва и кутісны Коктөм Көсьтаөс. Көртавны весиг ковмис.

...А Павеллөн шойыс мөд луннас сюрис. Абу ылө и кылалөма. Изьюров посёлок джынсө кыпөдіс, тывъясөн, багыръясөн да крукъясөн корсьысисны. Аддзисны жө сэсся.

Гуасыны став посёлокыс жө петаліс. Изьюров бөрынджык гу вылас памятник на пуктіс и.

Мед көть кызди, а гусө старайтөны. Медсясө — Коктөм Көсьта. Но тшөкыда пө аддзывлөны и Изьюровлысь Дениссө. Гашкө, и сідзи...

## «Омарлы паныд»

Матвей дядьлөн вөр ю бокө лэптөм керкаө Илля да Öндрей воисны, кыз шуласны, юөртчытөг ни висьтасьтөг. Сідз тай лои. Мөдөдчисны шойччан лунъяс кежлө Рытыввожө ком шатиналыштны, а Ан юө и зурасисны... Мыйкө первойсянныс төлк ни слөй эз ло... Рөман, надейнө, мыжа! Эз мун накөд да, өткажитчис, трасичаыд...



Эжвасё вуджигён на ёртъяс казялісны, мый юыс пöльтчöма-гудыртчöма. Эжва кö татшöм, Рытиввожыс кутшöм? Саридз-океан? Кутшöм нин кыйсьöм! Но петöма кö,— петöма. Гортад бөр он кос. Сераласны. Да и сё пöв бурджык субöта-вöскресенньöтö бипур дорын колльöдны, ёртыдкöд эмсö да абусö казь-тыштны.

Ёрт... Эз мун со накöд коймöд ёртныс, Рöман! Ёна эськö эркъяліс, но бөръя здукас век жö öткажитчис. Нылöй пö том зятъпуос карысь первойысь вайö, быть кольчы... Гöтырöй пö балябöжö камöдö. Дерт, помкаыс тöдчана. Татшöмторйыд олöмад оз быд лун овлы. Да и нылыд öбидитчас. Гөгöрвоисны Илля да Öндрей ёртнысö, но «ним вылас» быттö дузгöдчыштисны жö...

Ичöтсянныс ёртасьöны куим мужичöй. Гежöда, но овлö на тадзтö... Асьныс чуймалöны: кызд пö öта-мöдöс терпитам? Дерт, быдторйыс жö вöвлі... И вензылісны, и тышкö пыравлісны. Но вот эз янсöдчыны öнöдз. Позьö шуны,— детсадсянь. Школаö öтлаын жö котралісны и. Сэсса кызкö «дуригмоз» вузьясö пырисны, асьныс эз и тöдлыны. Но велöдчисны разнöйлаын: Илля помаліс пединститут, Öндрей — вөр институт, а Рöман — индустриальной. И колö жö лоны: куимнанныс бөр локтісны чужан сиктаныс. Эз сирав найöс карса гылыд олöмыс. Эз «пысавны» дошлöй карса нывъяс. Кыскис, кыскис зонъясöс Эжва йывса вөр-ва мичыс... Эз лэдз, эз мынтöд. Локтісны, гөтрасисны, семья котыртисны. Уджалöны. Илля — школаын, Öндрей — лесхозын, Рöман — вөр лэдзан предприятиеын. Пыдди пуктана йöз. Кодсюрöлön и юрсиыс нин едждыштö... Но пыр на челядь руаöсь ас костаныс! Гашкö, сыысь, мый помнитöны öта-мöдсö челядьдырсянныс? А сиктсаяс нимтöны найöс Илья Муромечön, Никита Добрыничön да Алёша Поповичön. Мед, дöзмöм таысь абу.

Илля — Илья Муромеч, Öндрей — Добрыня Никитич. А Рöман — сійö Алёша Попович лоö. Илля да Öндрей зумыдöсь, ён тэчасаöсь, а вот Рöман неуна жебджык. Но вот буретш сійö на костын главарыс! Сылön кывйыс — бөръя. Мыйла тадз овлö? А код тöдас... Кутшöмкö пытшкөсса вынön босьтö Рöман. Сылысь и кывзысьöны. Жаль, мый талун мортыс абу... Ковмас «главаритны» Иллялы. Öндрей — медся рам, пыр нюмъялö, и быттö ставсьыс родыштö. А вот гöтырыс Öндрейлön — медся збой. Польштöны весиг Илля да Рöман, вежавидзöмön сёрнитöны сы дырйи,— ыдждöдлöны весиг... Елизавета дай Ивановна пö!

...Иллялön «Жигульön» талун петісны туйö. Позьö воöдчыны пöрысь Емель керкаöдз, дзик туй дорас сійö. А вот сэсянь... «юр висьöм». Колö вөрöдыс на вит верст базöдны, мед Рытиввожö люкасьны. А вот тай, шлявгыны мöдіс... Йöй поводдя! Юнь шöрын тадзи шлявгö! Быттö мöд кад сылы абу. Дерт, сьölöмнад усян. Кутшöм нин кыйсьöм! Иллялы деливö. Да и орччön пукалыс Öндрейлön рушмöм чужöмыс оз жö нимкодълунön ыгъяв.

Воисны коркö Емель керкаад. Лун шөр кад на и эм... Öтарö шлявгö. Первойön чöv-лөнсьö торкис Öндрей, дарöм медся родысь.

— Э-э-э,— шуö.— Начөрта ми вöрас пырам? Камикадзеяс мöй? Трустикöдз кöтасям. Да и наян комтö он ылöд. Ваыс сьöд, быттö ытва дырйи... Мый, миянлы медся ёна колö? Шойччам



тан! Туристалам! Ёти войколто ог и тоддой! Нопйын зельод-чанторйыс эм, тырмас. Сёян — некытчо воштыны. Яй да чери кансер нель-ё-витос босыти...

— Бара босытин? — ыпмунис Илля. — Кымынысь тэд шулома: вöрас кансерто эн босыт! Нинём сэк оз шед! Рöман кө вöли, сёйис эськө тэнö! Бур, мый абу миянкöд...

— Ага, — вашъялö Öндрей. — Ме мыжа, ме... Век ме. Вежон нин шлявгö, а кансерсö талун на босыти. Грамотной морт, а быд неснитöмыслы эскан. Кансерыд кө эз вöв, мый и сёйим? Кыйтöм комтö?

— Ладнö, — бурасис Илля. — Кольччам кө и, — кольччам. Тэнад — ва, менам — пес. Ывлаас нинёмла бипурасыны. Страк... Тэ век на тан? Ведрасö кватит, и...

Абу первойысь. Быдөн тодö, мый вöчны. Регыд и пач ломзис, и чайник пузис, платаа пачнад тай абу дыр. Шуисны кык друг первой «бич-пакетон» пайö нуръясьыштны. Мед сöмын пöсь сёян вöли-а. Öгуреч-помидорыд да чипан колькыйд тай сідз нин эм. Коли сöмын «гыöрзöм» водка штоп лэптыны...

Сэки и шыасис Öндрей.

— Кыззы, — шуö Иллялы, — А колöкö, Матвей дядь дорö ветлам? Тодöмысь, öнi сійö керкаас... Көть вөр юсö аддзылам. А танi мый? Съод вөр да ичотик ёль. Ан юысь гаж бырис... Да и стариксö важөн нин эг аддзылöй. Нимкодь лоас сылы...

— Тэ быттьö менсьым думъясöс кылан, — сералö Илля. — Дзик жö тайöс мөвпала вöли...

— А мый эн шу?

— Да вот... Гашкö, мися, мудзин да... Машинаад пукалiгөн.

— Нинём тшебритны! — водзсасьö Öндрей. — Тэ ачыд мед-водз кашкан! Мунам! Но сё граммсö юам нин, пызан кө лöсьöдiм. Гашкö, ГАИ вылö ог веськалöй. А веськалам кө, — мен пöсь ни кодзыд! Тэ öд руль саяс...

— Дру-у-г... — юрнас катлöдлö Илля. — Пикö кө воа, тэысь төлк оз ло!

— Мед тэнö пикö воöдны, колö ёна зильны, — вашъялö Öндрей. — Ачыд водзджык ставöс пикö воöдан!

...Шуöма — вöчöма. Регыд мысти нин ёртъяслөн став көлуй-мöлуйыс машинаын вöли. Ан юöдз тасянь верст комын. Мый сійö машинаыдлы? Тшаква. Стöкан водка бöрад и ловныс кыпалiс: сыыв да мун сöмын...

Эз и тодлыны туйсö. Важ «Комилеспромөн» коркö зымнитлöм гожся вөр туйясыд öнi на шоссе кодьöсь. Кужлöмаöсь тай вöчны! Абу тяп-ляп, талунъя моз... Öндрей сылö, Илля мыйкö нузгö жö... Сылы пель вылас ош тувчылöма.

Матыстчисны Ан ю дорö — да акнитiсны: мый лöма ичотик вөр юыскöд? Ранитчöм зьвер моз ымзö-бузгö-гартчö... Саридз, абу ю. Регыд берегсьыс петас. И тайö юнь төлысьö? Весиг оз эскыссы... Но тайötö ладнö на. А вот Матвейлөн керкаыд — мöдар берегас! Вуджны на колö кызкö. Кос кадö тяпитö он көтöд, буретш керка весьтас визув косыт сяльöдчö. А öнi ваыс, надейнö, морöсöдзыд. Öтитор бур — абу кодзыд, арся кодьыд. Позяс на и бузöдны.

— Тильгунтö он кынты? — сералö Илля Öндрей вылын. — Гöтырыд ульөн сёяс!

— Асьтö мед оз сей-а...— броткөдчö воча Öндрей.— Давай, слөн, пыр нин ваас! Ме видзöдла. Вирыд кө сувтас, горöд, тру-сикöдыд лэпта...

— Ага,— пыр на вашъялö Илля.— Тэ лэптан! Тойыштан кө-а...

Пөрчысисны ёртъяс. Первойөн ваö бузгысис Илля. Бөрся-ныс, полөмпырысь,— Öндрей. Келöны-ыпкöны... Ваыс абу и кöдзыд. Весиг кызкö тешкодъ: шоныд ваа ытва... Помнитны колö. Мöдысь кежлö — внукъяслы сэсся висътавны.

Кыкысь на ковмис öтарö-мöдарö бузöдчывны. Көлуй-мөлуй да ногыяс öти пöрйö эз вуджны. Көть Матвей керкаöдз и кызы метра, со тай, кыр йылас зымвидзö. Сöмын гортас абу көзяиныс? Мыйкö тшын дукөн оз öвт... Жаль, абу кө гортас.

Матвей дядькöд кокни рытпукны. Он и тöдлы, кызди кадыс лэбö. Быдтор йылысь висъталас варов мортыд: мый адзылöма, мый кывлöма... Мужикъяс тайö керкаас тшöкыда волöны. Прöстö сідз, шойччигмоз. Пыдди пуктöны Матвей дядьöс... А сійö кызвын кадсö тан олö, Ан юбокса керкаас. Главнöй — семья эм, гöтыр, челядь да внукъяс. Öти сиктын Иллякöд да Öндрейкöд олöны. Матвейöс семьяыс оз дзерöд, но вот тай — мортсö вөрö кыскö, и пом! Кыз пенсия вылö петіс, а уджавліс лесничöйөн, мед-первой Ан ю бокö аслыс ичöтик керка лэптіс. «Фазенда»,— кызди ачыс шуö. Унджык кадсö тані олö. Рöдвужыд эськö пер-войсö ыззылысны жö, йöз водзас пö янöдан, но сэсся эновтчис-ны. Мöд гөн пö оз пет, лешакыды. Вöрыс пö талы и уджалігас на «гöтырөн да невестаөн» вöлі. Торксьöма кө вежöрыд, он нин веж...

А Матвейлы пöсь ни кöдзыд. Мед больöны нинöм абусö. Лытöм кывъясыд оз вөрзöдны. Мукöддырйи збыльысь мудзан йöзсьыс... То ли делö — вөр-ва! Некод сылі вылад оз öшав, некод овны оз велöд. Сöстöмман весиг думъяснад и пытшкöснад. Мыйкö зэв коланатор гöгөрвоан... И нимкодъ босьтö. И лолыд сувтлö радыдла. И став мирсö окота сывйыштны, жалитыштны...

«Матвей дядь! Матвей дядь!»— керкалань матыстчигмоз горзöны Илля да Öндрей. Но воча некод эз пет. Жугыльмисны весиг кык ёрт. Бруткисны көлуйсö пöварняö, пытшкас пырисны. А сэнi — шоныд! Тöдчö, мый неважөн на пачсö ломтылöмаöсь. Плита вылын чайник чискö, пöртйын на мыйкö эм и...

— Гортас, гортас вöрса лешакыд,— радлö Илля.— Петöма кытчöкö. Локтас...

«Ау, Матвей дядь!— бара горзöны ёртъяс.— Öдйöджык лок, а то удзöдам!»

— Мыйөн нö удзöданныд?— нем виччысьтöг быйкнитіс керка пельöс сайысь көзяиныс, быттö му увсьыс петіс. Дрöгмунлісны весиг Илля да Öндрей.

— Повзöдін, Матвей дядь,— нюмъялö Илля.— Вöрса моз ветлöдлан, шытöг...

— Вöрса и эм да,— воча нюмъялö сійö.— Абу öд карса. Тi-янылысь бузöдчöмтö пыр жö кылі. Весиг видзöдыштi на, кызди юсö ыпкинныд-вуджинныд. Нинöм вöчнытö тай, ытва дырйи кыскасянныд! Гортаныд оз пукавсьы? Вот тодышкала кыкнан-нытö, тöдланныд сэки...

Илля да Өндрей весиг тшөкмунісны: мый нө пө Матвей дядьыскөд лоома? Збыль али мый вөтлө?

— Кхе-кхе... Повзинный, лешак машинаяс? — мудер синъясөн видзөдө сійө. — Серала. Пөрысьмыны куті да сійөн бротка. За-видьта тіян томлунлы. Рад, мый локтінный, век нин гажаджык. А то мыйкө важөн нин эн мыччысьлөй... Час, коткодзувкарысь өти парта сулея кыска, чөскыд сурөн юктөда.

— Миян асланым эм, — сетіс гөлөссө Өндрей.

— Төда, мый эм, — небыдджыка нин шуис көзяиыныс. — Кушөн кө локтінный, збыльысь эськө тодмышкалі. Мый тан баллявны садь юрнад, кор чери кыйны оз позь? Кадтө өд кызкө вины колө! Сулея дорад гажаджык. А черитө тіянлы вичмөдышта, воддза кыйөмсяныыс на эм...

Кокняммис сьөлөм выланыс өртъяслөн. Эз на прөстө локны. Матвей дядькөд гажтөм оз босыт.

А ывлаас өтарө зэрыштө... Лөсьыд эськө бипур дорад пукавны, но тай деливө. Та вөсна и керкаын лои меститчыны. Шоныд, майбыр. Көть трусик-майкаөдзыд пөрччысь, мед нинөм эз мешайт. И пызан тыр — нуръясянтор. Матвей дядь сола чери лэптис, пөжөм пув... Кыськө весиг кос яй вайис: гуджгөй пө... А водзө сэсся өртъяс пызансө тыртисны, нопъяссыныыс быдсяматорсө жө кыскалісны. Зельөдчантортө эз жө вунөдны. Со тай, югьялөны өшинь водзын...

Лөсьыд жө нин вөр керкаад! Гөль олом сійө мужикыслөн, коді оз гөгөрво тайөс: некытчө оз ков тэрмасыны, оз ков юр жуглыны... Уна сө во сайын тадз жө пукавлісны прапөльяс. Оломыс вежис, а вөр керкаыд колис. И водзө коляс, кытчөдз бөрья пусө оз пөрөдны вөрсьыс. А сэсся мый? А сэсся — пом. Бөрья вөр керка пракмунөм бөрын помасяс коми оласног. Страк босьтө...

А керка пытшкын сёрни мунө... Вөляникись, надзөникөн, быттьө тыөдса ва. Ёнджыкасө сёрнитө Матвей дядь, а өртъяс кывзөны. Мөдөд водка доз нин помалөны со, лөсьыдакодь гажмыштісны. Матвей дядьлөн чөскыд сурөдз эз на и воны. Төдөны: водка бөрад крепыд суртө ырситан, — регыд лясмунан. Сы вылө али мый татчө локтісны? Лясмуннытө и гортад позьө. А тані — вөр-ва, тані лабутнөй сёрни...

Нем виччысьтөг Матвей дядь шуө:

— А көні тіян коймөд другный, Рөманыд? Илля-багатыр со тані, Алёша Поповичөс аддза жө, а вот Добрыня Никитичыд мыйкө оз тыдав! Воштінный али мый локтігкостіныд? Али мөдар берегас кольчис, юсө вуджны повзис?

— Эз лок миянкөд, — өвтыштчис кинас гажмөм Илля. — Другөн шусьө. Предайтис. Вежис гөтыр вылас да зятъпу вылас!

— Кыдз? — эз гөгөрво Матвей дядь.

Иллялөн висьтасьөм бөрын пөрысь морт шуис:

— Но и правильно вөчис...

— Кыдз? — өні нин чепөсйис Илля. Сылы юрнас катласис и Өндрей. — Кыдз правильно? Мужикыдлы другыд — медся донатор! Оз быдөнлы збыльнөй другыд сюр! А аддзин кө, — оломтө сы понда сетан!

— Олом се-е-тан... — нерыштіс Илляөс Матвей дядь. Сюся кө видзөдлыны, төдчис, кызди чорзыштіс сылөн чужөмыс, векняммисны синъясыс. — Дзебсяянный кывъяс сайө... Кокни

тадзтö. Сöмын тай олöмьд — мöд пöлöсджык. Ладнö, кывзöй... Висътала öти притча. Колöкö, и кывлнныд нин... Олöмaöсь пö нель друг. Разнöй йöз, но крепыд ёртъяс. Кодсюрö тiян моз жö аслыныс морöсас кулакөн швачкöдлöмaöсь: миянысь бур другъ-ясыс пö вöльнöй свет вылас абу! Олöмöс пö сетам öта-мöд вöсна, ковмас кö. И со öтчыд войын öти друг дiнö тотшкöдчö мöд. Петавлы пö. Ёртыс петас. Аддзö: сулалö первой другыс, блед чужöма. Киас мешöк кутö. А мешöксьыд вир войталö. Тотшкöдчысьыд и шуö: со пö, мортöс вии, юрсö керыштi... Тайö мешöкас пö юрыс сылөн... Тöдлытöг пö артмис, аддзи гöтыр вылысь... Эг пö терпит, садьöс быдсөн воштылi. Палялi,— и морт шой. Юрсö керыштсьöма. Мый öнi вöчны? Гашкö, отсыштан шойсö дзебны?

Тан бледöдас мöд другыс. Колö пö милицияö явитчыны... А менам челядь, гöтыр... Отсала,— и менö тшöтш пуксьöдасны...

Нинöм эз шу первой другыд, бергöдчис да мунiс. Локтiс нöшта öти ёрт дорö. Бара висътасис, кыз да мый делöйс. И мöд ёртыд бледöдiс. Отсышта пö эськö, колöкö, но, криста ради, некодлы эн висътав, мый отсалi. Ог кöсйы пуксьыны. Дзöля кага да, гöтыр да...

Бара нинöм эз шу первой другыд, бергöдчис да коймöд дорас мунiс. Тотшкöдчис. Висътасис. А коймöд другыд юалö: «Уна-ö кад коли виöмсянныд?» «Час джын»,— вочавидзö первойыд. «И тэ час джын кытöнкö катласин, баламут, ме дiнö эн лок? Виччысьлы, зыр да лöм босьта!»— горöдiс коймöд ёртыд.

Сэки мешöка мортыд ёрт водзас пидзöс вылас сувтас: прöстит пö, криста ради, верман кö! Прöверитi ме тiянöс, другъясöс... «А мешöкад мый?— юалö коймöдыд.— И вирыс кысь?» «Кöзaöс начки»...— вочавидзö первой другыд.

...Керкаын пуксис чöв-лөнъ. Илля дувгöдчöма öшиньö. Öндрей синсö лэдзöмөн гыжъялö юрсö. А Матвей дядь мудер синъясөн видзöдö ёртъяс вылö.

— Страшнö...— торкис чöв-лөнъсö Илля.— Тадзи оз позь!

— Мый оз позь?— юалö Матвей дядь.

— Оз позь тадзи другтö прöверайтны!— кызкö тешкодя чилöстiс Öндрей.

— А кывйөн шыбласьны, ошйысьны ёртасьöм йылысь... Позьö? Кыв саяд ставыс и вошö...

— Матвей дядь, эн-ö тэ кöза юрсö мешöкас суйлы?— другысь ловзис Öндрей.

— Эг,— нюм сорөн вочавидзис пöль,— Ен мед видзас. Да и уна другыд менам эз вöвлы. Колöкö, öти... И сiйö важөн нин кыз му улын...

Ёртъяслөн кыткö быттьö личалыштiс.

— И век жö ёртасьöмыд эм!— юрнас довкйöдлö Илля.— Ме ог тöд, кызди эськö вöчи, аддзи кö вирöсь мешöктö. Но прöверайтны ёрттö тадзи ог кöсйы! Быдторйын эм тшупöд, кодöс оз позь вöськовтны. Тайö... Другтö унижайтöм артмö!

— Кывъяс, кывъяс...— бара броткöдчö Матвей дядь.

— А мый кывъясыс?— водзасьö Илля.— Мед кывъяс кö! Другтö воштыны кокни, а вот аддзынытö сьöкыд. Ме вот эска, мый миян костын ёртасьöмыс — збыльнöй! Миян та кузя асланым тост эм. Да öд, Öндрей? «Омарлы паныд!» Вай тотшнитчамöй!

---

— Тешкодъ тост,— чуймалö Матвей дядь.— Сизимдас во ола, да эг на кывлы.

— Ставсö олöмас и тэ он тöд,— гаралö Илля.— Час, вись-тала.... Овлöма важöн персидскöй философ Омар Хаям. Талунъя азербайджанечьяс да иранечьяс сійöс асланыс землякөн лыддьöны, некыдзи юкны оз вермыны. Зэв бур да пыдi мөвпъяс аддзан Омарлөн гижöдъясысь. Но мен öтитор некыдз оз кажитчы. Омарлөн эм кывъяс, көнi сійö шуö, мый морт костын ёртасьöм оз вермы лоны. Кыдзи тадз? А ми, куим ёрт? Ставыс лöж? Ылöдчöм? Ог көсйи эскыны... Олöмыс рудöдас, пытшкöс сөнъяс орасны... Та вöсна быд паныдасигөн ми «Омарлы паныд» тост лэптам. И öнi көсъя лэптыны!

— Вай, инö...— нюмъялö Матвей дядь.— Винаыд кө эм, тостыд сюрас... Мед либö лоö тiян ног! Ставыс — мортсянь...

Тотшнитчисны, юисны. Матвей дядь включитiс ассъыс нэмöвöйся «Океан» радиоприёмниксö. Мирöвöй аппарат! Му шарсö босьтö. Мыйла талун оз вöчавны татшöм добрасö?

Приёмниксянь кылiс лöниник сьыланног, а сэсся кывъяс...

**В этой жизни безумной не будь дураком!  
Опереться не смей ты на тех, кто кругом.  
Посмотри на ближайшего друга,—  
Он, возможно, окажется злейшим врагом...**

Керкаын быттö зэвтчис сынöдыс.

— Сiя?— чуймöмөн юалiс Матвей дядь.

— Омар,— чуймöмөн жö вочавидзис Илля.

— Правильнöй кывъяс,— нурбыльтiс Матвей дядь.— Тöдчö, мый олöмсö тöдö пиросопыд... Но сьöкыд овны... тадзтö...— сэсся долыдпырысь горöдiс:— Эм ёртасьöмыд олöмас, ёрöмакань! Көнкö да эм! А кыз нö мöд ногыс? Вөрöгъяс мöй ми öта-мöдлы? Мыйла либö и овны? Кутчысьöй морт дорас, отсалöй... Век нин кокныдджык. Но кывнад эн шыбласьöй, кыв саяд эн дзевсьöй... Ёртыд матын и ылын, сiйö эм и абу. Локтас, кор тэд сьöкыд, вошас, кор ставыс бур... Он и тöд, кодi ёртыд... Но сiйö эм! Должен лоны! И öтитор тöдöй: бур вылö — бур, лёк вылö — лёк... Ачыд кө отсавны пищитчан, ёртыд чужас. А коран кө да требуйтан мöдлысь — бөръяыс пышъяс... Водöй сэсся, асылыс суас!

...Чöv-лөнъ керкаын. Шкоргöны мужичöйяс, коймöд вöт вöталöны. Вöт пырыс Иллялы мыйкö петкöдлö водз чуньнас Рöман другыс, мыйкö көсйö шуны... А киас кутö Омар Хайямлысь небöгсö. Абу прав Омар, абу... Ме — тэкöд! Тэ — мекöд! И Öн-дрей — миянкöд, и Матвей дядь... Ставныс — миянкöд...



Любовь АНУФРИЕВА



## Черань везъяс сотчисны...

\* \* \*

Керка өшиньыс Енлөн  
    воссьылö отчид,  
и сöмын асывнас,  
кор кыа сывъясьö  
    садьмысь вөр-вакöд.  
...Чепöльті өшиньысь  
    югыд войтсö,  
И сибöдлі морöс бердö...  
Черань везъяс сотчисны...  
Китыр шонді овмöдчис  
    сьöлöмö...

\* \* \*

Сöстöм синватö окала...  
И ньöти ог яндысь...  
Радейтöмыд яндысьöм оз тöд.

\* \* \*

Зэра ар. Кöдзыд тöv лэбалö  
    му вывті.  
Öти жебиник кор  
    сибдіс менам öшиньö,  
И быттö ловъя лов,  
    корис мездöм...  
...Ме босьті сійöс киö  
    да шонöдышті,  
    сэсся пункті небöг костö...  
...Потанын унмовсис  
    ичöтик кагукыс...  
Юмола лолалöмыс  
    югзьöдіс жырьöс...



---

\* \* \*

Лым чиръяс — еджыдик небөгъяс,  
Эг удитлы лыддыны найös,—  
век сылісны  
ки пыдöсын...

\* \* \*

Ме — бушков.  
Ме ловъя сöмын төв нырас.  
Ме ог яндысь дженьыдик олöмысь.  
Ме шуда.  
Менам эм мездлун.

\* \* \*

Вötаси видз...  
Кылі: кодкö сыркъялö...  
Гашкö, дзоридз?..  
...Асывнас петі  
садьмытöм на паркö,  
Дзирыд лысвасö вöлі  
вольсалöма турун вылö,  
Бördöм шы эз кыв...  
Сöмын öтка лэбач  
повзьöмпырысь  
видзöдіс ме вылö,  
быттьöкö дзебис  
кутшöмкö гусятор...

\* \* \*

Выліö юрös кыпöді  
и друг син водзын  
шондіыс жугаліс,  
быттьö стеклöысь вöлöма...  
Лöз енэжыс потласис уна пельö...  
...Тайö миян торъялöм вöсна.

\* \* \*

Öшкамöшка озыр  
уна рöма вөнъясөн,  
Турунвиж бантыс медся дона  
и мусаник меным,—  
тайö тэнад  
синъяслөн рöмыс...

❖ ❖ ❖

## Кык рыт

### П Ь Е С А

«...Олөмыс абу ёна шуштөм».

### ВОРСЫСЬЯС:

ВАСЬ — олөма морт, крестьянин.

ПАЛАДЬ — сылөн гөтыр.

МАРПА — налөн суседка, ар нелямына.

ВИТЮК — Марпалөн пи, улыс класса школьник.

ТАНЯ — почтальон, том нывка.

ШКУРКО — военкоматса: ён вир-яя, гөрд чужөма морт.

### ПЕРВОЙ РЫТ

Вөчсьö грездын, Вась да Паладь керкаын. Вескыдвылас — посводзö öдзöс, вешалка, диван; пельöсас пач да лабич. Шуйгавылас — öшиньяс, ыджыд пызан да некымын джек; ен пельöсын камод; камод вылас шкатулка, вичкоса небöгъяс; ен джаджъяс важиник, пемыд öбразъяс. Вескыда — дозмук шкап, ичöt пызан да ичöt лабич; пызан вылас банкаяс да мукöд дозмук, лабич вылас ведра ва да кружка. Сэн жö мöд жырийö öдзöс. Джоджсö вольсалöма джодждöраясөн, стенас öшало балалайка, öшинь вылас дзоридзъяс.

Төв. Рөмдö. Пызан сайын пукалö Вась да мыйкö гижö кыз тетрадьö. Лэптылö юрсö, мөвпалö, бара тэрмасьöмөн гижö. Мыйкö шöпкöдö вомгорулас. Помалö гижны, орöдö тетрадьысь листсö, матыстчö öшинь дорö да син пырыс нуöдö... Пырö Паладь, киас лысьтысян ведраа. Сийö ляпкыд тушаа, гöгрöс чужөма; пупайка улас гөрдөв рөма, песни дзоридза платтьö да руд вурунысь состөм ковта; юр вылас веж рөма чышъян, көрталöма баябöжланьыс; кокас вурун чөрöс.

ПАЛАДЬ. Мый нö битөг пукалан? *(Биасьö.)*

ВАСЬ *(шеныштö кинас, дзебö гижöдсö пальто зептас)*. Аски карö лэччыла, колö мыйсюрö Выль во кежлö ньöбны.

ПАЛАДЬ. Ветлы. *(Пуктö ведрасö ичöt пызан дорö, пөрччö пупайкасö.)* Яблök да кампет Витюклы ньöб... Каникул регыд лоö. Да пызтьö эн вунöд, пöжасьны нинöмысь. Ставсö гижин?

ВАСЬ. Гижи ставсö, ог вунöд.

Паладь босьтчö сöдзöдны йöвсö банкаясö. Вась восьлалö жырийд öта-рö-мөдарö, сэсся босьтö балалайка, пуксьö пач дор лабичö да юрсö пöлыньтöмөн нора, негораа нюжöдö:

Пуö-дзоридзалö льöм,  
Пöльтö муса руөн.

Вичмис нимкодясьны нэм  
Рышкыд, гөрөм муон.

Вичмис чужны войвылын,  
Коми парма шөрын.  
Кевма: бөръя оланін  
Тані жө мед вөлі.

Вылам пуктöй ыджыд из,  
Лөсавтөм да вуштөм.  
Изъяс гижöй: «Олөмыс  
Абу ёна шуштөм».

Пыркнитö юрнас, сьылö гораджыка.

Изъяс гижöй: «Олөмыс (да)  
Абу ёна шуштөм».

Лэптö юрсö, мый вынсьыс, ярмөмөн кучкö сөнъясас, да шогпырысь  
авзөмөн, коми-роч сорөн сьылö водзö.

Эк, раз, да ещö раз (да)  
Чөвтöй, чөвтöй пернапас!  
Эк, раз, да ещö раз, (да)  
Ещö уна, уна ра-аз!..

ПАЛАДЬ (*дугдылö сöгзöдгыны, горöдö Васьлы*). Ланьт нин!  
Тырмас йöйтавныыд!.. Менö аскöдыд жугöдан!.. Бурa ворс!

Вась дугдö сьывны, ньöжйөнникөн пуксьö усьпаньвыв, бара пöлынтьö  
юрсö да ворсö лабутнöйджыка нин...  
Тотшкöдчөмөн пырö Марпа, киас тыртөм банка. Вась оз кыв, водзö  
ворсö...

МАРПА. Бур рыт.

ПАЛАДЬ. Чолөм, Марпа. Талун стöч веськалін: нөрöвительшт  
неуна, помала нин... (*Ноксьö бөръя банкаөн.*)

МАРПА. Паладь тьöt, кыан он эськö Витюклы чужан лун  
кежлас свитер? Ме öд мынтыся.

ПАЛАДЬ. Кыа, дерт. Сылы вед ыджыд оз и ков... А вуруныд  
эм?

МАРПА. Эм. Нарошнö том баяös шыри, мед нигөн вурун вöлі.

ПАЛАДЬ. Вай, сідзкö. Вежон мысти дась лоö...

МАРПА. Но, сёрөнджык либö пырала...

ВАСЬ (*дугдö ворсны, агдзö Марпаös*). Марпа, көні нö пиыд?  
Волас оз талун?

МАРПА. Регыд локтас, öні пока уроксö велöдö. Аски пö  
контрольнöй налөн да.

ВАСЬ (*ловзö. Ошкөмөн, нюмпырысь*). Зэв öд сюсь. Ставсö  
удитö! И школаас, и балалайкаөн со тэрыба нин ворсö. Молодеч!

МАРПА. Молодеч эськö да, тиянлы мед оз мешайтчы-а?

ПАЛАДЬ. Дугды! Мешайтчö пö... Мед көть лунтыр олö. Миян-  
лы, пöрысьяслы, зэв нимкодь. Асланым внукуыс абу да... (*Пöдлалö  
йöв банкасö капрон вевтөн да ышловзö.*)

МАРПА. Пиныд эз на гөтрась?

ПАЛАДЬ (*скōракодъ броткōмōн*). Эз на... Оз тай тэрмась...  
Пыр на велōдчō да... На, босьт йōвтō.

МАРПА. Аттьō эськō, но деньга эз на сетны да энō дивитōй.

ПАЛАДЬ. Ваян, кор лоō...

**Марпа петō. Паладь ноксьō плита дорас, гольōдчō дозмукōн... Недыр  
мысти пырō Витюк. Пōрччысьō да пуксьō Васькōд орччōн. Вась кутлō  
сйōс пельпомōдыс.**

ВАСЬ (*паськыд нюмōн, мелiа*). Но, Витюк, кыдзи олан-вылан?  
Мый выльыс школаад?

**Паладь нюмъялōмōн босьтō дозмук шкапысь яблōк, чышкалō ки чыш-  
кōдōн.**

ВИТЮК (*тшапа*). Бура ола... Школаын мойд велōдiм.

ВАСЬ. Кутшōм нō мойд?

ВИТЮК. Пушкинлысь.

ВАСЬ. Но, Пушкинлысь?! Ме мойдъястō радейта жō!.. Кōсьян  
кō, ōтикōс тэныд мойда? Шнич выль на! Повтōм вōралысь йы-  
лысь.

ВИТЮК (*окопапырысь*). Кōсья!

ПАЛАДЬ. На, Витюк, яблōк сйō. (*Сетō яблōк ga водзō ноксьō  
гортса уджъяснас.*)

ВАСЬ (*кызōктыштō*). Но, кывзы!..

**Ворсōдчигмоз петкōдлō висьталанторсō, весиг чеччылас да жыр кузяыс  
восьлалō, шенасьō кинас. Витюк пукалō лабич вылын, йирō яблōк, но  
тшōкыда вунōдчывлō йирнысō.**

Важ кадō олiс-вылiс Опонь зон — медся бур вōралысьыс да  
чери кыйысьыс Коми пармаын. Воис кад Опоньлы гōтрасьны.  
Дыр корсис сьōлōм сертиыс мусуксō. Уна грезд да пōчинōк  
кытшовтiс, но некысь эз аддзы. Кыдзи шуласны, корсис ылысь,  
а вōлōмкō, да ныр улас...

Ōтчыд сйō лэччōдiс карō Горш купечлы мешōк тыр ур ку.  
Купеч ордсьыд и аддзис Уляна нылōс да пырысь-пыр радейт-  
чис. Тōдмасисны: Уляна бать-мамтōг кольлōма, а Горш купеч  
вылō уджалō нянь-сов да оланiн вōсна.

Кутiс корны Опонь купечтō: «Сет Улянаōс ме сайō верōс  
сайō». А купечыд и шуō, тэ пō, Опонь, висьталōны, медся бур  
чери кыйысь матiгōгōрас. Вай пō тэ меным Иля лун кeжлō си-  
рōс кый, да мед пō Уляна пōжалас сыысь черинянь. А чери-  
няныыс пō мед лоас пызан кузя. Шуис тайōс Горш купечыд —  
быттō пуртōн вундiс!

ПАЛАДЬ. Со ōд кутшōми! Горшыд горш и эм!

ВАСЬ (*гōвōля*). Мый вōчан? Колō Опоньлы сир кыйны. Сōлiс  
пыжас да катiс Сыктыв кузя Мыртыноō, кōнi сълōн куим гымга  
вōлi вōйтōма. Лэптiс медводдза гымгасō — чунь кузьта ёкыш  
шeдōма... Лэптiс мōд гымгасō — ки пыдōс ыджда ляпа тiркъялō.  
Лэптiс коймōд гымгасō — сой кузьта кымын сир. «Гашкō, таысь  
чериняныыд и артмас?» — мōвпыштiс Опонь. Босьтiс сиртō да  
кōсйō нин пестерас лэдзны, друг сирыд и шуō Опоньлы морт

гөлөсөн: лэдз пө менө, Опонь, ме пө тэныд служита на. «Кызд нө ме тэнö лэдза?— шуö татчö Опонь.— Меным Горш купеч ордö оз позь черитöг лэччыны, аски öд Илля лун! Черинянь тшöктис пöжавны, да мед пö пызан кузьта вöлі, а пызаныс сы- лөн! Керка кузьтаыс! А керкаыс — ачыд тöдан — купеческöй!» Сирыд и бара корö: лэдз пө менө, Опонь, лоас пö тиянлы кузь чериняныд... Жаль лои Опоньлы сёрнитысь сирыд, лэдзис ваö. Уйкнитис мöдыс, и абу.

Пуксис Опонь берег дорас да шогö усис: йöй пö ме, йöй, лэ- дзи ассым шудöс, пörъяліс менö сирыд. Чериняньтöг Уллянакöд колим...

Юас лөнъ ваыс друг вабергачөн пондіс гартчыны, да вабергач шörсьыс петіс ныв, веж кузь юрсиа да зарни юркытша! Да еджыд киас нылыд кутö нитшкасьöм вужля, мыччö сійöс Опонь- лы: «На, Опонь, босьт тайö вужлясö, ну Уллянаыдлы, мед пöжа- лас черинянь. Да кор пöжалас, мед пызан шöрас чериняньсö пуктас, а кор пуктас, мед синсö куньöмөн куимысь клопнитас ки пыдöснас...»

Опонь ставсö вöчис сідзи, кызд Васа сар-ныв велöдіс. Пöжа- лісны найö Уллянакöд вужлясьыд черинянь, босьтісны пач под- йысь да пуктісны пызан шöрас. Куимысь клопнитис Улляна синсö куньöмөн — гым-чард швачкис муö, пемдіс ывлаыс, а кор бөр югдіс, аддзисны, мый ичöt чериняныд пызан кузьта лоöма! Да пöжасьöм чериняньсьыс ыджыд сир мыччысьöма — юрыс öти пызан помас, а бöжыс мöдарас! А дукуыс! Кывтö нылыштан!..

ПАЛАДЬ. Со öд кутшöми вöлöма Васаыд... Веськыд руа, эз пörъяв Опоньöс... Но, сэсся мый?

ВАСЬ (Паладылы). Эн тэрмöдлы, кузя на висьтавыны ковмас!.. Но вот, вунöді! (Гыжъялö баябöжсö.)

ВИТЮК. А дукуыс пö — кывтö нылыштан!

ВАСЬ. Ак да, дукуыс... Сэсся Илля лун вöлі... Гöсьтьяс сёйис- ны чериняньсö пöттöдзныс, ошкисны да ошкисны Опоньöс да Уллянаöс, а Горш купечыд и думыштчис, кызди эськö Опоньöс могмöдны, мед ёнджыка сы помысь озырмöдчыны. И мöвпыштис öд со мый: аддзам пö, мый тэ бур чери кыйысь! Видзöдлам пö, кутшöм тэ вöралысь? Мун пö вөрö кайлы да кый меным куим лöзовсьöд низь, да кор ваян, мед низьясыс ловъяöсь вöліны! Тайö пö менам бөръя купеческöй кыв... Шуис, мед ставөн кылас- ны, да кучкис кабырнас пызанас! (Кучкö пызанö.)

ПАЛАДЬ (повзьö, уськöдö кисьыс паньсö). Уп, лешакыд!.. Ка- гасö повзьöдан!.. (Лэптö паньсö да нюмпырысь ноксьö водзö.)

ВАСЬ (лабутнöя мойдö водзö). Коді узис — садьмис, а коді эз узь — лабичын чеччыштісны!

Мый вöчан? Колö куим низь кыйны. Мöдöдчис Опонь вö- рö. Мунö — юрсö öшöдöма. «Кытысь ме куим лöзовсьöд низьсö кыя, да мед сэсся пö и ловъяöсь вöліны?»

Друг кылö: көнкö матын мыйкö трачкöдчö! Матыстчис да аддзö этатшöмтор: ыджыд дзор йöра вожа пипу костö сибдöма, петны оз вермы! «Но,— думыштис Опонь,— яйыд ачыс менö виччысьö! Дыр кежлö тырмас, оз нин ков тöждысьны сёян вöсна. Унджык кад коляс низь кыйны!» Лэптис пищальсö, а йö- ра друг и шуö морт гөлөсөн: эн пö ви менö, Опонь зон, ме пö тэныд служита на. Ме пö пармаын Йöра сар. Эскис Опонь

Йора сарлы, босьтис чер да пөрөдис вожа пипусьыд өтисө. Йора сарыд мездөдчис и шуо: сөв пө меным мыш вылө, мунам низьясыдла. Кавшасис Опонь Йора сарлы мыш вылас, мөдисны. Йора сарлы пармаын быдлати туй: көть нюр вомөн, көть рас пыр, көть вөрса ю вуджны — нинөм оз падмөд! Дыр али өдйө, но коркө-некоркө локтисны куим йыла пөрысь коз дорө. Шуо сэсся Йора сарыд Опоньлы: судзөд пө быд вож йылысь тугансө, но эн пө керав козсө. Сэсся пө дзеб увъяссө нопъяд да ёнджыка көртав ноп вомсө... Да кор пө ваян купечыдлы, мед ноптө ачыс разьө да видзөдө.

Мунис Йора сар, а Опонь мөдис кайны коз вылө. Кайис, а судзөдны туганъяссө оз вермы. Лэччис бөр му вылө, босьтис пищальсө да куимысь и лыйис, куим пуляөн судзөдис йыв помъяссө...

ПАЛАДЬ. Ёсь синма Опоньыд, кымөрө оз лый. Дзик менам шонъянөй бать кодь. Сийө тай уртө век синмас лыйлис, сарство небеснөйө... *(Пернапасасьө.)*

ВАСЬ *(нимкодясьө, вөчө гзоля кост)*. Но! Кывзөй водзө... Локтис Опонь Горш купеч дорад да и шуо: на пө тэныд куим низь, сөмын нопсө ачыд разь. Босьтис купечыд ноптө, разис, видзөдө, а сэн куим коз ув. Ак пө тэ, кызди лысьтан менө, медся озыр купечөс, пөръявны! Мый пө тэ меным вайин? Босьтис да пыркнитис нопсьыс увъяссө джоджас. Коз увъясыд өти здукөн лөзовсьөд низьясө пөрисны да чепөсйисны восьса өшинь пыр! Некод найөс эз нин аддзыв!..

ПАЛАДЬ. Йөй купеч!..

ВАСЬ. Шогө уси купечыд. Но вөчны нинөм. Колө купеч кывтө кутны. Корис Уллянаөс да шуо Опоньлы: босьт пө, инө, Уллянаөс верөс сайө, но медводз висьтав, кытысь коз увъястө вайин?

Висьталис Опонь, мый куим йыла коз пу йылын низьяс быдмөны... Вөтлис Горш купечыд найөс, весиг Улляналы удждонсө эз мынты. Кызд вөлис важ платтьөа, сідз и ковмис петны купеч ордысь.

ПАЛАДЬ. Ад горшыд!

ВАСЬ. Катисны том гозъя пыжөн Сыктив юөд, аддзисны мича ыбъяса вөр да сувтисны сэтчө. Лэптисны керка, нимтисны Вых гортөн да кутисны овны шудаа да гажаа.

Горш купечыд сы кадсянь нөшта ёнджыка на горшлунөн висьмис... Мунис сэсся вөрө коз йылысь низьястө судзөдны, дай вошис... *(Мудзпырысь.)* Сідз тай висьталөны-а юркарын. *(Пуксьө лабич вылө.)*

#### Кост.

*(Витюкы).* Но, кажитчис эз?

ВИТЮК. Выхгортсө Опонь да Улляна, сідзкө, и панисны?

ВАСЬ. Вөломкө, сідз... *(Кост.)* Вай, Витюк, балалайканад ворсышт. Мый төрыт велөдм? Ноко... Сямман он?

ПАЛАДЬ. Тырмас кагасө мучитны! Локтөй тшай юыштөй, сөмын на пузис...

ВАСЬ. Позьө и чай юыштны.

Тотшкөдчөмөн пырө Таня. Съөд курткаа да спортивнөй шапкаа, кокас



**Ыджыд, пидзёсдзыс, руд тюни. Витюк сы кості босьтё балалайка, негораа триньгё.**

ТАНЯ. Видза оланнуд! (*Босьтё сумкасьыс письмё.*) Со тай, бара письмё... Мый коть гижё? Кыдзи олё?

ПАЛАДЬ. Лок, Танюк, пукалышт миянкёд... Тшай юам. (*Босьтё письмёсё.*) Пөрччысь вай да пуксьы пызан саяс... Василь, на лыдды письмёсё!.. (*Мыччё письмёсё Васьлы.*) Оз өд вунёд пиукёй, сё зёлёта, тшөкыда гижё... (*Чышкё чышъян помнас синсё да кисьталё тшай.*)

**Куимён пуксьёны пызан сайё. Вась косялё конвертсё, перйё письмёсё, лыддё. Витюк дугдё триньгыны, кывзё...**

ВАСЬ. Дона батё да мамё. Менам ставыс бур. Велёдча око-тапырысь. Регыд экзаменъяс. Прөст кадёй ни өти абу. Кутшөм гөтрасьом?! Ёртасьлі өти нывкакёд, код йылысь тиянлы неважөн гижи, но өні сійё мёд зонкёд радейтчё. Сы бёрын некодос сёлөм сьёрти эг на паныдав. Но и мед, тадзи меным кокныдджык. Кытчөдз университет ог помав, некутшөм муслун йылысь сёрни оз вермы лоны.

Олам бура. Ёртъяскёд көнсюрө уджалам: то фураяс ректам, то вагонъяс. Тöрыт базарё ветлім, ньөбим порсь юр, өні яя шыд пуам. Сёям коть өні пөттөдз!

Гижёй, кыдзи ті оланнуд? Кыдзи дзоньвидзалуннуд? Деньгаыд тырмё али оз? Оз кө — верма неуна ыстыны. Гаж нин быри, дыр эгёй аддзысьлөй да... Ыста ыджыд чолөм Танялы. Гижаннуд, мый зэв бур нывка да. Век пö пыралё, небыд сёлөма да мичаник. Меным татшөмыс и колё. Чайта, регыд аддзысьям... Но, гашкё ставыс... Сёысь окала тиянөс. Кузь нэм да бур шуд. Энөй висьёй. Аддзысьлытөдз. Тиян пи, Вась Лягуша.

**Кост.**

ТАНЯ (*гöргөдгөмөн, нюмпырысь*). Мыйла нимыс татшөм тешкодъ? Лягуша.

ПАЛАДЬ (*скөра*). Мый нө йөй мужикыд вермё думыштны? Нимтіс тай, менө эз юав.

ТАНЯ. Тиянөс ёна радейтё, тшөкыда гижё, оз вунёд.

ПАЛАДЬ. Гижё тай. Со, шкатулка тыр.

ТАНЯ. Мыйла ме сійөс эг на аддзыв? Воывлө коть оз?

ПАЛАДЬ. А-а!... (*Шеныштё кинас.*) Коръясөкө воывлө. Шоча. Пиукёй миян зэв уджач. То практика сылөн, то кутшөмкө экспедиция. Гашкё, став Россиясё нин кытшовтіс... Зэв лабутнөя гижё: кытчө ветліс, мый аддзыліс. Лыддян да, быттё ачыд сэтчөясө ветлан!..

ТАНЯ. Фотографияыс эм?

ПАЛАДЬ. Абу.

ТАНЯ (*шөйөвошөмөн*). Ме муна, сёр нин.

ПАЛАДЬ. Тшайтё нө он юышт?

ТАНЯ. Ыджыд аттё, Паладь тьот, муна... (*Пасьтасьё.*) Став бурсё. (*Петё.*)

ПАЛАДЬ (*уськөдчө Таня бөрся*). Эн дивит, Танюк... (*Сёрниыс водзё оз кыв.*)

**Паладь здук мысти пырö бөр. Уськөдчö Вась вылө.**

ПАЛАДЬ. Лешак тэ öкаяннöй, лешак! Мыйла Таня йывсьыс гижин?! Этша менсьым синваöс кисьтін?! Көсьян нывкасö тшөтш бөрдөдны?.. *(Чышкө синвасö.)*

ВАСЬ *(мыжапырысь)*. Коді төдіс?..

ПАЛАДЬ. Коді төдіс, коді төдіс... Аддзылін, кызди Таняыс гөрдөдіс?.. Лешак... тэ... *(Бөргө сыркьялөмөн, петö мөг жырйö. Вась чабралö письмөсö, шыбитö пач горö, кватитчö кыкнан кинас юрас... Недыр пукалö тагзи, сэсся чеччö, мунö пач горас да бөр босьтö письмөсö, веськөдлө ки пыдöснас пызан вылын да дзебö шкатулкаö. Бара юрас кватитчөмөн пуксьö пызан сайö.)*

**Кост.**

ВИТЮК. Вась дядь, ме муна жö.

ВАСЬ. А, Витюк... Тэ нö тани?.. Көсьян кө, босьтлы сьöрсыйд балалайкасö. Гортад ворсыштан...

ВИТЮК *(рагпырысь)*. Збыль?! Босьтла!

**Витюк öдйö пасьтасьö. Вась окыштö сійöс юрас. Петöны. Кост. Вась нюмъяліг пырö бөр да пач дорын шонтö кисö. Кост. Пырö Марпа.**

МАРПА. Вурунтö вайи, Паладь тьöt! Көні нö тэ?

ПАЛАДЬ *(пыригмозыс)*. Мый нö лөвтан?

МАРПА. Мися, вурунтö вайи, висьтала, а некоді оз шыась да...

**Видалөны вурунсö. Ывлаысь кылö пон увтөм. Увтөмыс кадөн лоö гораджык и гораджык...**

ПАЛАДЬ. Кодöс нö сэні шеваыс новлөдлө?.. *(Видзөдгö öшиньö.)* Кутшөмкө погона морт... А понъясыс, понъясыс?! Миянö и локтö да...

**Кылö тотшкөдчөм. Вась восьтö өдзөссö. Пырö Шкурко, военнöй пась-көма, киняулас кутö папка.**

ШКУРКО. Ме Шкурко, райвоенкоматысь. Со öд мый понъясыд вöчисны! Көинъяс! *(Зильö видзөдгыны мыш вылас.)* Виль бушлатöс кызди кульыштисны!..

МАРПА. Сідз тэныд и колö, вир юысьлы! Этша на курччалісны! Мед көть дзоньнас сөйисны, öкаяннöйöс!

ШКУРКО. Мый нö видчанныд?

МАРПА. Менсьым Мишаöс армияö ловъяөн босьтінныд, а вайинныд цинкын?! *(Чышкө синвасö.)*

ШКУРКО. Ме öд абу мыжа.

МАРПА. Некод абу мыжа, а зонъяс кулөны!.. *(Бөргдзö.)*

ШКУРКО. Быдлаын кулөны. И гражданка вылын, не сөмын армияын. Öти пöртйын пусям.

МАРПА. Видзөдны тэ вылө ог вермы!.. *(Көсйö кучкыны кабырнас.)*

ШКУРКО *(кватитö киöдыс)*. Но-но!

МАРПА *(Шкурколы)*. Ак, тэ... *(Көсйö кучкыны мөг кинас, но Шкурко удитö кватитны и сійöс, та пöрйö уськөдö папкасö.)*

Марпа көсйө мездьсыны: нетшкысьö, но оз вермы — сэсся бөр-  
дигтыр небзьö вир-яйнас. Шкурко лэгзö кисö.)

МАРПА. Видзöдны ог вермы... (Бöргö.)

ПАЛАДЬ. Марпуш, эн бöрд... (Кутлö, малалö мышкöдыс, нуöгö  
мöг жырьö.) Мунам, турунön юктöда... (Петöны.)

ШКУРКО (лöсьöдыштö бушатсö, лэптö папкасö). Но вот, и  
уджав та бöрын...

ВАСЬ (кольöгö аньясöс öгзöсöгз, сэсся бергöдчö Шкурколань,  
скöра). Мый нö локтін?

ШКУРКО (перйö папкасьыс кабала). Тані олö Осипов Лягуша  
Васильевич? Көнi сійö?

ВАСЬ (шöйöвошöмön). Тані эськö да... Карын велöдчö... Сэни  
олö...

ШКУРКО. Эг гөгөрво! Тані али сэни?

**Кост.**

ВАСЬ. Некутшöм Лягушаöс ог тöд... Абу татшöмыс...

ШКУРКО. Тэ меным эн бызгы нинöм абусö! Висьтав, көнi  
питö дзебаннэд?! Куим повестка нин мöдöдi!.. Кодi тiянöс дорйы-  
ны кутас?.. Конституциян мый гижöма?.. Почётная обязан-  
ность!.. Гөгөрвоин?!

**Пырö Паладь.**

ПАЛАДЬ. Ноко, энö горзöй! Лягуша университетын велöдчö.

ШКУРКО. Сэни некутшöм Лягуша абу. Ми корсьлім нин.  
Абу сэни татшöм студентьс. Абу-у!.. Кытчö дзебаннэд?

**Кост.**

ПАЛАДЬ. Корсьöй либö. Ог тöд, мый тiянлы колö.

ШКУРКО. Мед бурön военкоматö локтас. Оз кө лок, пуксьöда  
дзескьдінö. (Грöзитö чуньнас.) Пуксьöда. Мед аски жö локтас.  
На, босьтöй повесткасö. (Пуктö пызан вылö кабала.) Кырымалöй  
тані. (Петкöглö чуньнас.)

ПАЛАДЬ. Ме ог-а. Некутшöм Лягушаöс огöй тöдöй. Мöдлаысь  
корсьöй.

ШКУРКО (мычкöгö кабаласö Васьлы). На, кырымав.

ВАСЬ. Ог. Мед ачыс кырымалö. Ме нинöм ог тöд.

ШКУРКО. Ставнытö пуксьöда!.. Ок и пуксьöда! Некод ар-  
мияö оз көсйы... (Видчигтыр петö.)

**Ывлаын бара ёна увтöны понъяс. Кадön увтöмыс ылыстчö... Вась  
скöра ветлöдлö жырьöд, мыйкö броткö. Пырö Марпа, гөрд синма,  
пыктöм чужöма.**

МАРПА. Гортö муна... (Зыралö морöссö. Ышловзьö.) Уп... Бара  
Мишукöй син водзö, быттö ловъя, сувтліс... Муна... Став бурсö.

**Петö. Паладь петö жö кольöдны. Вась места вылас кынмöмön шога  
видзöдö аньяс вылö, сэсся жöдзö керкаöдыс... Пырö Паладь, матыстчö  
öбраз дорö.**

ПАЛАДЬ (пернапасасьё). О Господьё, спаси и сохрани...

**Чөвтө пернапас да петө мөд жырьё. Вась сувтлө здук кезлө, жөдзө, скөралө.**

ВАСЬ (аслыс). Лягуша налы ковмис! (Кост.) Армияё!.. (Кост.) Одайджыка вины көсьяныд?! (Восьтө өдзөс, петкөдлө пуга.) Со тияны Лягушаыд! (Пөдлалө өдзөссө. Горзө.) Абу!!! Отнаным ми, отнаным!!! (Босьтө шкатулкаыс письмөяссө, шыблалө жыр пасьталаыс, сералө лёкыс.) Со тияны, со!!! Абу пиукөй, абу!.. (Бөргө и сералө сыркьяломөн.) Лягушаёй... абу!.. Нинөм абу!.. Нинөм... (Пуксьё пызан сайё, тойыштө шкатулкасө джоджө, ачыс гыргдзаён водё пызан вылас да бөргө.) Нинөм абу-у...

ПАЛАДЬ (повзёмөн пырө, уськөдчө Вась горө). Тырмас нин йөйтавныыд. Ноко, эн бөрд. (Кутлө, малалө мышкөдыс, сетө кружка ва.) На, юышт... (Кост.) Йөй мужик, дзик йөй... Некод сийөс оз босьт! Йөйыд, мый вөсна шогсян... (Кост.) Но, лөнъыштін? (Кост.) Дыр эн пукав, аски автобусыд водз петө... (Малыштө верөссө юрөдыс, мунө узыны.)

Кост.

ВАСЬ (лэптө юрсө, шөйөвошөмөн видзөдгө гөгөр, пидзөс вылас лэгзчысьөмөн чукөртө письмөяссө шкатулкаё). Пиукөй быдлаын вөлі, быдлаын... Со, Изсянь письмө... А тайө?.. Курилысьыс... А тайө?.. Туркмения... Сэні ме армияын вөлі... А тайө кытысь?.. Чукотка... Шпицберген... Быдлаті ветліс, унатор адзыліс пиукөй... (Сулалө пидзөс вылас. Пөдлалө шкатулкасө да малалө вевтсө. Видзөдгө залө.) Унатор адзыліс... пиукөй... (Мудзпыр өшөдгө юрсө.)

## МӨД РЫТ

**Бөчсьё сэні жө, мөд лунө рытланыс. Муртса рөмдыштө. Керкаын Паладь өтнас. Пукалө өшинь дорын, кыө свитер... Кост. Кост дырйи кылө балалайкаён нора ворсөм... Ворсөмыс друг помасьё: кылө өдзөсө тотшкөдчөм... Пырөны Марпа да Витюк.**

МАРПА. Видза олан, Паладь тьөт! Ыджыд могөн тиянө. Витюк юрсө дойдөма да, Криста ради, отсышт... (Витюкы.) Кымыныс нин шулі, эн, мися, лэбав! Оз өд гөгөрво.

ПАЛАДЬ. Пөрчысьёй либө... (Матыстчө на гинө, босьтө Витюкөс кыкнан кинас юрөдыс да видзөдгө синмас.) Да-а, синмыд лёк. Кыдзи нө дойдін?..

ВИТЮК. Гөра йывсянь ислалім... Сэсся котөртиг вильді... Уси да юрөн кучкыси...

ПАЛАДЬ. Юрыд висьё?

ВИТЮК. Висьё.

ПАЛАДЬ. Висяс, дерт. Со, синмыд кутшөми...

**Паладь матыстчө образ дорө, кевмысьё да пернапасасьё. Сэсся босьтө вурун сунис да пуксьё лабичө.**

ПАЛАДЬ (Витюкы). Лок, пуксьы джоджас ме водзө... Мышнад мелань... Час, мерайтам... (Нуөдгө суниссө гетинкалөн юр

гөгөр, көрталө плеш шөрас. Сэсся босьтө суниссө кыкнан кинас пель вестас, а пиньнас сунис помъясөдыс, да кыскө юрсяньыс, паськөдө да петкөдлө Марпалы өшйөм көв пөвсө.) Со мында вешйөма... (Витюкы.) Пукты юртө пидзөс вылө. Кито джоджас лэдз, эн крестав... Но, бур...

Паладь мыйкө шөпкөдөмөн (лыддьө нимкыв, но прамөя нинөм оз кыв, сөмын: «Сарица небесной... Пресвятая богородица... Иисусе Крестосьё... Раб божйө Витя...») ки пыдөснас дыркодь, кокныдыка клопайтө зонкаөс плешкас... Сэсся малыштө чужөмөдыс, плешкөдыс, пельпомөдыс; шөпкөдөмөн шамралө чуњьяснас пель йывъяссө... Босьтө суниссө да бара мерайтө юрсө... Сэсся бара веськөдө юрсө да выльысь мерайтө...

ПАЛАДЬ (Марпалы, гөвөля). Со, видзөд... (Петкөдлө көвсө.) МАРПА. Слабог... (Пернапасасьё. Чышъян помнас чышкө синсө.)

ПАЛАДЬ (Витюкы). Витюк, өні диван вылө вод.

Витюк водө. Паладь шебрөдө морөсөдзыс. Сэсся бара мыйкө шөпкөдөмөн туша вылітыс өтарө-мөдарө новлөдлө кыкнан кинас, быттьө куш аслыс тыдалана гыяс шыльөдө.

ПАЛАДЬ (Витюкы). Но, өні шоналін?

ВИТЮК. Да.

ПАЛАДЬ. Куйлышт тадзи. (Марпалы.) Мед куйлыштас, ме мөс дорө петала, турунсө содтышта...

Паладь петө. Кост. Марпа пуксьө диван помас, видзөдө пи вылас.

ВИТЮК. Мама, збыль-ө висьталөны, мый Паладь баб төдысь?

МАРПА. Висьталөны тай.

ВИТЮК. Школаын кывлі: төрыт пө көсийөмны писө армияө босьтны, да абу сюрөма: дзебөны пө.

МАРПА. Оз өд ков быд сөрөмлы эскыны. Пиныс карын велөдчө.

ВИТЮК. Висьталісны на, мый пиныс абу морт — лягуша юра пө сійө!

МАРПА. Бызгөны.

ВИТЮК. Да пө... Паськыд вома да гөгрөс синма! Войнас пө синмад видзөдлас кө — садьтө воштан! А военкоматсаыд пө шуөма: мед көть и лягуша юра, но армияө босьтам!

МАРПА. Ланьт. Чөв куйлы. Оз позь тадзи сёрнитны. Паладь баб зэв бур морт: ставлы отсалө. Мед больгөны, мый көсийөны, а тэ эн ляксы, ас юрнад ов... Висьө на юрыд?

ВИТЮК. Оз нин.

МАРПА. Но и бур... Буракө, локтө Паладь пөчыд... Мөдөдчам да, ёнджыка аттьөав, кузь нэм да бур шуд си...

**Пырө Паладь. Мыськө кисө. Видзөдө Витюкы синмас.**

ПАЛАДЬ (Витюкы). Но, өні синмыд дзык мөд... Чеччы сэсся... Юрыд оз бергав?

ВИТЮК (чеччө). Оз... Ыджыд аттьө, Паладь баб. Кузь нэм да бур шуд тэныд.

ПАЛАДЬ (ньюмунö). Видз Кристос. (Чöвтö зон вылö перна-  
лас). Талун эн котрав нин, аскиöдз гортад ов.

Госьтьяс пасьтасьöны, көсьöны петны.

МАРПА. Ыджыд аттьö дай став бурсö... Мый эськö и вöчим  
тэтöг? Бара на отсалін. (Петöны.)

ПАЛАДЬ. Енмыс видзас. (Пöдлалö ögzöссö.)

Паладь бара пуксьö öшинь дорас, но оз нин кысьы, прöста пукалö  
мөвпалігмоз. Кост. Кост дырйи бара кылö балалайкалөн нор шылад...  
Паладь копыртчö öшинь стеклöлань, видзöдö ывлаас. Шылад помасьö.

ПАЛАДЬ (аслыс). Кöні эськö бара и лешакыс довъялö-а?...  
Кадыс ньöти оз мун. Пемдö нин... Письмөсö кöть лыддыштны...

Чеччö, биасьö, босьтö камод вылысь шкатулка, недыр лукйысьö,  
перйö письмö, көсьö лыддыны, но оз удит: пырö Таня, көдзыдысла  
гöрдöдöм бан бока.

ТАНЯ (гажаа). Паладь тьöt, пенсиятö вайи! (Пöрччö кепысьсö  
га зыралö кияссö.)

ПАЛАДЬ. А, Танюк?! Пыр, пыр, сё зөлöта! Со, öтнам пукала...  
Лок, пукалышт мекöд. Дзик гажтöм...

ТАНЯ (пöрччысьö, пуксьö пызан сайö). Лыддысян мыйкö?

ПАЛАДЬ. Да-а. Кадыс кöть öдйöджыка кольö. Көсьян кө,  
лыдды. Ме рыгланыс омöля аддза...

ТАНЯ (босьтö письмөсö, лыгдьö). Видза оланныд, дона батьö  
да мамö. Ме бара экспедицияын. Ветлöдла сиктьясöд, чукöрта  
фольклор. Ыста тiянлы öтитор, шусьö: «Гöна ныв да Варыш ке-  
рöс». (Ньюмунö га водзö лыгдьö.)

Зэв важөн тайö вöлі. Олісны öти грездын том гозъя. Чужис  
налөн пи. Зэв шурыд. Сы вöсна пуктiсны сылы Варыш ним.  
Быдмыштіс Варыш да зэв бура кутіс вöравны, весиг батьсö  
панйис.

Но вот. Коркö и тшыг во лоис. Ур да пöтка вöрас эз вöв. Шу-  
ис Варыш мунны Из сайö вöравны. Босьтiс неуна кос яй, китыр  
шыдöс, воысаліс пищальсö и мöдiс...

Издö öти лунөн он вудж. Ковмис сылы войковтны рудöг улын.  
Лöсьöдiс бипур, вольсаліс коз лагъяс и водiс. Друг кылö —  
кодкö рудöг пыдöсас ойзышталö. Лэччис сэтчö Варышыд, а ви-  
дзöдö да, кутшöмкö гöна вөрпа куйлö. Матыстчис да аддзö —  
Гöна ныв! «Буракö, тшыгла кулö»,— думыштiс Варыш. Вайис  
нывтö бипур дорö, водтöдiс коз лагъяс вылö, шоныд тшайөн  
юктöдiс, сэсса кос яй мыччис. Гöна нылыд кватитiс кос яйтö, да  
мöдiс тай ён пиньнас йирны да нетшкыны. Сёйис, сэсса быттö  
и ловзис. Кань моз Варыш дiнö ниртчö да мургö. «Со öд,— ду-  
мыштiс Варыш,— дзик гöна, а кутшöм шань! Мем кө татшöм  
руа гöтыр сюрö — ок и олім эськö ськөд öти лолөн нэм чöж!»  
(Таня бара нюмгö.)

Асыводз чеччис Варыш — Гöна ныв узьö на. Колис сылы  
став кос яйсö да мыйтакö шыдöс; бипурö пес содтыштiс и муніс.  
Вуджис Изтö, кутіс вöравны — и чуймис! Сэтшöм уна кыйдöссö



эз на аддзыв. Быттьö найö асьныс сылы паныд локтöны. «Та-  
тшöмыс ачыс оз вермы лоны, кодкö отсалö?»— думыштис Варыш.  
Сэсса öтчыд казялис — вöлөмкö, Гöна нылыд отсалö, повзьöдлö  
вöрса олысьясöс Варышлы воча...

Воис кад гортö мунны. Чукöртис Варыш став прöмыссö, мö-  
дöдчис да öдвa-öдвa Из вылö кавшасис. Кутис нин лэччыны, да  
кыськö зэв ён төв ныр сы вылö уськöдчис, йöткыштис гöра ув-  
лань. Лым, да вөр, да енэж — ставыс öтгудыр бергалис Варыш  
син водзын, кытчöдз садьыс эз вош. Палялис рудöгын нин. Куйлö  
сийö аслас куяс пиын, а бердас Гöна ныв узьö, шонтö Варышöс  
пöсь вир-яйнас. Сы кадсянь найö эз нин торйöдчывлыны: кутисны  
гозийон овны.

Но вот. Воисны найö Варышлөн гортас. Сэни ыджыд зык лои.  
Вöтлöны найöс, оз лэдзны грездын овны. Овмöдчисны важ, пе-  
дзов пывсянас, дзик ю дорын. Öтлаөн вöралисны. Зэв бура  
олисны, кытчöдз Варышöс керöс улын ош эз ви. Дыр бöрдис Гö-  
на нылыд кувсьöм Варыш дорын, сэсса вөрö мунис.

Кöни Варыш кувсис да Гöна ныв бöрдис, öни мусьыс югыд  
ключ петö. А каян кö Варыш керöс йылö да бурджыка видзöд-  
лан ыліса вөр вылö, Сыктыв ю сайö, то казялан сэтысь, быттьö  
Гöна нылыд куйлö, мыгöрыс сылөн тöдчö ыліас: тöдчö юр, нёнъ  
да кокъясыс. Гөн пыддиыс сук вөр быдмö. Нэм чöж видзöдö-  
ны öта-мöд выланыс Гöна ныв да Варыш керöс. Эз и вермыны  
найöс дзикöдз торйöдны. Коръясöкö Гöна ныв нюмъялö, а коръ-  
ясöкö и зэв зумышөн овлö. Сэки, бурджык, вөрö эн кай, гортад  
пукав: лёктор вермас лоны... (Кост.)

ПАЛАДЬ (ышловзьö). Дзик тай ме йылысь гижöма...

ТАНЯ (ышловзьö жö, бледöгö, пукалö жугыля... Надепырысь).  
Буракö, регыд татчö локтас?..

ПАЛАДЬ (быттьö оз кыв, нюмпырысь). Вай, Танюк, ме тэнö  
вердышта. (Дзебö письмöсö шкатулкаö). Васька бара карö лэч-  
чис... Гортын оз пукавсьы сылөн, пыр көнкö жöдзö.

ТАНЯ (шмоньпырысь). Пöдруга али мый нин сэтчö лöсьöдис?

ПАЛАДЬ. Некод сылөн абү... (Шуга гöлөсөн.) Куш менö ра-  
дейтö!.. Эз кö радейт, важөн нин мунис... (Нора.) Ме öд сьöктыны  
вермытöм... (Ышловзьö.)

ТАНЯ (чуймöмөн). А пиыд?

ПАЛАДЬ (öвтыштö кинас). Некутшöм пи миян абү.

ТАНЯ (повзьöмөн). А письмöясыс?!

ПАЛАДЬ. Васька ачыс гижö, сэсса карсянь мöдöдö...

**Таня бара жугыльтчö, öшöдö юрсö. Паладь малыштö сийöс юрöдыс.**

Мыйкö, видзöда да, нылöй, сьöлөмтö Лягуша вöсна косьтö-  
дан?.. Вунöд!.. Кывзы, мый висьтала... Кызь во сайын... Буретш  
уджалі ме роддомын. Джоджсö чышкалі, лым весалі да урнаысь  
бумага петкöдлі-соті... Сійö онас миянлы куш пипу пес вайисны,  
пачтö ломзьöдны зэв делö вöлі. Куті удж вылысь бумагасö ваяв-  
ны... Васька и аддзис на пöвстысь печата кабалатö... Кага чуж-  
тöм йылысь... Гижис сэтчö менö да Лягуша пиöс... Думыштис öд  
ним!.. Лягуша?!.. Муна пö сельсöветсаöс чуймöдны!.. Мыйкö пö  
шуасны кö — висьтала, мый пöръясян лун талун... Шмонитны  
кужö-ö!.. А сэни босьтасны да «Свидетельство о рождении» и  
сетасны!.. Сэсса паспортö гижисны!..



ТАНЯ. Өмөй татшөмыс вермө лоны?..

ПАЛАДЬ. Вөлөмкө, вермө... Миян өд, кабалаыд кө эм — тэ морт; абу кө — ... Ачылд төдан — омөлик справка вөсна аминь мында кабинет кытшовтан. Быд кабинетын йөз пукалоны, колана удж вөчөны, а өд сөмын коркө да коркө на колана кабалаыд артмө... А сэки мыйлакө дзик мөд ног вичмис — здукөн ставсө вөчисны!.. Сэсса ми повзим: кабала эм, а мортыс абу!.. А юаласны кө? Кыгчө пө питө дзебинныд?! Со өд мый!.. Ковмис йөз дорын сёрнитны пи йылысь, ылөддыны: то быттьө курортын, то Суворовскөй училищын велөдчө. Матө воим!.. Отчыдысь кө сөран, сэсса сөрөмыд тэнө ытваөн чаг моз нуө, берегө он вермы петны. Быть вöян...

ТАНЯ. Мыйла эськө детдомысь некодөс энө босьтөй? Ме сэн олі да, унаөс челядтө босьталісны?

ПАЛАДЬ. Тэ детдомса? Эг и төдлыв!..

ТАНЯ. Да. Бать-мам аварияын кувсьылісны. Менө детсадйысь детдомө нуисны. Некод рөдвужөй абу да...

ПАЛАДЬ. Аттө, коньөрөй... *(Дзоляник надеяпырысь.)* А көні нө олан?

ТАНЯ. Удж вылысь өти нывка ас ордас лэдзис. Кутшөмкө кад сэні олышта, сэсса кызкө овмөдча.

ПАЛАДЬ *(кевмөмөн.)* Көсьян кө, миянө лок. Местаыд тырмас. Миянлы гажаджык на лоас и...

ТАНЯ *(надеяпырысь, шензьөмөн.)* Збыль босьтанныд?..

ПАЛАДЬ. Збыль, дерт. Көсьян кө, ныв пыдди лоан. Көть өти ловъя лов гу вылө волас коркө, казътывлас миянөс... *(Чышкө синвасө.)*

ТАНЯ *(тэрыба, шөйөвошөмөн.)* Ме ветла, либө, көлуйөс вая... Өні жө!

ПАЛАДЬ *(тшөктөмөн, стрөга.)* Аски ветлан! Удитан на! Не-кыгчө ог лэдз!.. *(Меліа.)* Ужнайтам. Менам чөскыд вина эм, часлы... *(Майшасьө. Көсйө чеччыны, мунны шкаплань — но грут бергөдчө да вигзөдө өшиньө, сэсса дөзмөмөн.)* Кор нө лешакыс локтас-а? Сап пемыд нин!..

**Кыкөн ноксьөны пызан дорын: шөралөны нянь, чөвтөны тасьтгясө шыд. Паладь перйө шкапсьыс вина доз да кык румка. Пуксьөны пызан сайө..**

ПАЛАДЬ *(винасө кисьталігмоз).* Вай юам, мед тэнад олөмыд бур вөлі, эз миян кодъ; мед прамөй верөс сюрас... *(Тотшкөдчөны, юоны. Паньыштөны сёянсө.)* Васькаыд менам мөд мужик нин... Медводдзаысь верөс сайө петі дзик том нывкаөн... Первойсө зэв лөсьыда олім. Сэсса верөсөй кутіс гуляйтны. Код юрнас локтас да менө нөйтө: тэ пө на кодъ жө. Отчылд зэв өна нөйтіс, ме сэки сьөкыд вөлі. Дыр сэсса карса больничанын куйлі. Кагаөй, дерт, прөпадитіс... *(Чышкө синвасө.)* Гортө локті, а сійө кевмө: прөстит пө. Ме прөститі, а сійө бара важ мозыс кутіс нөйтны. Кык во на мучитчи, кыгчөдз ачыс ваө эз вөй. *(Пернапасасьө.)* Сарство небеснөй... Ме, гашкө, водзджык на кулі, но ыджыд мам өна отсаліс. Турунөн да быд ногыс бурдөдіс. Менө тшөтш велөдіс бурдөдчыны... Помнита, скөтсө кор начкалісны, пыр менө велөдіс, көні налөн кутшөм сөн мунө, кызди лыясыс

---

йитчöны... Пемöс да морт вир-ййыд пö öд öткодь... Юрбитны велöдiс и, нимкывъяссö лыддыны да... Сарство небеснöй муса бабöлы, век бур кывйöн казътывла сйöс... *(Кисьталö вина.)* Вай бабöс казътылам... *(Босьтöны румкаяссö.)*

**Друг кильчö помас кылö грым-грам. Гурйыв воссьö öдзöс, пырö Вась. Шапкатöг, лым сюръя кодь. Шуйга киас кутö ньöбасъясöн тыра ноп, веськыдас кыскö выль वोся нейджыд коз. Нопсьыс тыдовтчö кык шампанскöй юр. Ачыс садътöм код. Аньяс сувтöны лэптöм румкаясöн да шöйöвошöмнысла кымöны места выланыс.**

ВАСЬ *(горзö, кучкалö морöсас).* Миянöс некутшöм пуля да снарад оз босьт!.. *(Шеныштö кинас वोьса öдзöсö.)* Со тiяны! *(Бара кучкалö морöсас.)* Миянöс нинöм оз босьт!.. *(Шатласьö, öгва сулалö кок йылас.)*

**Паладь пуктö румкасö, котөрөн пöдлалö öдзöссö, босьтö Вась киысь нопсö да козсö, отсалö пöрччысьны.**

ВАСЬ *(Паладылы).* Лягушаöс армияö колльöдi! Мед служитö!.. *(Горöдö öдзöслань.)* Некутшöм пуля оз босьт!

ПАЛАДЬ *(небыда лöньöдö).* Оз босьт, оз...

ВАСЬ *(бара öдзöслань).* Энлöй! *(Петкöдлö кабырсö.)* Лягушаыд на президентöн лоас!.. Энлöй! Аддзыланныд на кузькину мать!.. *(Лэптö кабырсö вывлань.)* Бөрйысьны на кутам... *(Пласьт усьö джоджö. Кöсйö сувтны, но оз вермы.)*

ПАЛАДЬ. Танюк, лок отсышт! Диванöдзыс кöть нуöдам. *(Нуö-дöны да водтöдöны, вевттьöны шебрасöн.)* Мед узьö. Оз вывтiсö юлы да, öдйö коддзö... Палялас да, ок и радлас жö тэныд! Сылөн öд сы мында видзтöм муслуныс да мелiлуныс — вöян! Гашкö, и Лягушасö вунöдас вочасöн... *(Радпырысь.)* Ой, кутшöм лöсьыд лоас! Выль вотö куимöн кутам празднуйтны!.. *(Кутлö Таняöс, сэсся öтлаын вигзöдöны Вась вылö.)* Дзик öд йöй... Кылан, Василь?! *(Копыртчö.)* Ныв миян öнi эм... Миян ныв!..

ВАСЬ. Ныв?.. *(Öвтчö кинас.)* Бара вöтася... *(Чуймöмөн.)* Ныв? Менам нöшта и ныв эм?! *(Шугапырысь.)* Вö-та-ся-а... *(Узигмозыс нюммунö. Аньяс нюмъялöны жö.)*

**Кылö балалайкалөн шы: перво нориника, сэсся вочасöн гажмö и гажмö.**

ПОМ.



## Сыктывкар—Кудымкар—Перым

### О Ч Е Р К

Коркө важөн, челядь дырйи на, унаысь юавлі ыджыд батылысь: «А эсійö туйыс кытчö мунö?» Юасисö вöрса туй йылысь, кодöс öтияс мыйлакö нимтылісны магистральöн, а мөдъяс Андреевской туйöн. Тайö туй пöлöныс ыджыд баты лэчъяс октыліс. «Сійö мунö зэв ылöдз. Перым крайöдз»,— шуліс ыджыд баты. «А тэ волін сэтчöдз?» — «Эг. Шуа тай — ылын. Арбыд мунны ковмас».

Унатор вуні челядьдыр кадсянныд, а тайö сёрниыс кольöма вежөрö! Ме сэксянь на быттьö висьми öти мөвпöн: коркö босьтны да тайö туйöдыс Перымö мөдны. Көть весиг эг тöд прамöясö, мый сійö Перымыс. Но дивöөн кажитчис, мый позьö кутшöмкö эндöм вөр туйöд воны мөд муö, көні олöны мөд пöлөс йöз.

Та бöрын коли мыйтакö кад... Чужан лунö, гожöмнас, ыджыд баты козьналіс меным велосипед. Дерт, зэв рад вöлі!.. Пырысьпыр казътышті коркöя көсйöмөс да шызьöді вокъясöс Перымлань походö мөдны. Сёян чукöртім ноп тыр. Пуксялім: ичөтджык, двоюродной вок Сашка багажник вылас, ме рама вылас бок ногөн, а ыджыдджык вокöй, Володь, педаль бергöдлö.

Кызкö-мыйкö мунім километр вит, сэсса Володь мудзис. Сувтім шойччыштны.

Зэв жар вöлі, ониш босьтö. Но водзö мөдны на көсьям. И друг тайö здукас туй бокас зэв матын кодкö лёкысь равöстис!

Ми быттьö джөмдім, горшаным сёяныс весиг тасасис. Öта-мөд вылö видзöдлім да кызз тай горöдім: «Ош, ош!», да кызз тай чепөсйим гортлань! Ми двоюродной воккöд котöртам, а Володь велосипедөн ми бöрся, да суöдны оз вермы. А сэсса весиг кольччыны кутіс... Вөлөмкö, чептыс усьöма, а сійö пыр на педальсö бергöдлö. Сэсса, видзöдам да, пöрис.

... Перымöдз ми сійö лунас, дерт, сідзи эг и воёй. Медводдза поход эз удайтчы.

«Но нинöм,— шуи ме аслым,— быдмышта да быть воөдча».

Сійö гожся лунсянныс коли кызь вит во...

Öтчыд ме дорö пырис менам арлыда жö мужичöй. Ме сэки уджалі нин телевидениеын, вöчи быдсяма тöдчана йöз йывсьыс «Войтъяс» передача.

Сійö мортыд висьтасис, мый неважөн ветлöма походö. Велосипедөн. Мунöма кык тöлысьöн Мурмансксянь Африкаöдз. Петкöдліс фотокарточкаяс. Ме сэтшöма ышловзи, сэтшöма веж кутіс петны, сэтшöм лои забеднö — тайö öд вöлі менам мечтаöй, рочөн кө... Но вöчис тайöс мөд морт.

Мортсö шуисны Володя Морозовөн. Сійö аддзис менсьым веж петöмтö да вöзйис мунны сыкöд Москвасянь Парижöдз. Велосипедъясөн жö. «Муна!» — пырысьпыр шуи ме, а недыр кад мысти кывсис, мый менам выль тöдсаыд мунöма Канадаö штур-

муйтны Мак-Кинли гора да сэсса сэтчө, Канадаад, и кольччөма овны.

Бара меным эз удайтчы походө ветлыны!

Дерт, позьö вöлы öвтыштчыны дай вунöдны нинöм абутöм думъясöс, но эз артмы. Мöдарö на, кути шуны аслым, мый олöмыс кольö, а нинöм ог и вöч, мед бöрнас позис казътивны.

Колö, колö мыйкö вöчны — быттö жель мен öтилаö пырöма.

Ме тайö кадö ёна ветлöдлi «Старт-шоссе» велосипедöн. Öтчюд весиг Шойнатысянь Сыктывкарö мöдöдчи войын да öкмысдас километратö вит часöн и вои.

Но юрын куслытöм кодзув моз век на олiс Перым.

Воис нöшта öти тулыс. Ме ньöби выль велосипед, ыджыд ноп, спортивной кöлуй. И век на ог лысьт шуны аслым, мый кытчöкö мöда. Мед мыйкö вöчны — колö та йылысь кодлыкö висътавны. Мед оз позь вöли бöрыньтчыныö. Öти лунö висъталi аслам план йылысь уджъёртъяслы, другъяслы да гöтырлы.

Ставöн шуисны пöшти öткодя: ме йöйми.

Но тайö абу на медся лёкыс, öд мöдтор ме эг и виччысь.

...Кöть и шуисны тадзи, пыр нин кокниджык водзö ассьыд нырны.

Менам удж вылын вöли öти коми-пермяк, да сыкöд дасьтим мунан маршрутöс. Ме бöрийи медшуштöм туйсö: Коми-Пермяцкöй округ пыр. Киров туйöд мунны эз кыскы.

Прöст кадыс колис сöмын вежон, сы бöрын колiс воны нин гортö, мед мунны Ижмаö, «Луд» гаж вылö — бура дыр нин корисны сэтчö.

Сы вöсна Койгортöдз шуи мöдны служебнöй машинаöн, а сэн нин пуксьыны велосипед вылö.

И со — юнь 23 лун. Талун менам олöмын медся кывкутана старт, кодöс виччыси пöшти комын во!

Гöтыр чышкалö синвасö да кöсйысьö ме ради быд лун Енлы кевмыны. Сийö лэдзö менö, но век на лыддьö, мый ме абу тыр сюсь.

Мед — ме век жö мöда!

Койгортын менö снимайтiс телеоператор: кызди чукöрта велосипед да ладмöда сы вылö турун юр ыджда ноп. Шопер да оператор зэв пöся мекöд янсöдчисны, шуалисны мыйкö ышöданаöс и та пöрийö видзöдисны ме вылö сэтшöм жалпырысь. Съёмка помасис тадзи: ме вöчи машина гöгöр кытшов, сэсса öвтыштi налы киöн да мöдi асфальт туй вывтi лунвывлань. Ылыстчи и ылыстчи, а найö дыр на видзöдисны ме бöрся, кытчöдз эг вош енэжтас саяс.

Сьöлöм вылын и долыд, и шуштöм. Окота кодлыкö шуны гозмöд кыв, но некодлы... Бöрыннас ме гöгөрвоа, мый медсьöкыдыс öткөн мунiгад — овны сёрниттöг. Но талун ставыс на бур. Со, зэв бур асфальт туй Койгортсянь Кажымöдз. Абу ёна нöрыса. Муна öдийö, унджыксö медiчöt, медтэрыб звездочканас. Воча тöлыс пальöдö, он сэтшöма пöсяв.

Но Кажымöдзыд кöтасьыштi жö: жар лун пансьö. Окотыпырысь суныштi Кажым юö, кор вои посёлокö пыранiнöдз.

Буракодъ купайтчи да весиг гожйöдчыштi.

Луныс шондiа. Мöдiс лоны пыр жарджык. Мөвпала: но, мися, лун шöр кадö комын сайö лоö, ёна на менö банйöдас.

Кажым посёлокто вуджи да тыдовтчис, мый асфальт туй тані помассё. Водзё, кызди мен шуисны татчёс олысьяс, оз пö нин ло ни коми сикт, ни чорыд веркёса туй. А мый лоö — асьным пö бура ог тöдöй, сы вöсна мый сыланё ог ветлöй. Ми пö Сыктывкарö воливам, а Кудымкар да Перым йылысь сöмын кывлiм.

Кажым сайын нюжöдчöма вель ыджыд яг. Туйыс — еджыд, чав лыа. Мукöдлаас велосипед көлесаöй джынвийöдзыс вöйлö. Муртса мунышта, и бара сибда. Пöшти кузяла йöтка велосипедöс.

Ок и уна пöсь киссис! Тані и кутіс медводдзаысь юрö воны мöвп — косны бөр гортö. Эз кө вöв яндзим йöзсьыс... Эг кө помöдз асырась... Эськö бергöдчи.

Час куим соби лыаöдыс, и друг воис туйвеж. Сöмын тайö оз тырмы! Куим туй — кызди мойдын. И дзик некутшöм индöд! Кыті нö водзöсö мунны?!

Дыркодъ сулалі, мöвпалі, думысь кутшöмкö машина виччыси... Мися, друг кодкö öні мунны кутас, да туйсö и юала. Но сэсся гөгөрвои, мый некоді таті мунны оз кут — вывті шуштöм.

Колö бөрйыны аслым. Зэв сёкыдтор вөлöма — бөрйыны туй. Кызди тай и олöмад. Унджык йöзыс пö некыз оз лысьтны овны ашшöрлунöн: быд пöрйö мöвпавны да бөрйыны. Найö зэв окотапырысь тайö могсö «делегируйтöны» мукöдлы: бать-мамыслы, начальниклы, сарлы. И кор олöмныс оз удайтчы, татшöм йöзыд босьтчöны пинявны оз асьнысö, а найöс, кодлы сетісны ассъыныс правосö. Н-да...

Коли нöшта кутшöмкö кад, и ме бөрйи сійö туйсö, коді муніс шöрöдыс.

Менам арталöм серти, сорси кө, тайö лоö тöдса рытнас нин — ог кө во... карта вылын индöм посёлокö (вольнöй поселениеö).

Бара йöтка велосипедöс.

Муні тадзи нöшта час кык. Лыаыс пинь костын нин нязгö, а ватор юыштны весиг некытысь. Ёльяс оз визувтны ягын... Жар.

Коркö тай менам туйыд петіс кушинö. Видзöда да — татысянь водзö мунö гравийöн вольсалöм туй. Сьölöм вылын лои сэтшöм бур! Öти-кө — оз нин ков йöткасьны, мöд-кө — эг сорсьы туйнад.

Гравий вывтійд көть и зөркйöдліс прамöя, но мунсис тырмымөн öдйö.

Öтилаын сувтлі да пажнайті. Сёянсö да мукöд коланатор (чер да пöрт, консервъяс да бичпакет, сов да сакар) босьті, гашкö, дас кило! А вот ватö сьöрысь эг уна босьт. Чайті, туйын ваыд лоö жö. Миян öд быдлаын ёльыд эм. А тані со абу.

Горш косьмигад весиг сёйны эг вермы. Сöмын муртса кыкышталі мыйяскö, мед вынöй помöдз оз быр.

Шонді мöдіс нин горув, а век на жар. И век на морт ни машина воча эз лолы. И ягыс помтöм. Кажымсянь матö комын километр нин муні, а Койгортсянь и став квайтымыныс лоö. Важөн ме татшöм шуштöм местаад эг веськавлы!.. Весиг лэбачыс абу. Сёрнитны некодкöд, да сывны нин горöдла.

И друг видзöда — водзын киссьöм барактъяс, важмöм узкоколейка, сiмöм көлесаа вагонъяс. Тайö вöвлöм вольнöй поселение. Весиг нимыс оланіныслөн абу, сöмын кутшöмкö дас öкмысöд номер. Зэв пö уна йöз тані водзті овлöмаöсь... Коми-

пермяк другыд меным тайӧс висьтавліс. Вӧрсӧ пӧ уна запты-  
лӧмаӧсь. Но киссьӧма жӧ тай.

Муна посёлок дортыд, видзӧда куш стрӧйбаяс да кӧрт ёк-  
мыльяс вылӧ и ӧти мортӧс ог аддзы. А сэтшӧма гаж бырис  
йӧзсьыс — быттӧ тӧлысь нин ӧткӧн шӧйта.

И друг — нӧшта ӧти туй чукуль сайысь аддзи беседка кодӧс.  
А сәні... ныв пукалӧ! Кызь арӧса кымын. Ме вылӧ видзӧдӧ.  
Сідзкӧ, кодкӧ тані олӧ на? Менам весиг вомӧй воссис чуймӧмла:  
пукалӧ сійӧ дзик туй бокас, и ме ньӧжйӧ муна сы дорті... Ви-  
дзӧдам ӧта-мӧд вылӧ ыджыд синъясӧн. Сійӧ, тыдалӧ, некодӧс жӧ  
тайӧ туй вивсьыс эз виччысь. Нӧшта на-й велосипедӧн да ыджыд  
нопйӧн...

Ме прӧйдита дзик дінтіыс. И ола чӧв. Сійӧ сідз жӧ. Тадзи  
и муні сы дінті. Некымынысь на видзӧдлі бӧрвылӧ чатрасьӧмӧн,  
кытчӧдз эз саяв. Со тадз... Эсканныд кӧть он.

Но и дивӧ! Но и мыйсяма жӧ ми йӧз?! Кӧнкӧ ылын, шуштӧм  
пармаын, паныдасисны кык морт да кыв джын шутӧг и раз-  
лісны.

Ме весиг ог тӧд, мыйла вомӧс полі восьтны. Дерт, карад  
абу лӧсьыд тӧдтӧм морткӧд сёрниӧ воны, но тані?! Весиг ватӧ  
вунӧді юавны. Эк-ма!

Ме муні водзӧ, а юрын бара ловзис асья жугыль мӧвпӧй —  
миян сямтӧм олӧм да полысь характер йылысь. Унатор огӧ  
лысьтӧй вӧчны ас ног либӧ аснаукӧн.

И нӧштаысь: мыйсяма ми йӧз?!

...Поселение пыр мунӧм бӧрын коли нӧшта час. Сы кості ягыд  
помасис, ме муні нин козья вӧр вуджӧрын. Бур. Ыркыд. Ӗти-  
лаын паныдасьліс шор. Горш веськаліс. Ловлы долыд.

И со кутшӧмкӧ здукӧ сьӧлӧм ылькмунліс — туй бокас сула-  
ліс ыджыд кӧрт пас, и ӧтар бокас вӧлі гижӧма: «Республика  
Коми», мӧдарас: «Коми-Пермяцкий автономный округ».

«Ура,— горӧдсис менам,— вои!»

Ме збыльысь ёна сәки радлі: вот ӧні воськовта мӧд муӧ, и ре-  
гыд аддза уна сэтшӧмтор, мый некор водзті эг аддзыв! А нӧш-  
та: ме вои сійӧ местаӧдзыс, кӧні план дасьтігӧн мӧвпалі войко-  
лавны.

Но шондіыс вӧлі вылынкодъ на, а эбӧсӧй быттӧ эз на ёна  
и быр — мися, водзӧ на мунышта мый верма.

Бара сёйышти. Перйылі на-й водка. Сійӧс менам вӧлі кисьтӧ-  
ма пластик дозйӧ. Лун чӧжнад водкаыд пӧсялӧма. Видлі, да  
горшӧ оз пыр — мырдӧн ӧдва-ӧдва ньылышти... Мудз вылад  
отсавлывлӧ. Тадзи и лои — олан руӧй лои нӧшта на кыпыд,  
а мудзӧй воиш!

Видлі велосипедӧс гӧгӧр быдлаті: оз-ӧ кыткӧ лег. Зэвтышти  
ноп кутан гезъяс да мӧді водзӧ.

Тӧдчис, мый йӧз тані ветлӧны шоча: зэв тшӧкыда повзӧдавлі  
туй вылысь быдсяма пӧткасӧ да некымын кӧчӧс. Нӧшта час  
мысти аддзи туй бокысь шыблас ыджыд чукӧр — сідзкӧ, регыд  
йӧз оланін.

И збыльысь, регыд тыдовтчис посёлок. Знак вивсьыс лыд-  
ди — «Усть-Чёрная».

Перйи да видзӧдлі картаӧс. Вӧлӧмкӧ, ме ӧні аддза ыджыд-  
кодъ ю. Сылӧн нимыс — Чёрная. Висьталӧны, тайӧ ю кузяыс



пö комиясöс пыртöм бöрын вежа Степан Храп кайöма Перым муö.

Пыри посёлокас. Аддзи йöзсö, да сэтшöм любö лои ловъя ловтö вочаавны!

Лун джын некодöс эг аддзыв, да гаж нин бырис.

Сувті юкмöс дорö, кори кутшöмкö нывбабалысь пластик доз да тырті сійöс юкмöс ваён. Нывбабаыд юалис, кысь пö тэ усин. А кор тöдмаліс, юрас кватитчис, но эз жö тай йöйнад нимты.

Сы кості юкмöс дорад кутісны чукöртчыны том йöз: ар дас квайта—кызя зонъяс да нывъяс. Ме вылö видзöдöны вом паськöдöмөн, быттьö ме африкаса слён. Сэсся кутісны юасыны быдторсö да аддзывлытöм велосипедтö быдлаті вөрöдны.

— Кысь нö тэ?

— Сыктывкарысь.

— Ого, а кытчö мунан?

— Перымö.

— Да тэ мый?! Тайö жö зэв ылын!

— Нинöм. Ме ог тэрмась.

— А машинаыд абу öмöй?

— Эм.

— Жугалі?

— Эз...

— Мыйкö эг кутöй гөгөрвоны. Тэ мый, йöй али мый? Велосипедөн Перымö мөдöдчин...

— Ог тöд... Ёртъяс унджыкыс тай йöйөн жö шуисны-а.

— Но, ладнö. Эн шогсы. Тонö тэнад мыйта скорость велосипедад, дас көкъямыс! Гашкö, воан.

— Надейтча жö тай-а.

— А вай ми видлам велосипедтö?!

— Ог! Лөгасьöй көть эн, ог сет. Вывті ылын гортсянь, мед кольны велосипедтөг.

Ме казялі нин, мый том йöз вывтіджык сюся кутісны видзöдны менам эмбур вылö, да тэрмасьöмөн мөді водзö. Көть оз на вöлі лэдзны, вай пö босьтам лавкаысь пиво да берег вылас öтывыв шойччам.

Шойччыны мен накод эз вöv кивыв.

Юыс метра комын пасьта вöлöма. Берег дорас ворсісны гозмөд челядь да та мында жö кымын верстьö вуграсисны. Ме вуджи пос кузяыс, и аддзи, мый пос саяс водзö туйыд нöшта на бур... Неважөн на вöчöмаöсь: паськыд да шыльыд, көть и гравия жö.

Палаткаöс ю дорын эг кут зэвтны. Йöза местаад шойччыны он вермы. Мися, воа кутшöмкö ёль дорö да сэтчö сувтла.

Муна, чатрася гөгөр, узян места корся. И друг кыла — бөрывсянь машина шы! Видзöда — ичöt фургон менö суöдö. Чайті, панъяс да водзö мунас, а сійö дорйыв воис да мекöд орччөн и мунö.

— Мый колö?— горза шоперыслы.

А сійö сюся ме вылö видзöдö, сэсся осьтис öшиньсö да юалö:

— Тэ нö кысь татшöм бур велосипед вылас тані осьтчин?

— Сыктывкарысь.

— Но!

Шоперыд гораа серöктіс, быттьö весиг рад лоис.

— Да ме өд сәсь жө! Талун асыв петім. Перымө мөдім. А тә кытчө?

— Сәтчө жө.

— Во, блин! А гашкө, машинаө сөлан?

— Машинанад ме и асламөн верми.

— Но көть муртса мунышт! Менам сменщик-өртөй узыө, а сёрнитны некодкөд. Тә со велосипед вылын... А ми өд найөла и мунам Перымас...

Ме думыштчылі здук да мөвпышти, мый нинөм лёкыс оз ло, нуасны кө найө менө кутшөмкө бур узьян местаөдз. Да и окота жө вөлі земляккөд сёрнитыштны — та дыра эг аддзысьлөй!

Великөс шыбитім фургонас. Мөдім, сёрнитам.

Вөлөмкө, мөдөмаөсь Перымө велосипед партияла: миян пө Сыктывкарын асланым магазин. Медводдзаысь пө тайө туйөдыс мунам. Видлігмоз. Водзынсө пө Киров пыр ветлім, но сәті туйыс вывті нин урөс. Тані пө, дерт, туйыс кажитчө, но жугалан кө — некодлы отсавны, йөзтөм местаяс да.

Ме сөглас. Туйыс и збыльысь абу лёк, сөмын ягас лыаыс джуджыдджык.

...Вөлөмкө, ме велосипедтө налысь и ньөблі. Но и дивө!

Ми пө тайө велосипедъяссө эгө на удитөй испытайтны, а со пө өні аддзам, мый шогмө. Кутам йөзлы вөзийгөн тә йылысь гаравны.

Тадзи сёрниясөн эг и казьявлөй, кыдзи коли пөшти ветымын верст. Гөгөрвои тайөс, кор матыстчым Кама ю дорө. Кама ю — тайө коми-пермякъяслөн медшөр юыс. Но тані юыс абу на паськыд, миян Сыктыв ю пасьята кымын.

Вуджим Каматө паромөн, муртса нөшта муныштим и друг казьялім — сьөд кымөр кайө. Мися, колө өдйөджык палаткаөс пуктыны. Шоперыд өлөдө, тә пө мун миянкөд дзик Перымөдзыс.

Мися, ог. Мыйла, сідзтөкө, велосипеднас мөді. Мед йөзсө йөйтөдлыны? Тшөкті машинасө сувтөдны, пөся янсөдчим.

Машина тутөстіс да муніс, а ме коли туй шөрө... Лои пемыд-кодъ нин. Либө кымөрыс югыдсө татшөма сайөдіс, либө тані войясыд абу нин ми кодъ югыдөсь.

Заводитіс тусясьны. Ковмис тэрыба корсьны места.

Гөгөрти да аддзи лөсяланаөс: абу васөд, абу дзик туй бокрын. Зэвті палатка, сәсся песті бипур. Пуи бичпакетысь да яя консервысь мыйкө рок сямаөс. Пукси сөйны и сөмын сәки казьялі, кутшөма мудзсьөма да кутшөм шуштөм гөгөр... Да кутшөм лёк ывлаыс! «Мөдысь өтнамөн нинөмысь ог мун,— мөвпала,— А муна кө, босьта сьөрысь көть нин радио. Да муна сәті, көні оло унджык йөз да эмөсь столөвөйяс да гостиницаяс. Да мед көлуй эз вөв лишнөйыс».

Мөвпала тадзи, а сәсся шуи аслым: «А кутшөм интерес вермас лоны, ставыс кө лоө дась да кокни?!»

Менам шуд вылө, уджаліс мобильникөй. Ысті гортө гоз-мөд СМС: мый ставыс бур и ме ловъя. Сәсся воді узыны. Мися, пырысь-пыр унмовся... Но эз артмы: кывзыся войся шыясө, сьөлөмөй жугыльтчө. Ун оз лок. Водкатор ньылышти — оз жө лөньөд. Эг, эг велав ме тадзтө узыны!

Сәсся коркө асьявылыс нин унмовси жө. Муртса быттьө и узыышти — садьми телепон шыысь. Син восьтлытөг босьті трубка:

— Коді?

— Вера, тэнад гётырыд...

— Мый нин бара лои?

— Кызди мый?! Гажой быри! Тэ абу орччөн да!

— О, Господи! Ме узьны көсья, а тэ менё садьмөдін!

— Тэ татшөм дыр узян? Көкъямыс час нин! Бура, тыдалё, бокад узьсьё...

Ме ружта да шыбита телепонёс. Видла унмовськөдчыны, но ог нин вермы. Ковмис чеччыны.

Петі палаткаысь, видзёда гөгөр да казяла пуяс костёдыс — ва пөртмасьё.

Вөлөмкө, ты. Тайё бур! Зэв бур, позьё и пальөдчыны.

Пинь весалөм бёрын сунышти ваас да уяла отарё-мөдарё. Сэссия кынми да петі жё.

Чукөрті палаткаёс, юи кофе да кути чукөртны ноп. Босьті киё консерв банка, видзөдлі жалпырысь да шыбиті бокё. Сэссия нёшта өтиёс. Сэссия ставсё. Шыбиті нянь... Сэссия кисьті бокё пёшти ставнас сов и сакар. Кута ньобасыны туйын, нинөм нуны лишнёйсё. Көсья вөлі шыбитны и чер, но коли сёорысь — олас оружие пыдди...

Талун, мем кажитчө, төрытьяысь лоё гажаджык: медбурыс сійё, мый бырисны жугыль мөвпъяс дай ог нин каитчы нинёмысь. Весиг сёлөмөй быттьё мыйкө буртор виччысьё да ёнакодь тіпкө.

Чөвті пернапас — с Богом!— да лички педаль вылө.

Муна өдйө. Туйыс — топалөм гравий. Ыркыд да долыд.

Вөлі кө кодкө орччөн, позис эськө юксьыны бур олан руөн!

Карта серти төда, мый муна Коми Республика граница пөлөн веськыда асывылө. Ёні көнкө Кулөмдін весьтын нин. Сэтчөдз веськыда кө мунны, сөмын сё ветымын километра. Но матын гыррдзаыд, да он курччы! Кулөмдінсянь татчө туй абу. Шүёны, мый лоё пө коркө Белкомур, но и сійё тасянь Көрткерёслань мунас. Унаторйөн төдчө, мый Белкомур збыльвыв проект: кыскасьёны КАМАЗ-яс, лэптёны насып. Ноксьёны.

Талун асыв өти часөн прөйдитсьёма кызь сайё километр. И со воссис ме водзын Гайны, Коми-Перым округлөн медводдза сикт. Зэв важся да ыджыд. Ичөт пемыд керкаяс сулалёны ляпкыд нёрысьяс вылын. Мир туй вывті дыша шлапсьөдөны мөсьяс, кыпөдөны бус. Найёс сідз жё дыша колльөдөны видзөдласнас туй вылын куйлысь порсьяс. Жар сынөдын лэбалёны-жуёны гутъяс да лөдзьяс... Тасянь лөдзьяс кутасны колльөдны и менё. Некымын сё верст.

Град йөръяс тырөмаёсь кузь турунөн... Слабог, борщевик некөні оз тыдав.

Лавка дорысь аддза йөзёс. Матыстча. Сёрнитёны коми-перым кывйөн. Зэв тешкодь кывны.

Керкаясыс абу миян кодьёсь. Ичөтөсь. Асьныс войтырыс ичөтөсь жё. Ставыс абу миян кодь. Но кывсё налысь, көть и торъялө, гөгөрвоан.

Пыри магазинё, босьтася. А найё видзөдөны. Интерес налы кыськө локтөм мортыд. Рочөн чайтёны. А тані со бара гөтыр звөнитө. Ме босьта трубка да сёрнита ськөд. Дерт, комиён.

Ставөн та вылө чуймисны: кысь пө тайё чудёыс — быттьё

миян, а быттьо и абу?! Лавкаысь петом бёрын матыстчисны да юасисны, кысь да мый. Зэв бура сёрнитім, а перымса ног кө, баитім.

Лавка дорас и сёйи ньобасөс. Йёв да кутшөмкө пөжас вөлі.

И со бара бергөдла педальяс. Туйой тасянь крута кежө лун-вылө. И кутас пыр тадзи мунны — Перымөдз.

Гайнысянь водзө мунө асфальт туй. Миян туйясысь абу лёк. Но кызь километр бёрын помасьö — и бара гравий насып.

Ме чайті, мый тадзи лоө недыр, да смела мөді кажгысь изъяс вывті. Но коркө сэсся гөгөрвои сорсьөмөс.

Сійö луныс вөлі нөшта на жар: комын сайö. Кучик кутіс сотчыны, а пасьтасьөмөн мунны он жö вермы. Сы кындзи, щёбенъ нуысь ыджыд машинаяс кыпөдлісны зэв сук да чорыд бус. Вөлөмкө, тані босьтчөмаөсь туйтө дзоньтавны. Но медшөрыс: менө пикө вайөдісны лөдзьяс! Та мында, и öти морт вылө! А кодөс нө сэсся курччалан, некод кө матын абу?!

Лөдзьяс кыпөдчисны Гайныын да колльөдісны менө кузяла.

Ковмис мунны кыдзи позьö өдйö, көть сэсся кутшөма мудзан. Бокиянь кө видзөдны, ме вөлі паровоз кодь, а ме бөрся вөтчысь лөдз котырыс — паровозлөн кузя кыссысь тшыныс...

Өдйö мунігөн эджык курччавны. Кор окота вөлі сувтлыны кутшөмкө ёль либө гөп дорө, тэрыба сувтлі, шыбитлі велосипедөс да скач котөртлі ва дорө: бузгыся став тушаөн, суныштла юрөн и ставнам да минут кымын ог пет ва увсьяс. Сы кадö унджык лөддзыс разавлө.

Купайтчөм бёрын бара жö скач котөрта велик дорө, сюрсярөн пукся да өддзөдча. Корсюрө весиг сөйлі мунігмоз.

Тайö изъяс туйсö ме нимті военной туйөн. Ог төд, нимтасны-ө сійөс тадзи карта вылын, но менам памятьö нэм кежлө татшөмөн и коляс: изъяс да буса.

Песси-мучайтчи ме час нель. Пыр куті надея аддзыны кутшөмкө чукыль сайысь асфальт. Но воліс нөшта öти чукыль, и бара воссьыліс енэжтасөдз буса туй.

Рытьяывисö асфальтыд воис жö. Кутшөм бур, вөлөм, шлывыны шылыыд туйөд!

Муна өдйö, кокниа. Весиг узыны места ог корсь.

Мися, войыс югыд — удита на аддзыны. Кымын матөджык Кудымкарөдз, сымын бур. Төда, Кудымкарын менам лоө шойччан лун: сәні менө виччысьö Кудымкарса телевидениеын уджалысь ёртöй, Алексей Никулин. Сійö перымса войтырлөн национальной герой кодь — ставөн төдöны, и ставөн, надейтча, радейтöны.

Мунігмоз пыравлывлі татчөс грездъясö, корсьлі лавка, ньоблі сёян да сәні жö, лавка дорас, и нуръясьлі. Любөпырысь видзөдалі пырысь-петысь йөзсö да зіли пырны накөд сёрниö. И аддза, мый налы интереснө аддзыны коми мортөс, кывны миянсьыным сёрнинымөс! Мен сідз жö! И пöшти ставсö бөрти пондан вежөртны налысь.

Тадзи коли нөшта öти лун.

Друг кыдзкө казялі, мый кутіс пемдыны. Мися, кыдзи нө тайö?!

А сэсся гөгөрвои, мый муна лунвылө, а сідзкө, матыстча пемыд войяса муяслань.

Дыркодь корси узян места. Бөрйи нöрыс бокшаысь: мед, мися, номъяс эджык дöсадитчыны.

Вой колис колянасьыс бурджыка. Тыдалö, чöскыдджыка узьсьö, кор тöдан, мый лои нин мунöма матö джын туйсö, и аски тэнö паныдаласны бур ёртъяс...

Талун — менам походлön коймöд лун. Ок и сорсин тэ, шонъянöй ыджыд батыöй, кор шулiн, мый эсiйö пö эндысь туйыс Перымö мунö! Мыйта туйвеж нин коли, а Перымыд зэв на ылын!

Асывнас мöдi водз. Шуи воöдчыны Кудымкарö лöдз петтöдз.

Ыркыд асывнад, вöлöм, медся бур мунны. Весиг сывьсьö!

Кольöны бөрö ичöтик грездъяс, сюөн кöдзöм муяс, юдорса видзьяс вылын йирсьысь ыджыдкодь мöс стадаяс. Казялi нин — мöскыс танi уна. Мукöддырйи деревня пырыс заводитасны мунны, да писькöдчыны на косттi он вермы.

Талун мунны меным пыр гажа! Аддзи кутшöмкö столövöй... Прамöй морт моз сёйи. Лöсялiс. Всё — тасянь Кудымкарöдз коли кызь верст.

Пыкси педальясö да часөн и вои сэтчö. Кадыс — куим час лун.

Юалi йöзлысь телевидениелань туй. Муна ньöжйö, видзöдала карсö, йöзсö. Нöшта кызь минут, и менö кутлö нин Лёша другöй.

Матыстчöны мукöд журналистъяс. Кодсюрöс ме тöда. Ставныс радöсь, помся жмитöны киöс, видзöдалöны кöлуйöс да великöс.

Журналистъяс пиысь öти матыстчис да шуö, ме пö том дырйи ветлöдлi жö тадзтö. Став рытыв СССР-сö пö кытшовтi. Тiян Комиын пö вöлi жö, Урал гöра вылын и, Манарага йылö пö весиг кайлi. «Но, мися,— вочавидза,— тэнсьыд кок туйтö, сiдзкö, таяла... Манарага вылад ме колян во кайлi жö! Ок и страк вöлi пöшти кык сюрс метратö из кузя кавшасьны!» А мыйта пö öти лунön медся унасö прöйдитлiн великнад?— юалö сiйö. Мися, туйыс кузяла вöлi лёк, но тöрыт сё кызь километр, буракö, артмис. А ме пö кыксё километр öтчыд мунi. Но ёна пö и мудзлi сáки...

Менам Лёша другöй соскöд нин кыскö. Мися, кытчö?

— Площадь вылö,— вочавидзö,— сэнi тэнö виччысьöны.

— Кодъяс?

— Быд пöлöс гижысь братияыс.

Локтiм, и збыль — площадь вылас чукöрмöма морт дас. Ме велосипеда, дерт. Менö фотографируйтöны, босьтöны интервью. А мен тешкодь быттьö неуна — сы ыджда честь!

Но сэсся гөгөрвои, мый татшöм шуштöм местаад быд ичöтик лоöмтор, а торйөн нин велосипедөн локтöм рöдня морт,— налы и збыль выльтор.

Сэсся менö дыркодь быдтор йывсьыс юасисны. Öти гижысь да быдсяма общественникыс. Сэсся снимайтiсны, кызди ме великөн гуляйта Кудымкартi. Сэсся нуöдiсны телевидение вылö да корисны виччысьны выльторъяслысь рытъя выпуск.

Ме выльторъястö аддзи час мысти. И нöшта час та бöрын сералi.

Мый вöлi выпускас: менам Öльöксей другöй первой висьталiс кык неыджыд юөр асланыс правительство йылысь, сэсся шуö — а öнi пö главнöйторйыс... «Миян карö локтiс менам важся друг

Ольоксан. Локтіс Коми муысь велосипедон. Сійö абу йöй и абу голь — сійö занимайтчö туризмön и туялö рöдвуж войтырлысь олöм.

Öнi тi аддзанныд ськöд интервью...»

И сэсся вöли менам интервью, кöнi ме вит минут чöж висьталi аслам поход йылысь.

Та бöрын сетiсны поводдя.

Помас Лёша нöшта содтiс, дзоньнас интервьюсö позяс пö аддзыны сёрöнджык рытнас... Сэни ме кута сёрнитны нин час джын!

Ме та вылын, збыльысь, бура дыр сералi. Миян татшöмтортö позис сетны эфирö, миян Юралысь кö бöра-водза ветлiс Марс былö.

Но Лёша менö öлöдiс: «Эн серав. Чайтан, тшöкыда танi овлöны локтысьяс? А тшöкыда-ö на пиын комиыс? Оз воы некодi! Рöдня войтыр, а нинöм öта-мöд йылысь огö и тöдöй».

Лёша другöй висьталiс сiдз, кызди эм. Мыйöн мен пыр кажитчылис тайö мортыс — вермис дугдывтöг шмонитны, но век вöли аслас видзöдласа быдтор былö, некодысь эз пов, зэв ёна тöждысьлис аслас культура вöсна.

А во мысти кывсис, мый Перым телевидениеса виль начальстволы сійö абу лöсyalöма — ковмöма мунны.

Выльторъяслөн эфир бöрын ми мöдiм пивбарö. Сы бöрын петалiм Иньва ю дорö шашлык сёйны.

Иньва юыс дас метра пасьта и эм танi, но джуджыд. Берег дорас тырыс машина. Быдлаын бипурасьöны да шашлыкасьöны.

Пукалiм дыркодь. Но эгö усьтöдз — аски бара на туйö.

Войсö узи Лёша дорын. Керкаыс сылөн зэв аслыспöлöс: коми-перымса шнич. Налөн керкаясныс векньыдöсь, но кузьмöсöсь. Öти джынйыс — йöзлы олан жыр, мöд джынйыс — кöдзыд посводз да уборнöй. Сэсся пывсян, сэсся мастерскöй да гид. Ставыс öти вевт улын.

Ме узи медбур, ыркыд местаас. Вöлöмкö, посводзсянь лöскас кайö пос — сэни нöшта öти, гожся узыланiн.

Ок, кутшöм бура менам узьсис. Кöть мый эн шу — палатка-ад абу шойччöм.

Садьми сöмын дас час асылын!

Чукöртчи зэв дыр. Сöвтi ноп, мавтi солидолөн великöс кытсюрö... Помся дуньги кофе, сёрнитi Лёшакöд да сылөн пияныс-кöд (найö сёрнитöны жö перым кывйөн).

И некыз эг слöймы петны туйö. Тыдалö, сьöкыд туйыс век на повзьöдлiс.

Петi сöмын дас öти часын.

Кутчысьлiм на Лёшакöд. Сійö индiс Перымö мунан туй да шуис, меным пö мунны коли кыксё километр. Менам ногөн кö — кык лун педаль личкалöм.

Жальөн коли Кудымкарыд. Абу эськö и ыджыд, шуам, миян Печора кар кодъ кымын, но мыйöнкö сьöлöм вылад воö. Тайö сэтшöм места, кöнi пöшти ставөн «байтöны» ас кывйөн, кöнi поэö шойччыны ловнад.

Кудымкарсянь туйыс паськалыштö. Тöдчö, мый мунан «ыджыд» муö... Перымын олö миллион сайö морт, и карыс пырö Россия-лөн медмича да медозыр каръяс лыдö.



Унатор туй пӧлӧныс кутіс вежсьыны: ыджыдджык грездъяс, мичаджык заправкаяс, весиг туйбердса кафеяс кутісны мыччы-сявлыны.

А километр ветымын мунӧм мысти паныдасис бетонысь кисьтӧм ыджыд пас: «Пермская область».

Комму помасис. Ме пыри Роч муӧ.

Туйыс нӧшта на паськалыштіс.

Ме мӧвпышті мунны талун сӧ ветымын километр. Мися, Перымӧ пыртӧдз нӧшта ӧтчыд кӧнкӧ войколала, узьӧм бӧрын нин воӧдча карас.

Но туйыс вӧлі бур, и ме кокныда муні, листалі километръяс. Некыті эз вись, некыті эз дзурт.

Ӧти кадӧ кутісны воавны ыджыдысь-ыджыд нӧрысьяс. Каян да каян некымын километр: кор первой скоросьтӧн, кор подӧн, велик йӧткалӧмӧн. Сэсся нӧрыс юрйивсянныс пуля моз лӧччан, весиг шойччыштны он вермы. Та бӧрын бара кавшась.

Гӧгӧрвои, мый матыстчи Урал ковтысӧ. Кӧнсюрӧ весиг тыдовтчылісны изъяс кыръяс.

Бара вӧлі жар, и быдлаын, кӧні сӧмын позис, купайтчи.

Ӧтилаын артмис со мый...

Муна да видзӧда купайтчыны лӧсялана гӧп. Коркӧ тай аддзи жӧ. Тӧрыба, мед эз суны лӧдзьяс, котӧрта ва дорӧ. Котӧртигмоз шыбита великӧс, пӧрчча кӧлуй да бузгыся камышӧн тырӧм гӧптӧ. И друг тай мыйкӧ кыдзи кутіс орчӧн больскӧдчыны! Гораа! Васӧ резӧ джуджыд турунсьыс вылӧ! Ме мыйлакӧ весиг думышті: крокодил! И ӧти чеччыштӧмӧн вои берегӧ.

Видзӧда да — йӧра!

Сюраыд сулалӧ ваын да ме вылӧ видзӧдӧ. Дас воськов сайын. Ӧта-мӧд вылӧ видзӧдам. Гӧгӧрвоа, сійӧс лӧдзьясыд жӧ татчӧ вӧтлісны, но ог бӧрынътчы. Шуа сылы: «Вай петава, сет меным пыравны».

Йӧраыд ньӧжйӧ, дышпырысь кайӧ берегӧ да чатыртчӧмӧн видзӧдӧ ме вылӧ.

Ме пыри ваад, ыркалышті да бӧр котӧрти туйлань. Сӧвны нин куті велик вылӧ, видзӧда — менам йӧраыд бӧр гӧптас пырӧ...

Муна водзӧ. Коркӧ час квайтъясын талунъя стартсаян сӧ километр вуджи. Нӧрысьяс помасисны, и мунны лои долыдджык. Но, мися, муна нӧшта ветымынсӧ да сувта войколӧн.

Коли нӧшта ветымыныд, а век на шондіа. Туйыс бара жӧ — пыр сӧмын бурджык. Куті видзӧдаваны войков вылӧ места, но эз сюр: либӧ нюр, либӧ йӧз оланін, либӧ свалка.

И друг юрӧ воис мӧвп — мунны Перымӧдз сувтлытӧг! Кӧть и вӧлі полыштӧм: мися, эбӧсӧй кӧ оз тырмы. А сэсся шуи тадзи: войнад мунны кокныдджык... И машинаяс озджык ветлыны. Сэсся и ӧти лунӧн водзджык воа. Но медшӧрыс: менам лӧо рекорд, ӧти лунӧн муна кыксӧ километр!

Шуӧма — вӧчӧма. Муні водзӧ.

Коркӧ сэсся воис Краснокамск кар. Тайӧ Перымлӧн миян Ӗжа кодъ жӧ кар-спутник. Но кытшлалі да кытшлалі ме сәті! Сәні и вуджи вой шӧр кадсӧ.

Краснокамскыд важӧн нин коли, ме муні матӧ кыксӧ километр, а Перым век на абу. Муна кутшӧмкӧ зэв векныд туйӧд.

Тані, колӧ шуны, еджыд войыд абу нин. Дзик миян арся вой

---

кодъ — дзурс пемьд. Неуна отсалёны-югдөдөны менсьым туйёс мунысь-ветлысь машинаяс. Муна-муна, и кор дзик нин кутіс бырны надея аддзыны Перымтө, туйыс нөшта векняммис... Сэсса аддзи нейджыд, быттьö кутшөмкө деревня водзысь, туйвыв пас. Сэтчö гижöма: «Пермь».

Но ме ог эскы.

Вывті ичөт пас та ыджда карлы!

Туйыс вöчö крукыль, вöрыс кызкө друг помасьö и... ме пета биа океан берег вылö.

Ме водзын Перым!

Та ыджда кар! Та мында би! Та мында машина да йöз кык час войö!

Быттьö некод оз и узь тані.

Ме матыстча паськыд туй дорö, юала кодлыськө вокзал, мöда сэтчань.

Ок и ыджыд Перымыд! Вокзалөдзыс муні нөшта час кык.

Сідзкө, сöмын кар кузяыс муні матö комын километр! А весиг джын карсö эг мун.

Асъядорыс нин вуджи Кама ю вомöныс зэв кузь пос. Тайö вöлі нин мөд Кама. Абу коми-перымса Кама кодъыд, а некымын километр пасьта.

Карыс зэв мича, öнiя серпаса-мыгöра... Пыр на жалита, мый сэки эг аддзы кад бурджыка тöдмасьны карнас. Сэки ме дзик нин руй кодъ вöлі. Вокзал дорас тай чеччи велосипед вылысь да весиг уси кок йылысь.

Бöрти арталі да — менам öтчыдысьöнсö кыксö комын километр мунсьöма. Тайö вöлі збыльысь рекорд!

Но медшöрыс — ме вои Перымөдзыд! Ачым эг эскы талы. И весиг туйö петігөн помөдз эг эскы, мый воа.

Но — артмис. И ме, кулөм выйөдз мудзöм морт, ичөт кага моз радлі.

Шойччыштöм бöрын рази велосипедöс, ньöби поезд вылö билет да час мысти нин мөді бөр гортлань — Кировö. Проводница броткөдчис менам няйт велик вылö, но лэдзис жö... А Кировас воём бöрын сöлі таксиö да сійö рытнас вöлі нин Сыктывкарын.

Мөвп, кодöс ме пöжи кызь вит во, збыльмис. Мен тайö кажитчис, и, чайта, коркө öтчыд бара пета туйö... Шуам, Крымö! Кöні эм гöраяс, кöні эм море... И медшöрыс — сэнi, чайта да, лөддзыд абу!!!



## Эстонияса зарни ар

### О Ч Е Р К

Быд во октябр коймөд вежонө Эстония нуөдө рөдвуж войтыр лунъяс. Кольом во тайо гажыс лөсяліс «Финно-угрия» фондлы 80 арөс тырөмкөд. Комиыс сэтчө мойвиис ветлыны культура колледжса «Пелыс моляс» коллективлы, кывбуралысыяс Алёна Ельцовалы да меным. Ми эськө эг сы мында гаж вылас мунёй, мыйта выль небөгъяснымөс видзөдлыны, йөзыслы петкөдлыны да гортө вайыштны, сетасны кө... Сетісны тай, весиг чемодан ковмис ньөбны... Небөгъясным — и менам, и Алёналөн — нель кыв вылын: коми, роч, эст да английскöй...

Но, ставсö вочасөн...

**15.10.** Артмис!.. Визаа паспортъяс зептынөсь... Ставыс вöтын кодъ... Мөвпъясным сәні, ылын... Көні вөвсьылөма неөтчыд нин... Көні сьөлөм тіпкө кызкө мөд ног... Но Москваыд оз на тай сідзитө лэдз. Лунтыр шлачөдіс көдзыд лымъя зэр, пыралім думсьыным сөйөмөн шонтысьны Арбат вывса кафеө, да сөмын сьом лотөм лои — көдзыд шыдыс ни гырктө, ни ловтө эз шонты... И Таллино муныс поездын кокъяс некыз эз вермыны шонавны. Вой, эськө и узыны колө, да пукса вагонад тай он ёна унмовсь... А сәсся и удмурт ёртъяскөд аддзысим. Збыль, мися, дзескыд Му шарыд. Колө өд, мөдөдчыны Эстонияө да аддзысьны важ төдса Пётр Захаровкөд и вой колляліг сәсся асылөдзыс варгыны-сёрнитны...

**16.10.** Войыс надзөник коли. Вуджим кык таможня, ёнасö тай некоднанас эз пысасыны. Воим асывнас... Петім вагонысь... Таллин... Перрон помын паныдалө ачыс Арво Валтон. Төді эськө сылыс виччысьөмсö, но чайті, дзик поезд дорас оз жö лок. Сәки, дерт, ёна радлім, а öні, думышта да, ачыс өд финн-угор гижысьяслөн ассоциацияса президент миянөс вочааліс... Нуисны гостиницаө, кар шөрас буретш, Ош улица вылын. Но, думайта, вывті ылө муса пармаыс эз жö тай овмөдны... Тіянлы пö час джын, сәсся мунам нуръясьыштам да мөдөдчам издательствоө, талун пö книгаяснытө көсйисны вайны... Талун? Сөмын на вайны??? Ми сәтшөма нетшкысим татчө, сы ылнаыс локтім, мися, пырысьтөм-пыр небөгъяснымөс киö босьтам... А Арво шуө, нинөм пö, та дыра виччысим да час-кыктө нөрөвитлам нин. Но час-кыкыд нюжаліс рытөдзыс. Вөлөм, типографияыс Тартуын, а сәсянь абу на ёна и матын. «Киръястускескус» издательствоын эськө прамөй йөзыд гажтөмтчыны эз сетны, но век жö тшөкыда кыйкнитлывлім и часіяс ылө, и өдзөслань... Коркө юөртісны — машинаыс пö жугалөма, ыстісны мөдөс, но

сійö сибдöма пробкаö... Куритчысьяс кымыныськö петалисны шпуткыны... Сэтшöм нин окота аслад книга вылад видзöдлыны... ВАЙИСНЫ!!! Восьтисны кудъяссö, сетисны морт небöгөн. Шемöс! Первойсö менам вöли сöмын шемöс. Сэссия ылькнитис радлун... Бурсиöмъяс, аттьöасьöмъяс...

Торйöн окота висьталыштны издательство да сылөн уджалысьяс йылысь. Неуджыд жыр, дерт, джаджъяс тыр небöг, пызанъяс вылын компьютеръяс да «творческой беспорядок»... Ставыс кутшöмкö неофициальной ли мый ли. Небöгъяснымöс серпасалысь, Пирет нима том ань, пöшти став кадсö пукалис то джодж, то пызан вылын, нюмъялис, ёнасö эз и сёрнит... Издательствонас веськöдлö Рико нима том мужичöй, сылөн эм нöшта кык отсасысь, том мужичöйяс жö, да шöр арлыда ань, кыз ачыс шуö, отсала пö вузавны, мый найö мудеритöны...

Кыз сьöмсö перйöны реклама да мукöд продукция дасьтöмөн, а небöгъяс лэдзигөн, шуис Арво Валтон, весиг асьныс неуна могмöдöны сьöмөн... Нöшта колö пасйыны, мый Эстонияын быд лун петö дас небöг эст кыв вылын... Оз öти издательствоын, дерт.

Ми вöли дасьöсь небöгъяссö питшöгö суйны, лэбыштны гостиница номерö да нöшта, нöшта видзöдлыны найöс, малыштны... Но миянлы шуисны, аски асывнас пö Рико ваяс найöс, а öни мунам шойчыны Куку клубö. Таллинын тайö медся важ клуб, көни чукöртчывлöны актёръяс, гижысьяс, серпасасысьяс... Зэв пö тöдса да пыдди пуктана ин. А ми пыр и нимтiм сийöс кукукеркаөн... Рытъяснас сэни чукöртчывлисны уналаысь воом делегацияс, öд ми, пасйыли нин, буретш веськалим «Финно-угрия» фондлы 80 арöс тырöмлы сиöм гаж вылö. Зэв уна сыслана-йöктана коллектив воліс.

Рытнас мунiм Таллин уличаяс кузя татчöс олысьяс моз, бытьö нэм чöж нин танi олам...

**17.10.** Дас час асыв кежлö Арво Валтон корис аслас лекция вылö, буретш пö финн-угор литератураыс дисциплинаын перымса литератураыс йылысь лыддя да тi «ловъя экспонатъясөн» пö лоанныд. Ме шмонита, мися колö либö гижны: руками не трогать. Да оз пö став том йöзыс рочнас гөгöрвоны.

Збыль, Таллин уличьяс вылын овывлö, шыасян кө рочөн томджыкъяс дорö, вочавидзöны английскöйөн, ог пö гөгöрвой. А шöр арлыдаяс вочавидзöны роч сора эстонскöйөн. Дерт, Таллинад тшöкыда паныдасьлöны роч кывъя йöз, да и уна мукöд кыв кывлан. Кызди шуöны асьныс эстонечьяс, Таллин — космополит-кар... Тешкодътор овывлö, кор окота шыасыны эст кывйөн, öд кутшöмкö да кутшöмкö сёрникузяс бытьö тöдыштан жö. Бур, виччысян кө дженъид да стöч вочакыв, а артмывлö и сiдз, мый воча зэв кузя да öдйö висьталасны, серамыд весиг петö. Думыштан, мый пö и ошйиси кыв тöдöмөн. Коран прöща, бара жö эстонскöйөн, да коран висьтавны рочөн. Колö тöдчöдны, некутшöм дöзмöм ли сералöм татшöмторъяс дырйи эг казавлы... Буракö, любö мортыдлы, кор мöд муысь воом морт, кужö ли оз ли, зильö сёрнитны на кывйөн, кутшöмакö синö налөн культуралань...

Лекция водзас Алёна рытывбыд жуглис юрсö — гижис доклад. Рытнас Арво сетис миянлы гортса удж — видлавны-донъяв-

ны ассыным өти кывбур. А ми йöзыд ёна старательнойöсь, да окота быттьö уджсö бура вöчны... Алёна и гижис дзонь доклад.

Пырим аудиторияс, пукалёны морт дас—дас вит, кодъяс велөдöны финн-угор литератураяс. Дженъыдика висътасьыштiм, лыддим морт кывбурöн. Алёна сёрнитыштiс на аслас радейтана коръяс йылысь, мый сылөн кывбуръясын найö вермöны пörны уна пöлсö образö, ме кывбур пыр висъталi миян кутшöмсюрö приметаяс йылысь. Удмуртъяс сёрнитiсны дыр. Найö ёна радейтöны, сюрö кö строкаыс, глобальной проблемаяс кыпöдны... Паметьö коли сюсь синма, паськыд нюма студентка. Некемын лун мысти сийö нöшта на волiс миян аддзысьлöм былö...

Тайö луннас медводдзаысь пыралi сувенир лавкаö корсьны эст паськöма акань. Коми республикаса национальной музей чукöртö финн-угор чачаяс, да тöдсаяс корисны вайны и Эстонияысь... Менам корсьысьöмöй дзонь эпопеяөн лои. Делегацияын и гөгöр ставыс тöдiсны, мый меным колö акань, да то öти, то мöд öтторъя матыстчылисны: сэнi пö эм, сэтысь пö аддзылим. Ветлөдлiм лавкаястi удмурт ныв Лариса Мардановакöд. Пырам лавкаас, заводитам сёрнитны: ме — комиён, сийö — удмурт кывйён. Да öд гөгөрвоам öта-мöднымöс. Сэсся нин коркö ме удмурт кывйён мыйкö шуа, коркö сийö комиён. Кыдъя коми-удмурт кывйён и сёрнитiм. А öти лавкаын миянлысь юалисны, кутшöм нö пö кывйён тi сёрнитанныд. Ми и висъталiм. Вузасысьыс öдийö копыртчис прилавок улас, перйис кызiник небöг. Со пö, менам финн-угор войтырлөн рöдвуж пуыс эм: со пö комияс, со удмуртъяс. А сэсся юалис, кызди удмурт кывйён «аттьö» лö. «Тао», шуис Лариса, а ме зэв нимкодпырысь — «аттьö». Вузасысьыд вашмунiс жö, дзик пö тай миян кодъ: «aitäh».

Гарыштi кö та йылысь, колö содтыны, мый öнi некод нин оз видзöд сэнi миян былö енэжысь усьöм йöз былö моз. Во дас вит сайын колö вöли ёна на висътавыны, кодi сэтшöмыс коми йöз, кöнi олöны да мый да. Öнi пö финн-угор войтыр йылысь висъталöны школаясын, тöдмөдöны налөн культураөн быдсяма празникъяс вылын. Комиысь миянкöд локтысь «Пелысь моляс» коллектив петкöдчылис Вильянди уездса школаясын, культура керкаясын, библиотекаясн. Коми культура шöринын уджалысь Валентина Самарина нимкодья казътылис, кызди эст челядь окотапырысь ворсiсны коми ворсöмъясөн да тöдмасисны коми культураөн...

Торйөн нин ёна миян олöм-вылöм йылысь юасисны Таллинса Гижысьяслөн керкаын чукöртчылöм вылын. Быд середa сэнi котырлöны литература рытьяс. Талунъя рытыс вöли сийöма миянлы. Квайтымынöд воясö кыпöдöм зал, зэв кыпыд, ыджыд. Ог шу, мый йöзыс вöли вывтi тыр, но локтысьяс зэв сюся кывзiсны кывбуръяснымöс и коми, и эст кыв вылын. Эст кыв вылын миянлысь кывбуръяс лыддыны волiс театрса актриса Гармен Табор. Зэв мича, статья том ань. Сийö сьölöмсянныс, кужöмөн, колана интонацияөн лыддис быд кывбур, и залыс зэв любö во-чаалис найöс, кызди и окота вöли миянлы...

Рыт вылын йöзыс кызвынсö весиг эз литература йылысь юасыны, а миян олöм, чужан кыв велөдöмын да видзöмын мытшöдъяс йылысь, мый ми вöчам вежör да мывкылдун сöвмөдöм могысь...

Чуймоданатор, но рыт бѳрас миянлы вештысисны на мыйкѳ сюрс шайт сайѳ... Нѳѳбалісны, дерт, и небѳгѳяс... Миянын дорысь найѳ сѳні ѳна дѳнаѳсь. Выль небѳгѳясным 85 крон гѳгѳр сулалѳны, миян сѳѳм вылѳ кѳ — 170—180 шайт.

**18.10.** Талун нуисны небѳг лавкаѳ. Сѳні, да и миян тшѳтш, Москваын, тшѳкыда нуѳдсѳ сідз шусяна «час автографов». Водзвыв сетѳны реклама: татшѳмтѳ лунѳ, татшѳмтѳ часѳ, татшѳмтѳ лавкаын лѳѳ сійѳтѳ авторыслѳн ли авторѳяслѳн «час». Урчитѳм луннас сѳтчѳ локтѳны йѳз, матыстчылѳны и лавкаас нѳѳбасьны пырысьяс, кывзѳны. Ми лыддим кывбурѳяс комиѳн, а Арво Валтон вуджѳдіс найѳс ѳст кыв вылѳ.

Арво Валтон — чуймѳдана уджач, мудз тѳдтѳм морт. Вежон чѳж сійѳ пыр вѳлі миянкѳд, нуѳдіс презентацияс, быдлаѳ миянѳс новлѳдліс, да и миян локтѳдз ыджыд удж бергѳдіс — ачыс вуджѳдіс став небѳгсѳ, корсис небѳг лѳдзѳм вылѳ сѳѳм, гижасис миянкѳд — мыйыськѳ видліс, мыйыськѳ ошкыліс...

Татшѳм «час автографовыс» миян вѳлі кыкысь. Тайѳ луннас — «Аполло» небѳг лавкаын да нѳшта октябр 22 лунѳ «Рах-ва Раамат» небѳг лавкаын, коді меститчѳма Таллинса медся дѳна да ыджыд супермаркетын. Буретш тайѳ лавкаас Алѳналѳн, ме думысь, вѳлі медся вунѳдлытѳм аддзысьлѳм. Видзѳда, Алѳна кутшѳмкѳ тѳдтѳм ныла-зонмакѳд сѳрнитѳ. Кывзысьышті — комиѳн! Но, мися, и Таллинад вѳлѳмаѳсь коми йѳзыд. Вѳлѳмкѳ, Алѳна мамлѳн томдырся пѳдругаыслѳн нылыс. Ачыс Ольгаыс Дереваннѳйысь, мунлѳма коркѳ ѳст мужичѳй сайѳ, да верѳсыс нуѳдѳма сійѳс ѳстонияѳ. Коми кывсѳ Ольга абу вунѳдѳма, челядѳсѳ на велѳдѳма...

Тайѳ жѳ луннас миянѳс примитіс ѳстонияса президент Тоомас Хендрик Ильвес. Сійѳ дыр олѳма Америкаын, рочнас оз гѳгѳрво, да сѳрнитѳм вуджѳдчысь ѳсѳгѳн. Сѳрниыс, дерт, кызвыннас бергаліс коми да удмурт литератураяс сѳвмѳм, чужан кывѳяс видзѳм-сѳвмѳдѳм йылысь. Юасис уна. Удмуртѳяслѳн асланыс мытшѳдѳяс, миян — асланым. Тайѳ паныдасьлѳм вылас и бѳрынджык, парламентын, висьталі, менам чайтѳм серти, мися, медыджыд мытшѳдыс сыын, мый школаясын да вылыс тшупѳда велѳдчанінѳясын чинѳ-кусѳ коми кыв велѳдѳм, ѳтша олыся сиктѳясын тупкысѳѳны школаяс, шѳр школаясын коми кыв велѳдѳны иностраннѳй моз, тупкысис финн-угор факультет, да коми кыв кѳть и лыддѳыссьѳ государственнѳйѳн, но государственнѳй тшупѳд вылын оз и ѳна бергав.

Но сѳк жѳ пасйи и сы йылысь, мый миян ѳм «Государственнѳй кывѳяс сѳвмѳдан программа», код ѳсѳгѳн ѳм позянлун лѳдзны небѳгѳяс, пѳртны олѳмѳ кутшѳмкѳ проектѳяс, вѳчны челядѳлы коми кыв ѳнія ног велѳдан пособиѳяс да с.в.

ѳстония дась ѳсавны миянлы и сѳѳмѳн, и бур кывйѳн. Вѳзйисны весиг Россияса быд регионын вѳсьтыны кѳть ѳти школаѳн, кѳні ѳськѳ став предметсѳ велѳдісны чужан кыв вылын, шуам, миянын — комиѳн. Дерт, колѳны йѳз, кодѳяс вермасны кыскыны тайѳ сѳѳкыд додѳсѳ. (Курыд нѳмѳн гѳжа аслам кыв сѳвмѳдѳм йылысь — «кыскыны сѳѳкыд додѳ...»)

Тані ми воим ѳти кывйѳ удмуртѳяскѳд, мый ѳні медводдза мог — дасьтыны том йѳзѳс, код пытшкын кутас ворсны-пуны коми ли удмурт вир, коді вежѳрнас да сѳѳлѳмнас кутас гѳгѳрво



ны миян войтырлысь дойсö да көсйöмъяссö. А ми, гижысьяс, вермам дасьтыны литератураö пырöдчысь том йöзöс, ышöдны найöс, мед эз йөршитчыны сöмын асланыс радейтчöмö ли шөгö, сöмын асланыс пытшкөсса олöмö, мед налы эз вöв веськодъ став мирса ыджыд олöмыс и быд ичöтик сиктлөн тöждыс.

Та йылысь сёрнитім и рытнас, университетса кафеын ад-дзысьлöм вылын. Эстонияса президентлы ставөн козьналім морт небөгөн. Сійö тшöтш козьналіс миянлы ассьыс эссе небөг. (Вö-лöмкö, том дырйиыс сійö уна гижлöма да вуджöдлöма англий-скöй классика эст кыв вылö). Нöшта ме козьналі президентлы коми котырлысь морöспас. Сэсса татшöм жö морöспасъяс козь-налі и эст студентъяслы да гöсьтъяслы. Найö пырысь-пыр пы-салисны морöсас, а ме шуи: «Öні ми ставөн неуна комияс».

Рыт вылас бара на воліс сійö том студенткаыс, код йылысь гаравлі водзджык. Сійö нем виччысьтөг сувтіс: позьö пö, ассьым кывбурöс лыддя, дерт, ме пö абу профессионал, но сэтшöм окота лои гижны. Миянлы дженьыдика вуджöдісны: финн-угор поэзияö менам веськалöмыс быттö мича вöт...

Коркö помасис и тайö кузьсьыс-кузь луныс...

**19.10.** Луныс дзоньнас вöлі сиöма «Финн-угрия» тшупöда паслы. Таллинса йöзкост библиотекаын лунтыр муніс конферен-ция. Ми вывтисö сәні эгö пукалö, кыв гөгөрвотöгыд абу ёна интереснö. Ветлöдлім картіыс, чуймалім, кызди орччөн сулалö-ны югъялысь выль «енэжгыжъялысьяс» да важиник вичкояс, кызди важ черепица крышаяс вуджöны енэжö кайысь стеклöö...

Торйөн окота пасйыны библиотека йывсьыс. Ыджыдсьыс-ыджыд стрöйба, он и гөгөрво, кыті пырнысö, а пыран да — акнитан. Мич йывсьыс нинöм и сёрнитны, а мыйыс сöмын пытш-көсас абу. Дерт, лыддысян залъяс, небөг жыръяс, но таысь öтдор кымынкö конференцзал, концертасян зал и ыджыд сёян-юанін. Татшöм жö сьölöм кылöм менам вöлі, кор медводдзаысь пыралі Тарту университетса библиотекаö — лунтыръясөн сәні окота овны, он и тöдлы, кызди кадыс кольö, да и некутшöм мудз быттö он кыв. Ставсö вöчöма, мед небöга уджыс эз ка-житчы сира мыр бертöм кодьон.

Праздник вылас воöма уна гöсьт. Чолöмасьöмъяс, кыпид сёрни... Вöлі весиг Европарламентса депутат, коді висьталіс, мый öні парламентас тöждсö веськөдöма и финн-угор войтыр дорö, и уджыс кутас мунны водзö...

Праздник кызди тайö луныс коли паметьö и мөдторйөн: миянлы мойвиис сёрнитны водзö вылö удж серти. Шуам, кызди эськö бурджыка лöсьöдны, мед финн-угор войтыр вермисны тöдмасьны öта-мöдыслөн литератураөн, кызди ловзьöдны на-циональной драматургия, кызди котыртны том гижысьяслысь öтувъя велöдчöм да с.в. Кызыс, дерт, ас саяным, но ышöдöмыс быттö колö жö...

**20.10.** Тартуö... Тані дас нель во сайын пестыссис этнофуту-ризм. Удмуртияын сійö ёна тöдчö и öнөдз, миян сылань ёнджы-ка синісны серпасасьысьяс... Буретш Тартуысь поездөн уна во сайын локтігөн чужис мөвп выль журнал лöсьöдöм йылысь. Öні сійö тöдса «Арт» ним улын.

Тарту — студент кар. Эстонияса став кар письыс сійö медся эстонскöй, сәні медся ёна кутчысьöны важас... Карыс зэв мича,

оз өд прѹста миян студентъяс, кодъяс мунѹны сэтчѹ велѹдчыны, кольчѹны овны, семйитѹны да бѹрсѹ оз и локны. Эстония весиг примитѹма положение, сы серти тавосянъ докторантураѹ кутасны примитны сѹмын верстьѹ йѹзѹс, медым тайѹ могыс — велѹдны Россияса финн-угор войтырѹс да бѹр мѹдѹдны гортас вылысджык тшупѹда тѹдѹмлунъясѹн — век жѹ заводитѹс пѹрт-сыны олѹмѹ...

Тартуса университет дорѹ матыстчигѹн кылѹм мужичѹйяс-лысь зѹв кыпѹд сьылѹм. Асьныс оз тыдавын, да кажитчѹ, сьылѹмыс кытыськѹ му увсяныс кылѹ. Сѹсся вылысджык суд-тасянъ аддзим морт нелямына хор... Ставыс мужичѹй... Татшѹмтѹ миян зѹв гежѹда аддзылан...

Тартуын бара аддзысьлѹм лыддысьсысьяскѹд Гижысьяс керкаын, волѹсны и Россияса докторантураын велѹдчысьяс, ѹнѹ сѹнѹ нин олысьяс, Комиысь Николай Кузнецов удмуртка гѹтырыскѹд, мари Василий Николаев да мукѹд...

Лѹччылѹм и Эмайыга (Мам-ю) дорѹ. Ю вомѹныс зѹв ыджыд пос, кодѹ неважѹн на нималѹс став мир пасьта. Пос бокыс зѹв джуджыд, да сѹтѹ ѹна радейтѹны ветлѹдлыны повтѹм йѹз, а ныла-зонма неважѹн медся вылѹас мусукасьѹмаѹсь, и вѹча керкасьыс кодкѹ снимайтѹма тайѹс да снимокыс веськалѹма Интернетѹ... Пос бокас важ поскыслѹн чугун макет. Сѹйѹс ю вомѹныс сувтѹдѹм могысь йѹзыс асьныс чукѹртѹны сьѹм. Эстония 600 во кымын олѹс мукѹд кывъя йѹз улын, и ѹнѹ налы ѹна окота ставсѹ видзны, сѹвмѹдны. Ёна нин радейтѹны асьыныс мусѹ эстонечьясыд...

Рытнас вѹлѹ коллѹдчан гаж. Ѳтлаын йѹктѹсны венгръяс да комияс, удмуртъяс да финнъяс. Ворсѹ гудѹк, сыкѹд тшѹтш венгер инструмент — ставыс ѹти кытшын... А гажыс!.. Ми сьылѹм жѹ кымынкѹ сьыланкыв... Миянкѹд сьылѹсны и финнъяс, куим анъ, да ѹд «Марьямоль» сьыланкывсѹ, вѹлѹмкѹ, миянысь оз омѹльджыка на тѹдны. Кывлѹ, найѹ кѹсйѹны воыны Комиѹ сьыланкывъяс чукѹртны... Сѹдзкѹ, и гортын на, колѹкѹ, сьылыштам...

**21.10.** Сьылан-йѹктан коллективъяс разѹдчисны гортаныс, а ми бара на Таллинѹ... Луннас ветлѹм енѹжувса музейѹ, кытчѹ Эстониялѹн быд пельѹсысь вайѹмаѹсь да сувтѹдѹмаѹсь уна сикас стрѹйба: чери кыйысьяслысь керка и мельнича, важ школа и вичко да с.в. Ми Арвокѹд весиг гычасьыштѹм пѹвъя качай вылын — челядь дырйи татшѹмъясыс уна сулалѹсны сиктлѹн быд пельѹсын, ѹнѹ тай ѹнасѹ ог аддзѹв-а...

**22.10.** Рытнас бара лыддысьсысьяскѹд аддзысьлѹм... Арво Валтон нуѹдѹс миянѹс Эстонияса опера театрѹ. Зѹв джуджыд керка, война кадѹ бомбитлѹмаѹсь пѹ, и йѹзыс, война дырйи на, заводитѹмаѹсь чукѹртны сѹйѹс дзоньталѹм вылѹ сьѹм, и ѹти воѹн мича стрѹйбаыс бара нин сувтѹма ас местаас, абу пѹ дзик сѹтшѹм, кутшѹм вѹлѹма, но век жѹ чуймѹдана: сѹтшѹм сьѹкыд кадѹ, кор и сѹйнысѹ абу быдѹнлы судзсьылѹма, чукѹртѹмаѹсь сьѹм театр кыпѹдѹм вылѹ... Рыт бѹрас миянлы козьналісны театр йывсьыс серпасъяса да кывбуръяса альбом — ставыс сѹтшѹм прѹстѹй, но кутшѹмкѹ мелѹлун сѹдз и ѹвтѹ лист бокъяс-сяныс...

Рыт вылас тшѹтш локтѹмаѹсь «Эстония» котырса йѹз. Тайѹ

пö медся важ котыр, кытчö чукöртчöма важ эст интеллигенция... Локтім, а найö пызанъяс сайын пукалöны: олöма нывбабаяс да мужичöйяс — гижысьяс, актёръяс, серпасасьсысьяс, мукöдыс — статья, вылын юраöсь, ставöн бура сёрнитöны и гөгөрвоöны рочöн. Арво заводитліс сёрнитны эст кывйöн, но залсянь шуисны, сёрнит пö рочöн, ми гөгөрвоам, мед пö и госьтьясыс (ми вöсна тöждысьöны) тшöтш гөгөрвоасны... Ёна и кыпыд вöлі рытыс. Лыддим кывбуръяс, кывзісны зэв сюся... Залсяньыс нинöм эз юасыны, а бөрнас матыстчавлісны, юасисны. Öти нывбаба матыстчис ме дорö да шуис, кутшöм пö лöсьыд збыль поэзия кывзыны, миян томъясыд öнi ёнджыкасö постмодернöн ноксьöны, а ми кодь олöмаяслы пö тіян кывбуръясныд матынджыкöсь...

Ёна чуймöдіс и мöд нывбаба. Матыстчис да зэв збыльпырысь юалис: «Тіян öнöдз на эм асланыд кыв да литература???» Ме весиг шуны тöлкөн нинöм эг куж, сэтшöма шемöсми юалöмсьыс. Тыдалö, юөръясыс йöзöдзыс воöны кутшöмкö мöд пöлöсöсь...

Казьтыла нöшта öти сёрни. Козьналі Андрес Хейнапуулы (финн-угор войтыр Конгресса консультативной комитетö пырысь эст) миян университетса велöдчысьяслысь «Няньöн-солөн» альманахлысь медводдза петас. (Мöд петасыс эськö дась нин, да сьöмыс, буракö, оз вичмы некодарсянь). Хейнапуу кызкö эскытöма видзöдліс ме вылö да шуö: «Мый, тіян весиг татшöмторъяс вöчсьöны? Тайö зэв буртор, зэв вылын тшупöда уджтас. Тадзитö кö, тіян вöсна нинöм ёна повны».

Бур, мый артмылöны татшöм аддзысьлöмъяс, кöнi йöзыс ставсö аддзöны ас синмөн да кылöны ас пельöн. Со и тайö нывбабаыс кутас тöдны, мый коми йöз ловъяöсь да весиг кывбуръяс на гижöны...

Со и ставыс... А арыс и збыль вöлі зарни... Весиг розаяс на дзоридзалисны...

*Сыктывкар—Таллинн—Сыктывкар*



## Он вун тэ, Озью\*

П О В Е С Ъ Т

### ДАС ÖТИÖД ГЛАВА

Витöд бригада уджаліс талун пöшти шойчывтöг. Важöн нин воліс пажын кад, а некод оз думайт мунöм йылысь. Быдöн тэр-масьöны. Асывсянныс вöлі мича поводдя, енэжын ни öти кымöртөр. Артельöн заводитісны куртны. Мойдын моз нюжöд-чисны видз вомöн кос турунлöн кыз лёдзяс, а сэсса сярмунісны юръяс. Видзöдлан на вылö — сьöлöмьд нимкодясö.

Виктор первойсö куртіс жö, а мыйöн лоис лёдз, мöдöдчис юрасьны.

— Мунамöй мекöд,— аскöдыс корис мунны неылын куртысь Тамараöс да Светланаöс.

— Кытчö?

— Юрасьны.

Светлана здук кезлö падмыліс. Көркöя рытса сёрни бöрад сійö ёна нин думайтіс, мый вöчны. Виктор сэки ставсö висьталіс, кызди артмис Зояöс кольöдöмыс, корис бурасьны. Светлана дузъяліс, а сэсса локтіс Полиевт Петрович. Ныла-зонма костын сёрниыс коліс помавтöмöн.

Корис кö талун Виктор Светланаöс öтнассö, гашкö и петитчис на. Кöть нин петкöдліс, мый сійö абу жö кокниа сетчысь морт. Но öні сійö вöлі Тамаракöд. Пöдругаяс видзöдлісны öта-мöд вылас да вöтчисны Виктор бöрся: миянлы пö öткодь, кутшöм удж вöчны.

— Ме кута тумбылавны турунсö, а ті лöсьöдыштöй да кур-тышталöй кольöминъяссö,— велöдіс Виктор. Ачыс мöдіс уджавны сэтшöм вынöн, мый некымын здукöн и чукöртö турун юртö. Светлана да Тамара öдва вевъялöны сы бöрся куртнысö.

— Кöть мед пуксьыштлін,— шуис Светлана.

— Он вевъяв ме бöрся?— сералö Виктор.— Ме тэныд отсышта!

И со найö куимöн нин куртöны лёдз местасö. Тэрмасьöны öта-мöд вежмöн. Виктор кöсйö, мед этшаджык вичмис нывъяслы. А налы абу жö окота кольчыны зонмысь. Видзöдласны öта-мöд вылас, нюммунасны и бара мый вынсьыс кыскалöны ку-ранъяссö.

Турун юръяслöн лыдыс век содіс и содіс. Но недыр мысти во-ліс верзьöмöн Гелий Липин да висьталіс, мый Закар дед да По-лиевт Петрович лöсьöдісны нин зорöд места: позьö пö чöвтны заводитны.

— Бур,— Виктор чышкыштіс пöсьсö.— Висьтав ставыслы,

---

\* Пом. Заводитчöмыс 5—9 номеръясын.

---

мед пажнайтны мунёны. А то сёйтёгыд юръясыд оз мёдны кыпавны зорёд вылад. Да и сідзи нин важён колис пажын кадыс.

Гелий рёдйён мёдөдчис видз вомён, коралис куртысыяс да юрасысыяс бригада оланінё.

— Талунъя уджсыныд тиянлы ковмас сетны ударнөй норма,— сералис Виктор, кор вөрзёдчисны мунны.

— Тэ өд бригадирыс,— видзөдліс Светлана.— Тшөкты пөварыслы.

— Тадзи уджалігд и куим норма оз кут тырмыны,— сералис Тамара.

Сёйтөдз ставён купайтчисны. Вывті нин ёна пөжө шондіс. Жарысла лолавны нинөмөн. А пажын бёрын пыр и бөр мёдөдчисны удж вылө. Быдён гөгөрвоёны, мый турун пуктігд оз позь воштыны татшөм мича кадтө.

Виль зорёд местаө регыд воисны медводдза юръяс. Кыскалөны найөс вөвъясөн Гелий Липин да Ким Микушев. Полиевт Петрович, Виктор да Феликс, коді талун эз ытшкы, кокныда босьтлісны тайө юръяссө да пөшти разөдлытөг пуктывлісны зорёд пинь костъясө.

— Төдчө тай, трасичаяслөн, томлуныд,— тшөкөлдывайтіс Закар дед, коді босьтчис зорёд таявны. Сійө вывсянь велөдіс чөвтысыяс, кыдзи да кутшөм местаө лөсьыдджык пуктыны турун пластсө.

Кор өдйө артмө зорөдыд, сэки и поводдя вылад омөльджыка дзорган. А Озью весьтө өтарсянь и мөдарсянь кутісны нин зырөдны сьөд юра кымөръяс. Первойсө найө мыччысисны ньөжйөникөн, быттьө полігтыр, а сэсся вочасөн век вельмисны. Первойён казяліс найөс Закар дед. Зорёд вывсяныд, буракө, сылы ылысянджык тыдалө.

— Колө, другъяс, тэрмасыштны,— шуис сійө чөвтысыяслы да индіс небесалань.— Вермас өд дзугны. Мися жө, татшөма вөлі пөжө да.

— Ноко, вай злөдчыламөй,— горөдіс Виктор, сэсся кутіс тэрмөдлыны юр кыскалысыяс, мед найө өдйөджык лэбалөны өтаррө-мөдарө. Сөмын мед юръяссө оз киставны-а.

Тайө юөрыс регыд паськаліс и куртысыяс да юрасысыяс пөвстын. Найө мый вермөмысь заводитісны топөдны өтарсянь да мөдарсянь эштөдтөм на лөдзяс, чукөртны турун юръяс, отсасыны юр бөр куртысыяслы.

— Нывъяс, зільджыка!— горзісны зонъяс.

— Асьныд эськө мед өнджыка тэрмасинныд!— воча горзісны нывъяс.

Неылын юрөбтысь первой гым ещө өнджыка өддзөдіс видз вылын уджалысыяс. Найө өні эз кывны ни мудзөмсө, ни сыліөд визувтысь нылөмлысь лэччөмсө. Ставён мөвпалісны сы йылысь, кыдзи зськө видзны көтасьтөг кос турунсө. Кодкө, кылө, горөдіс паськыда төдса сыланкыс:

**Казялісны найө,  
Мый сьөд кымөр кайө —  
Видзяс весьт,  
Юръяс весьт  
Төвныр сійө вайө.**

Видз разнѡй помѣясин сылы воча юрѡбтисны:

Ќддзѡдчис став куран —  
Ќти дум быд юрын:  
Мед совхоз  
Веж да кос  
Босьтас татысь турун.

Сбылѡмыс ещѡ на содтис куртысьяслысь да зорѡдасьысь-яслысь вынсѡ.

— Дзикѡдз, буракѡ, гажмис карад миян сьылысьыд,— шуис Полиевт Петрович.

— Ті код йылысь?— эз дзик пыр гѡгѡрво Феликс.

— Турьева Зояыд, мися, кытчѡкѡ вошис.

— Гашкѡ, трасичаыд, верѡсѡс нин аддзис да,— сьуйсис сѣрниѡ Закар дед.— Либѡ кокни олѡм корсьѡ. Вѡвлі коркѡ миян сиктын ѡти нывбаба. Граняѡн нимтылісны. Сійѡ вѡлі век шуѡ, кѡть пѡ кута сѣйны лун кост мысти, но мед эськѡ карса улича кузя пѡ-каживайтны.— Ышловзис да содтис.— Со ѡд кутшѡм йѡз на овлѡны. Татшѡмыдлы овны сиктын да мѡс лысьтыны — яндзим, а кутшѡмкѡ министерствоысь пос помсѡ чышкыны да зыртны — любѡ.

— Тѣ, Закар дед, век ассьыд философиятѡ нуѡдан,— нюмдіс Виктор.

— Олѡм йылысь сѣрнита,— шуис Закар дед.— Сідзи, кыдзи ме гѡгѡрвоа. Да и ог сѡмын ме. И тѣнад мамыд тшѡтш. И Озьюдінса пѡшти став олысьясыс.

А тайѡ кадас Николай Нечаев да Модест Скрипов пукалісны палаткаын да картіасисны. Николай водзмѡстчис: ме пѡ ѡд вися, а тѣныд нинѡм жѡ вѡчны, кор вѡвъястѡ нуисны удж вылѡ. Йигѡ Закарыд талун оз тшѡкты тѡчилатѡ бергѡддыны.

Ворсисны, кытчѡдз эз казаяв талунѣя пусьысь Граня, ичѡтик тушаа, но збой нывка.

— Йѡзыс уджалѡны, а найѡ пуксьѡмаѡсь картіасьны,— горѡдіс сійѡ, кор видзѡдліс зонѣяслѡн олан палаткаѡ.— Ѳні жѡ весасьѡй, яндысьтѡм синѣяс!

— Кутшѡм тѣныд делѡ миян дінѡдз,— былѡдіс синѣяссѡ Николай.— Вешйы татысь!

— Талун ме тіянѡс верда!— нывка лѣптыліс кабырсѡ.— Пань джын рок ог сет! Кутанныд тѡдны!

Но Николай да Модест пыдди эз пуктыны сылысь видчѡмсѡ. Найѡ и Граня роктѡг на оласны. Модестлы мамыс сѡвтлис сы мында консерв, еджыд сукар да печенье, мый кык вежон кежлѡ тырмас.

Кор воис ужнайтан кад, а йѡз эз локны, Граня ачыс муніс уджалысьяс дінѡ. Сійѡ гѡгѡрвоис, мый водзджык пусис ужыныс. Мунігас ещѡ стрѡжитис кык другѡс, мед найѡ эз лысьтыны матыстчывны пѡртѣяс дорѡ. Зорѡд дінын Граня висьталіс картіасьысьяс йылысь.

— Трасичаяс!— дѡзмис Закар дед.— Абу ме налѡн бать, эськѡ этайѡ кураннас мерайті мышѣяснысѡ.

— А ме найѡс ог верда,— пуысь рок моз броткѡдчис Граня.

— Правильнѡ вѡчан, Граня!— шуис Полиевт Петрович.—



Коді оз уджав — сійö оз сёй. Но тайö этша. Ковмас сёрнитлыны накöд, мед прамöйджыка мөрччылас.

Кöть кутшöма эз тэрмасьны, став кос турунсö меститны век жö эз удитны. Чардаліс да гымаліс дзик нин юр весьтын. Шарöбтісны гырысь зэр тусьяс. Закар дед лöсьöдліс турун пласть-яссö сідзи, мед öдйöнджык ёсьтыны нель пинь кост лыдысь кöть кыксö. Но ведраысь моз заводитіс кисьтны. Чöвтысьяс топöдчисны зорöд бердö, а куртысьяс сямунісны öтарö-мöдарö. Кодъяскö котöртісны бригада оланіно, кодсюрö, кöтасьöмысь полысьяс, пырисны матыса вөрö.

— Кузь пуяс улас сöмын эн сувталöй!— велöдіс найöс Закар дед.— Гым-ньювыс лыяс!

Зэрис вель кузя да чорыда. Кор неуна кобыштіс, мöдöдчисны палаткаяс дорö. Нывъяслөн кокныдик платтьöясыс сідзи ляс-кысьöмны яй бердас, мый ортсысянь быд сөн тöдчö. Талун водзö уджалöм йылысь нинöм вöлі и думайтны.

## ДАС КЫКÖД ГЛАВА

Бара нин небесаын вашмунöма шонді, быттьökö абу и вöвлö-маöсь ни тöрытьяс сьöд кымөръясыс, ни зэрыс. Синнад он казяв, а кылан, кызди бөр заводитö шонавны ыркавлөм муыс. Небыдик васöд ру öвтыштö нырад.

— Мича лоас луныс,— плеш дорас кисö вайöдлөмөн чатрасьö Закар дед. А том йöз сöмын на чеччöны, лэччöны ва дорö мыс-сьыны.

Закар дед матыстчö Виктор дінö, шуö:

— Шуравлөм туруны, пиö, öдйö косьмас. Öні кö асывнас бергöдлыштан, пажын бöрын позяс и куртны заводитны.

Завтрак бöрын Виктор шыöдчö зонъяс да нывъяс дінö, мед босьтасны сьöрсьыс куранъяс да косаяс. Первой пö бергöдлыш-там турунсö, а сэсся мöдам ытшкыны, кытчöдз вөрöшитөм туруныс оз косьмы.

— Правильно!— горзöны зонъяс.

И со видз пасьталаын нин тыдалöны разнöй рöма майкаяс, платтьöяс. Том йöзлөн унзільыс вошöма нин, шмонитöны, сералöны.

Тамара да Светлана уджалöны орччөн.

— Волы татчö! Волы жö öдйöджык!— друг кутіс чуксавны Тамараös Светлана.

— Мый нин лоис?

— Волы, видзöдлы,— корö Светлана, ачыс копыртчöма да дзоргö муас.

Тамара пуктіс курансö, матыстчис Светлана дінö. Сы водзын, муас, вöлі кутшöмкö лэбачлөн поз. Сэні куйлісны нель ичöтик, муртса гөнсялыштөм пи да öта-мöд вежмөн паськöдлісны виж вомъяснысö.

— Ой, кутшөм ичöтикöсь!— öтиös босьтіс да пуктіс ки пыдös вылас.— Сэтшөм мусаникöсь!..

Позсянь неылын жбыръяліс лэбачпиянлөн мамныс, чирзис, тöждысис аслас быдтасьяс вöсна.

Тамара корис Светланаös öдйöджык бөр пуктыны лэбачписö позъяс, ачыс котöртліс кустьяс дорö, вайис сэтысь кык бедь да сатшкис позсянь неылö, мед не талявны позсö куртігөн да юра-

сигөн. Сөмын ылыстчыштисны нывъяс — лэбач-мам пуксис нин поз вылас.

Недыр мысти пуксисны шойччыштны.

— Светлана,— вашнитіс Тамара.— Көсья юавны өтитор... Позьö?

— Мыйла нө оз?

— Ті Викторыскөд мыйла өтдортчаннуд?

— Ми?!— пельпомсö лэптыштліс Светлана.

— Тöдä өд,— шуис Тамара.— Важөн нин казялі. Зоя вöсна лө-  
галан. Викторыс өд тэнö радейтö. Сөмын ачүд йөйталан... И мөд-  
сö тшөтш... Колö бурасыны...

— Тэкөд Викторыс сёрнитліс али мый?— чуймис Светлана.

— Эз,— веськыда висьталіс Тамара.— Ме ачым. Ме сьölөм-  
сянь көсья, мед ті дружитіннуд Викторыскөд.

— Ладнö!— чеччис Светлана.— Йöзыс дышгъясөн нимтасны.

А сьölөм вылас нывлөн кокняммис.

Виктор, Закар дед да Полиевт Петрович тані эз вöвны. Найö дасьтисны зорөд места: вайисны раскысь да сутшкалісны пиньяс, вольсалісны утөдъяс. Налы жö отсасис талун и Николай Нечаев, но кыв ни джын эз на сетлы, быттьö вомас ва босьтöма. Скöра-  
лö, көть и нинöмысь.

Нывъяс корөм серти тöрыт рытнас Виктор нарошнö чукөртліс бригаднöй собрание, мед сёрнитыштны кодсюрöлөн омöль дис-  
циплина йылысь. Медъёна вичмис Нечаевлы да Модестлы. Заво-  
дитлісны жö щөтясъны кык друг, но лоис ланьтны. Нечаев дор-  
йис другсö, мый сійö нинöмысь абу мыжа. Асьныс өд пуктисны сійös конюкас да ещö тшөктисны отсасыны Йигö Закарлы. А кар-  
тиасъыштисны найö прöст кадö.

Тайö собрание вöснаыс Николай Нечаев ещö ёнджыка кутіс лөгавны Виктор вылö. Сійö каитчис татчö локтөмсъыс. Опонь пö вöлі нуөдö уджавны кутшөмкö экспедицияö... А öні татысь бурөн он мын, көть и збыльысь висьман. Грөзитчöны сетны лёк характеристика, мед оз примитны водзö велөдчыны. Дерт, быдлаын кутасны медводз видзөдны оценкаыс вылö (найö Нико-  
лайлөн бурөсь), но век жö лёк характеристиканад абу лөсьыд.

Зорөд места эштөдөм бöрын лоис мунны ытшкыны. Кадыс вöлі водз на, а турун бергөдлөмсö эштөдөмаөсь нин. Сэтчö жö вөтчис и Закар дед, заводитіс лэчтасыны.

Гоз-мөд покос нуөдөм бöрын дед ачыс матыстчис Николай дінö.

— Вайлы косатö,— корис сійö.

— Абу ныж,— нурбыльтіс Николай.

— Вайлы,— эз эновтчы Закар дед.— Али критика бöрад ныж косаыд лэчүд?

Нечаев бугжыльтліс сы вылö сингъяссö да чургөдіс косасö.

— Критикаыд — бур делö,— коса лэчталігмоз сёрнитіс За-  
кар.— Сійö тайö зудйыс кодъ жö.

Аски асывнас Озьюын лоис виччысьтөмтор. Завтрак бöрын, кор йöз сөмын на вöлі лөсьөдчöны удж вылö, бригада оланінö котөрөн воис Модест да зэв повзьöм гөлөсөн висьталіс, мый кулöма Гудок нима вöвныс.

— Кыдзи кулöма?!— чуймисны ёртгъясыс.

— Кулöма, и — ставыс,— пошкис Модест.— Джагалöма.

— Ветламөй!— уськөдчис Полиевт Петрович. Мукөдъяс тшөтш котөртисны. Медбөрын пошиктис-вөтчис Закар дед.

Кустъяс сайын, нейджыд эрд шөрын, куйлис Гудоклөн шойыс. Сы гөгөрысь нальсьома став туруныс, весиг муыс гөрсьома. Вөв голясянь муö тувъялөм майөгөдз струна моз зэлалөма певйысь кызджык гез.

Закар дед сюся видзөдалис гөгөр, матыстчис вөв шой дорө, кутчысис шыркнитчөм гөрөдө.

— Тайö тэ, трасича, тадзи көрталін?— синъяснас сотыштис Модестос.

— Гелий,— нурбыльтис зон.

— Ме?

— Дерт тэ,— збоймыштис Модест.— Тэкөд өтлаын рытнас вайөдiм вөвъяссö... Вунөдiн али мый?

— Эг вунөд,— шуис Гелий Липин.— Ме отсалi вөвсö вайөдны палатка дорсянь татчөдз... Но Модест көртавлis гезъяссö. Ме сöмын тувъялi майөгсö...

— Вот-вот!— пыр и крукачис Модест, а Николай другыс бокысянь горөдiс:

— Оз и ков соссьыны!

Тамара кватитис воксö ки пөлөдыс да кыскис вөв шой дорө:

— Тэ көрталін?

— Эг,— бөрддзис Гелий.— Ме тадзи ньөтчыд вөвтö ог домавлывлы...

— Эн бөрд, Гелий,— бурөдiс Полиевт Петрович.

— Прөстөсьыс шуöны да,— сыркъялис детинка.

— А кодi көрталis да домалis Печиксö?— друг юалis Полиевт Петрович да индiс водзын йирсьысь вөв вылө.

— Ме,— тшапа шуис Модест.— Сийö тай немтор абу лоöма.

— Видзөдлам,— водзын йирсьысь вөв дiнö веськөдчис Полиевт Петрович. Ставөн мөдөдчисны сы бөрся.

Вөв лэптис юрсö, кутис быттьөкө шензбыны, мыйла сы дiнö өтпырйö локтöны та мында йөзыс. Полиевт Петрович кутис вөлос юрөдыс. Печиксö вöли домалөма Гудоксö моз жö.

— Аддзанныд?— юалis учитель.

— Аддзам,— шыасисны некумынөн.

— Да-а,— юрсö бергөдлis Закар дед, дивитис Модестос:— Верстыö мужик нин, а тадзи домалан вөлос. Мөд вöлыс тшөтш вермис джагавны.

— Мед велөдiнныд!— горөдiс Модест да бергөдчис мышкөн.

— Правильнö!— сы дор сувтис Нечаев.— Модест абу мыжа!

— Кодi нö мыжаыс?— пузисны мукөдъяс.

— Кодъяс пуктисны конюкнас.

— Яндысьтөм синъяс!— горөдiс Светлана.— Чайтан, ог төдöй, мыйла тадзи заводитiнныд сёрнитны кык друг? Көсьянныд босьтны водзос собрание вылын пинялөмысь? Оз удайтчы.

— Тайö бөрас нин,— шуис Полиевт Петрович.— А öнi, медводз, ковмас акт гижны. Гижны ставсö сiдзи, кыдзи вöлис. Кырмавны сийос став бригадөн.

— Тi мунöй палатка дорас, гижöй, а ме местита шойсö,— шуис Закар дед.

Виктор да учитель кольчисны бригада оланiнö, а мукөдыс ставөн мунисны куртны. Модест талун эз жö кольчы мукөдсьыс,

босьтіс куран да кутіс вѳтчыны на бѳрся. Сійѳс, дерт, некод эз ысты, но ачыс мѳдѳдчис куртнысѳ: ме пѳ талунсянь абу нин конюк и абу Йигѳ Закарлѳн отсасьысь.

Нечаев Николай сувтовкерліс, виччысьыштіс другсѳ.

— Оз ков сетчыны,— кутіс сійѳ шѳпкѳдны Модестлы.— Тэ абу мыжа, и — ставыс. Мед велѳдісны домасьнысѳ. Мед эз пуктыны конюкас.

Пажын дырйи акт кырымалісны бригадаса став членъяс, Модестысь да Николайысь ѳтдор. На водзын эз мѳдны кевмысьны. Актын вѳлі стѳча гижѳма, мый лоис тані асывнас. Виктор да Полиевт Петрович эз мѳдны весиг гижны управляющѳйлы торъя письмѳ: тайѳ актсьыс ставыс лоас гѳгѳрвоана.

Закар дед, Виктор да Полиевт Петрович заводитісны ѳтлаын думайтны, мый вѳчны водзѳ. Колис бригадаын ѳти вѳв. Машина-ѳн ытшкыны он нин вермы. Ковмас кодлыкѳ лѳччывны сиктѳдз.

Сиктѳ вѳвла мѳдѳдчис Закар дед. Лѳччас подѳн, а бѳрсѳ локтас верзьѳмѳн.

— Кутшѳм поклонъяс лоасны гортъясад?— пажнайтысьяс-лысь юасис Закар дед.— Кодлы мый вайны?

— Небыд нянь,— корисны нывъяс.

— Тайѳс ме и тиянтѳг тѳда,— шуис Закар дед, картузасис, босьтіс ки пѳлас брезентысь вурѳм шабурсѳ да петіс туйѳ.

## **ДАС КОЙМѳД ГЛАВА**

Карысь воан лунѳ Зоя узис пѳшти рытѳдзыс. Чуксалісны уж-найтны. Пызан сайын мам юасис тѳѳтка йылысь, а батъ чѳв оліс, быттѳѳ эз кыв эня-нылалысь сѳрнисѳ. Сѳмын сѳк, кор Зоя вѳч-чис да мѳдѳдчис гуляйтны, батъ шуис:

— Майбырѳй олѳмѳй, сѳмын гуляй-валяй...

— Эн пов,— вочавидзис Зоя.— Дась нянь сѳйысьѳн ог ло. Ѳні жѳ кежавла бригадир дінѳ, аски видз ылѳ муна.

— Коліс мунны сѳтчѳ, кытчѳ вѳлі тшѳктѳны,— буркнитіс батъ.

Зоя муніс клубланъ, кытчѳ быд рыт чукѳртчѳны том йѳз. Кодъяс оз кѳйыны пырны кино ылѳ, тані йѳктѳны. Кодсюрѳ ворсѳны волейболѳн. Зонпосни сѳр войѳдз чужъялѳны футбольнѳй мач. Но ѳні вѳлі страдна кад, и та йылысь позис казьявны клуб дорѳ матыстчигѳн на. Кѳкъямысѳд класс помалысьяс эз вѳвны. Мукѳд зонъяс да нывъяс, кодъяс век воывлѳны клубѳ, эз жѳ вѳвны. Турун пуктігѳн найѳ узълѳны видзяс ылын, вежонъясѳдз оз воыны гортѳ.

Зоя сулыштіс клуб дорын, лѳччыліс бужѳд дорѳ да видзѳдыштіс Эжва ылѳ, сѳсся ветліс бура ылѳдз мир туй кузя да бѳр локтіс сикт шѳрѳ. Недыр мысти татчѳ жѳ воис Альберт аслас кык ѳрткѳд. Накѳд тшѳтш вѳлі и Опонъ.

— Вот, Альберт, тѳдмасьѳй.— Опонъ индіс кинас Зоя ылѳ.— Миян сиктын медся мича нылыс, кыдз шуласны, мичлун кузя королева. Абу сѳмын миян сиктын, а пѳжалуй, став республикаын.— Тѳдчис, мый сійѳс воѳм йѳзыд гѳститѳдѳмаѳсь нин.

— А ми важѳн нин тѳдсаѳсь,— дивитан синъясѳн видзѳдліс сы ылѳ Альберт.

— Вот кыдз,— читкыртчыліс Опонъ.— Кора извинитны.

«Пеж гаг тэ,— зывока видзёдліс сы вылё Зоя.— Карё лэччигон колльодін медся лёк кывъяснас, а öні вöв моз нюмъялан да быд ногыс ошкан. Вина румка вылё дась вузавны рöднöй мамтö».

— Кытчö мöдінныд?— юаліс Альберт.

— Петі ыркöдчыны.

— И ми сідзи жö,— шуис Альберт.— Окота видзöдлыны сиктнытö, кодöс сэтшöма ошкинныд.

— Эз кажитчы али мый?— нюмдіс Зоя.

— Абу гажтöм, ньöти абу гажтöм,— Альберт кытшовтіс синъяснас ас гөгöрыс.— Велалам — оз ло окота мунны.

— Кольчöй миянö,— серöктіс Зоя.

— Öти невеста со эм нин,— бара сёрниö сюйсис Опонь.

— Тэ кöть нин ланьт,— букуша видзёдліс сы вылё Зоя.— Бара нин синъясыд былялöмаöсь...

— Тэд кутшöм делö?— горöдіс Опонь.— Тэнсьыд ог ю.

— Бур йöзыслысь.

Опонь кутіс жöдзны места вылас. Сійö лапйöдліс Альбертлы пельпомас, сэсся индіс сельпо лавка вылё, кутчысьліс аслас шуйга килутшö, көні прамöй йöзлөн часі овывлö: колö пö тэрмасьны, лавкаыд регыд пöдлассяс. Но зонъяс эз тэрмасьны.

Альберт кыскис зепсьыс куим шайта да мыччис Опоньлы. Сійö пöшти котөрөн мöдöдчис лавкалань. Кык тöдтöм зонмыс веськöдчисны ва дорлань. Зоя да Альберт колины кыкөн.

— Ветлам сикт помöдзыс,— кутіс нуöдны Альберт.— Окота видзöдлыны Озъюдін сиктнытö дзоньнас.

Зоя любöпырысь мöдöдчис ськöд. Сылы окота вöлі, мед адзылісны тайö зонмыскöд и Виктор, и Светлана, но найö öні ылынöсь.

— Ті тані дыр кутанныд овны?— юасис Зоя.

— Гашкö, тöлысь либö дырджык,— висыталіс Альберт.— Но ми сиктас олам зэв регыд — каям Озъю йылö. Сэні миянöс удж виччысьö.

Нем виччысьтöг паныдасис школаса директор Елена Васильевна Латкина. Сійö юаліс, кызиджык Зоя ветліс карö. Сэсся шуис, мый көкъямысöд класс помалысьяс ставөн кайисны пуктысьны Озъю йылö. Ещö корис, мед Зоя пыралас кутшöмкö кадö сы дінö да босьтас восьмилетнöй школа помалöм йылысь свидетельствосö. Альберт сулаліс да кывзіс сёрнисö.

Зоя эз тöд, кытчö воштысьны. Öти-кö, сылы вöлі зэв яндзим, мый Елена Васильевна паныдаліс сійöс тöдтöм зонкöд öтлаын; мöд-кö, воссис теплоход вылын сылөн пөръясьöмыс.

— Менö виччысьöны гортын,— мöдіс друг тэрмасьны Зоя.

— Виччысьыштласны,— шуис Альберт, но ёнасö эз көвъясь.

— Аддысьлытöдз,— кинас öвтыштіс Зоя да котөрөн моз мöдöдчис гортланьыс. Сьölöм вылас лои зэв лöсьыдтöм. Гашкö, тайö сы вöсна, мый сійö думсьыс заводитліс нин лыддыны Альбертöс первой паныдасьысь мортысь матысаджыкөн.

Пошта вылысь петіс Никифор Сидорович Скрипов, пöсялöма, синъясыс долыда нюмъялöны. Матыстчис стен бердас вöчöм лабич дорö, пуктіс полевöй сумкасö да гөр дора фуражкасö, кокныда лолыштіс, сэсся кыскис зепсьыс носöвöй чышъян, заводитіс öвтны чужöмас.

Ыстыліс Сыктывкарё аслас начальствоы акт браконьер Расов Захар Игнатьевич йылысь. Актыс быттё ваё вёйис. Лоис звёнитлыны. Дыр эз сетны карсё, лун джын лоис тані воштыны. Став работникъяс сәні удж вылысь раздчисны. Но Никифор Сидорович виччысис, начальниклы квартираас звёнитліс. Волёма актыс, но абу на примитёмаёсь некутшом решение. Сәні, вылыс инстанцияын, ошкёны Никифор Сидоровичёс: котъ пё нарушениеыс абу ыджыд, но дейстуйтан правильнө. Молодеч пё. Сідзи и шуисны. А тайё нин кутшомкө авторитет. Никифор Сидоровичлы өні дзик веськодъ, вочасны оз мыйкө Расовкөд. Весиг бурджык, немтор кө оз вочны. Скриповлөн тай лои юөртөма-а. Мудзлытөг тышкасьö браконьеръяскөд. Вот тадз. Сэсся и Закарсö лоис повзёдыштөма. Кутшөмакө босьтөма водзёс важся лөгаломсьыс.

«Өні оз ло грек и өти доз ньобны»,— думыштіс Скрипов, видзөдліс часі вылө да кутіс тэрмасьны лавкаө.

Тані Скрипов и паныдасис Опонькөд, коді вөлі винала жö локтөма. Продавщица деньгасö босьтөма, но винасö оз сет, воддза уджйөзсö сылысь бергөдөма. Опонь висьтасис, мый абу аслас тайö деньгаыс, оз аслыс ньобась, но сылөн дзайгөмыс вөлі дзик весьшөрö.

Скрипов нуөдіс Опоньёс гортас. Менам пö өти ыджыд мог эм, көсья вөлі буретш тэ дінö волыны. Рыбинспектор зурасьöма моторнөй пыжнас тыасьом керйö да прамөя жугөдөма. Колö вөчысьёс медавны. А кутшом мужикёс аддзан страдна кадö? Став надеяыс уси Опонь вылө, коді мыйсюрö вөчавліс нин Скриповлы.

Скрипов гөтыр өдйö чукөртыштіс пызан.

— Модестныд турун пуктö?— кутіс юасьны Опонь, мед не чөв овны.

— Мунісны тай кытчөкө-а,— ышловзис Скрипова.— Немтор оз кывсьы. Лун и вой думайта та йылысь. Никифор оз жö кайлы дай.

— Пыжёс дзоньталам да кайла,— шыасис Скрипов.— Удж кузя колö жö сэтчö волынысö.

— Черисö ёна кыянный?— юалис Опонь.

— Весиг чунь кузяёс оз вайлы,— висьталіс көзяйка.— А ещö рыбинспекторөн шусьö.

— Та вөсна и ог кый,— стрөга шуис Скрипов.— Ме морт принципиальнөй. Шуөма оз позь — сідзкө, оз позь. Лоас вылісянь индөд — пöжалуйста.

— Аски асывнас жö и дзоньтыштам пыжтö,— көсйысис Опонь.— А то сэсся кадыс оз ло, көсья тайö экспедицияас уджалыштны медасьлыны.

— Буртор думыштөмыд,— ошкыштіс Скрипов.— Уджтөг овны оз позь. Тайёс жö и Модестлы пыр шуа. Удж мичмөдö мортёс. Вот тадз.

Юисны өти, сэсся мөд стопкаөн.

— Озью йылөдз мөдөдча,— бара казьтыштіс Скрипов.— Öні сәні турун пуктысьяс. Гашкө, кызди пакөститчөны? Расов сәні и. Менам участокын мед быдлаын вөлі пöрадок. Вот тадз, Афанасий.

Мөд стопка юөм бөрын Опонь дзикөдз коддзис. Скрипов сэсся сылы эз нин кисьт, а сулясö пробкаалис да суйис шкапас. Опоньлы ковмис довгыны гортланьыс.

— Жмот!— Скрипов патераысь петөм бөрын мургыштіс сійö.



## ДАС НЁЛЬӨД ГЛАВА

Закар воис гортас шонді лэччандорыс нин. Пёрысь мортыдды омоль туйёдыд вель дыр лои кыссыны. Гоз-мёдысь пуксьыліс шойччыны, лолыс дзикөдз тырө да. Думайтө на вөлі веськыда контораё мунны, а сэсся казяліс, мый талун сэтысь некодөс нин оз су.

Гөтырыс быдөн повзис, кор Закар пырис керкаё. Коді нө кужас виччысьны? Лоис пыр жө висьтавыны, мый ставыс лючки-ладнө, мед оз майшась. Та бёрын Öгренена кватитіс ки тыр сартас, тыр-төм ведра да лэчис пывсян ломтыны. Туйысь воём мортөс мед-водз пывсьөдлөны. А гожся кадө, кор ёна öвада, видз вылын уджалысьясыд и туйө петавтөг быд рыт корөсьөн швачкөдчөны, ном-геб курччалөминтьяс лечитөны.

Недыр мысти Закар ордө кутісны чукөрмыны суседкаяс, пыв-сянсьыд пуритысь тшынсө казялөмаөсь да.

— Öгрененалөн тай гөсть воёма,— шуалісны бабаяс.

— Тавой вөтөн аддзылі,— шынняяліс Öгренена.

— Вот, трасичаыд,— серөктіс Закар.— А ме чайті, вунөдін нин.

Суседкаяс, дерт, окота вөлі төдмавыны, кыдзи олөны сэнї налөн нывъясыс да пияныс. Закар висьтавліс, мый ставыс дзонь-видзаөсь, уджалөны вывтї зіля: вель уна мича турун пө нин зорөдалім.

Эз көсйы, но быть ковмис висьтасьны, мыйла кості локтіс.

— Дивө тай!— шензисны бабаяс.

— Дивө көть абу,— ышлолаліс Закар. Сійө висьталіс, мый аски жө босьтас вөв да бөр мөдөдчас. Кодкө кө мыйкө көсйө ыстыны, мед вайөны.

Аскинас час квайтын кымын Закар муніс совхозса отделе-ниелөн контораё. Иван Михайлович Спирин, кыдзи и век, вөлі тані нин: гожся каднад сылөн оз узьсы.

Закарөс аддзөм бёрын управляющөй чуймис. Старик перйис питшөгсьыс бумага лист да мыччис управляющөйлы. Сійө лыд-дис, дыр чөв оліс, сэсся ышловзис:

— М-да. Нарошнө али мый кодкө тайөс вөчис?

— Некод, Иван Михайлович, нарошнө эз вөч,— пуксис Закар.

— Сідзкө, Модест мыжа?

— И сійөс ог тырвыйө лыдды мыжаөн,— шуис старик.— Ме, тыдалө, эг сяммы велөдны сійөс вөвсө домавыны.

— М-да,— бара шуис управляющөй.— А менам өд быд вөв бумага вылө гижөма...

— Төда.

— Мый кутам вөчны?

— Ковмас кө, ассьым керкаөс вузала, Иван Михайлович,— чеччыштіс места вывсьыс Закар.— Сөмын Модест вылө ыстысь-ны оз ков. Ме төда батыслысь сямсө. Нинөмө вөчас детинасө...

— Думаыштам,— шуис Иван Михайлович, сэсся кутіс юась-ны, кыдзи уджалө Озъю йылын вель бригада, сулаліс-ө ыстыны сэтчө том йөзсө.

— Правильнө вөчинныд, Михайлович,— сюркняліс ассьыс висьтсө Закар.— Уна турун шедас. Сөмын өнісянь нин колө бурджыка думаыштыны, кыдзи вайны сійөс.

— Ваям,— шуис управляющөй, Закарлы тшөктіс босьтны

асланьс бригадаысь ещö öти вöв да бöр мöдöдчыны. Сöмын корис кайигас кежавлыны татчö. Сёрнитла пö библиотекаса заведующöйкöд, мед вичмöдас Озьёö свежöй газетъяс.

Контораысь петöм бöрын Закарлы вочаасис татчö тöвзысь Скрипов.

— Мый лоис миян Модестыскöд?— пошкигтыр юалис сійö: кыськö мортыд кывлöма нин Озьюса делöяс йылысь.

Закар быттö эз и кывлы юалöмсö, руныгис водзö:

— Враг тэ, кöть и медальяса,— сöдзöдiс пинь пырыс Скрипов.— Жаль, эн веськав менам гыж улö во дас сайын. Но и öнi на абу сёр.

Скрипов пунктiс фуражкасö юр вылас да веськöдчис совхозса отделениелöн контораö.

— Здравия желаю, Иван Михайлович,— шыасис сійö порог дорсянь, кыдзи вöчлывлö быд волiгöн.

— Лок пуксы, Никифор Сидорович.

— Кывлi, лöма ЧП,— матыстчис да пуксис пызан дорö Скрипов.

— Со тай,— мыччис сылы управляющöй актсö.

Скрипов паськöдiс бумага листсö, то гöрдöдлiс, то кельдöдiгтыр лыддис. Спирин быттö дзикöдз вунöдiс Никифор Сидорович йылысь, ноксис бумагаясöн.

— Öнi меным ставыс гөгöрвоана,— шуис Скрипов.— Водзöс көсйöны мынтыны. Найö браконьерствуйтöны, а меным... Но оз артмы, Иван Михайлович! Вот тадз.

— Тэ мый йылысь, Никифор Сидорович?— видзöдлiс сы вылö Спирин.

— Öнi жö ачым кайла Озью йылöдзыс,— чеччис сійö улöс вылысь да сапöг каблукнас зымöдiгтыр кутiс ветлöдлыны кабинет джодж кузя.— Ачым кайла... Вот тадз...

— Некод öд оз кут,— лöня шуис Иван Михайлович.— Талун сэтчö Закар бара мöдöдчö. И ме ачым тшöтш кайла... Тадзи кö нин тэ шуин... Мед оз лоны йöз костас уна нога сёрнияс. А сэсся вöлыд öд абу кутшöмкö конверт, кодöс позьö чöвтны пошта кудйö...

— Тi менö чуткаланныд?— пузис Скрипов.— Эн вунöдöй, Спирин ёрт, Закар Расов кодь йöзыд вермасны на вайöдны судö и тэнö... Да, тэнö... Вот тадз.

Управляющöй нюмдiс. Тайö, буракö, ещö на скöрмöдiс Никифор Сидоровичöс. Сійö салдат моз крута бергöдчис да петiс кабинетысь сэтшöм жö öдйö, кыдзи пыралiс.

«Закарыдкöд öтлаын, тыдалö, и збыльысь меным тшöтш лöö кайлыны,— кутiс думайтны Иван Михайлович, кодi первойсö сёрнитiс рыбинспекторкöд сöмын шуткаөн моз на.— А то тайö Скриповыд сэнi ставсö сiдзи гартас, мый бöрас некутшöм пом он аддзы».

Управляющöй тшöктiс лöсьöдны вöв, но контораын ковмис на ноксыны час кык-куим. Отделениеын чöвтан машина сöмын öти. Кык бригадир венö воöмаöсь, юксыны оз вермыны. Лоис öчередь лöсьöдны. Волiс плöтник Савельев. Складыдлөн юрыс пö эштiс, колö шифер. Иван Михайлович звöнитлiс (кымынöдысь нин) «Сельхозтехникалөн» районнöй отделениеö, көнi бара вись-талiсны, мый шиферыс көнкö туйын, но весиг карöдз на абу воöма. Зоотехник локтiс. Мыйлакö йöвлөн жирностьыс бара

чинёма. Та йылысь помодз эз сёрнитны, локтісны экспедиция воеьс йёз. Корёны кызкё-мыйкё вичмодны налы отсөг вылө коть куим мортёс. Бара лоис думайтны, кызди отсавны зонъясылы, кытысь босытны лишной йёзсё татшөм пось кадас.

А тайё каднас Закар ветліс и конюк дінё, и челядьлысь батьмамсё аддзодліс, сэсся бөр локтіс контораё. Старик пукаліс поро дорын, коймод ли нельод чигарка нин пестіс. Отнасөн сэтшөма тшындіс, мый Спиринлы ковмис чечывны улөс вывсьыс да восьтыны ещө өти өшинь.

— Но, ме моді,— друг мододчис Закар петны кабинетсьыс. Тодө: он кө мун, делояс тані оз помасьны.

А сэсся петіс и Спирин. Конюшняё мунігмоз сійө котөрөн кежавліс гортас, пыраліс библиотекарь дінё. Седлоа вөв, кодөн пырджык ветлывліс сійө, вөлі лосьодөма нин.

— Пуксьы, Закар Игнатьевич, седло вылас,— корис Спирин, но старик эз сөгласитчы.

— Казенной частьюс лэптавыны ог сяммы,— серөктіс сійө.

А тайё кадө рыбинспектор Скрипов котраліс сикт кузя да корсис дыш Опоньёс. Төрыт воліс, пыжсё дзоньтавыны лэччыліс, а талун быттьө ваё вөйөма. Сюрис ва дорысь: купайтчө, пальодчө, медым аскинас мунны экспедициякөд.

— Төндзинад Поповыс тэнө да Модестёс тойыштіс?— юаліс Скрипов.

— А омөля нин помнита,— шуис Опонь.

— Жаль,— дзуртыштіс Скрипов.— Öні тайё сэтшөма колө.

— Мыйла?— юаліс Опонь.

— Озъю йылас ЧП лоөма,— висьталіс Скрипов.— Вөв кулөма. Модест вылө акт гижөмаось. Мыжалёны. Чайта, мый ставыс тайё заводитчис сійө рытсьяныс... А гашкө, и водзджык на...

— Ог төд,— дзик веськодя шуис Опонь.

Скрипов воис гортас мудз, скөр. Эз вермы төдмавыны, мый заводитліс. А милициядыллі сідз-тадз он висьтав. Быть кутасны юасьны, кутшөм лунө тайё вөлі. Никифор Сидорович ачыс уджавліс органъясын, пöрадокъястө төдө.

Мездіс гөтырыс: тайё пö вөлі велөдчысьясөс лэдзалан рытö. Скрипов пасьталіс кительсö да муніс школаё. Тані ставсö и төдмаліс. Свидетельствояс кырымалөмаось июнь 24-өд лунө.

Тайё рытнас сылөн эз артмы Озъю йылө кайөмыс. Модестсö виддыны тшөтш кутіс вөзйысьны гөтырыс. Куш киөн кайны абу лосьыд, колө пусыны-пöжасьыштны.

## ДАС ВИТӨД ГЛАВА

Чөвтисны квайт пинь коста зорөд, а турун юръяс сярвидзисны вель уна на. Полиевт Петрович шуис, мый колө панны ещө өти зорөд, юръяс дорас матөджык.

Кадыс вөліс нин квайт час, кор лосьөдісны зорөд места да сутшкалісны пиньяссö.

— Тайөс ещө тыртам, и — шабаш,— чөвтысьяс вылө видзөдліс Полиевт Петрович.

— Вевъялам?— юаліс Тамара, коді таляліс зорөдсö.

— Кутам уджавны, кытчөдз ог эштөдөй,— шыасис Феликс.

— Гашкө, асылөдз тырмас?

— Но и мед,— шуис Феликс.

— Меным нӧ мый!— юрсӧ пыркнитас ныв.— Чӧвтнысӧ тӱяны, а ме сӧмын зорӧдсӧ таляла.

— Серам — серамӧн, а тайӧ зорӧдсӧ ковмас эштӧдны,— сёрниӧ суйсис Виктор.

— Эштӧдам!— кылісны гӧлӧсьяс.

Воис зорӧд дорӧ первой юр, сӧсся мӧд, коймӧд... Феликс, Полиевт Петрович да Виктор уськӧдчывлісны на вылӧ куим вилаӧн да здукӧн пуктавлісны зорӧдӧ. Но ӧти вӧв эз вевъяв ваявнысӧ. Сэки Виктор котӧртліс куртысьяс дінӧ, висъталіс, мед найӧ дугӧдласны тайӧ уджсӧ, виддасны ас вылын матыставны юръяссӧ зорӧд дорӧ.

Зорӧд помавтӧдз некод эз эновт уджсӧ. Ёна мӱдзисны, но сӧлӧм выланис вӧлі долыд. Ужнайтісны дас ӧти часын нин. Пусъысь Юля норасис, мый нӧльӧдысь нин шонтіс сӧянсӧ.

Ужнайтӧм бӧрын Викторӧс ас дінаныс чукӧстісны Тамара да Светлана. Лӧччисны Озью берег вылӧ. Нывъяс висъталісны, мый Модест инас оз ӧшйы, колӧ пӧ зонмыслы отсавны.

— Кыдзи отсавны?— юалис Виктор.

— Сёрнитлыны йӧзыскӧд,— шуис Тамара.— Чайта, быдӧн пуктасны ассьыныс пай. Мед бригадалӧн удждонысь бергӧдасны.

— Сёрнитлам,— сӧгласитчис Виктор.

Тамара колис Викторӧс да Светланаӧс ӧтнанысӧ.

— Тырмас скӧравнытӧ,— зон инмӧдчис нывлӧн пельпомӧ.

— А ме ог скӧрав,— шуис Светлана.

— Сідзкӧ, мир,— сывйыштліс нылӧс Виктор.

Сӧсся ныла-зонма мӧдӧдчисны Озью берег пӧлӧн. Вӧлі лӧнь. Сӧмын ыркыдіник ру ӧвтіс чужӧмъясӧ. Да ещӧ номъяс зыньгисны пель водзын.

— Ном поз, а абу Озью,— шенасис Светлана.

— Тэныд оз кажитчы?— нюмдіс Виктор.— Коркӧ кутан на казътивны.

— Номъяссӧ?

— Номъясыд вунасны. Сӧмын бурторъяс йывсьыс кутан казътивны. Тадзи пӧ век овлӧ.

— Гашкӧ,— сӧгласитчис ныв.— Кад нин узыны. Мунам. А то миянӧс дзикӧдз воштасны.

Но тайӧ войсӧ Виктор пӧшти эз узь. Светланакӧд бурасъӧмыс вештіс сӧлӧм вылысь майшасъӧмсӧ. А сӧсся быдторйыс воліс юрӧ. «Сӧмын бурторъяс йывсьыс кутан казътивны»,— тайӧ кывъяссӧ, буракӧ, зон кывліс мамыслысь, коды быдторйыс жӧ вичмылӧма.

Ветымынӧд воясӧ Озьюдін сиктӧ волӧма практика вылӧ сельскохозяйственной институтса студент Александр Попов, кодӧ бӧрынджык лоас Викторлӧн батӧн. Тайӧ студентыс кутас радейтны том доярка Василисаӧс. Быдторсӧ нывлы кӧсйысьӧма, сӧсся Попов мунӧма, и быгтъӧ ваӧ вӧйӧма.

Но мам ни ӧтчыдысь эз висътавлы батӧ йылысь кутшӧмкӧ лектор, кӧть ӧткӧнтӧ эз кокни вӧв сувтӧдны кок йылӧ писӧ. Да и сійӧ воясас сиктъясад олӧмыс эз вӧв лышкыд.

Ичӧт дырйиыс Викторлы кажитчис тешкодӧн, мыйла мукӧдлӧн эмӧсь батъяс, а сылӧн абу. Юавліс та йылысь мамыслысь. Уджалӧ пӧ карын. Детинка век виччисис, кор сійӧ локтас.

Сэсса «чурка» ним сылы унаысь кӧвъявлісны.

Кор нин Виктор быдмыштіс, мамыс вӧлісь висьталіс сылы ассыс збыль олан туйсӧ. Сылӧн батыс ӧні заслуженной ветеринарной врач, коді, дерт, тӧдӧ, мый сылӧн кӧнкӧ Эжва вожын эм нин пи. Но дас сизим во чӧжӧн сійӧ не сӧмын эз ысты тайӧ пиыслы ӧти грӧш, эз гиж весиг письмӧсӧ. Виктор аддзыліс тайӧ мортсӧ. Воддза онас, Сыктывкарӧ экскурсияӧн ветлігӧн, сійӧ нарешнӧ ветліс видз-му овмӧс кузя министерствоӧ, корсис кабинетсӧ, кӧні пукалӧ Попов. Аддзыліс, но эз висьтась. Виктор тӧдӧ, мый тайӧ Поповыслӧн ӧні эм нин выль гӧтыр и кык пи. Дерт, кӧнкӧ, бать велӧдӧ пьянсӧ лоны честнойӧн, йӧз водзын восьса сӧлӧмаӧн.

Тадзи вӧчӧны гырысьяс. Налы и юрас оз воны, мый сёрнитӧны да думайтӧны на йылысь посныдджыкъяс. Ставӧн чайтӧны, мый коркӧ воас кад воськовтны ыджыд тшупӧд вомӧн, кор позяс ӧтарас кольны няйт кӧлуйтӧ, а мӧдарас пасьтавны дзик выльӧс да сӧстӧмӧс. Сэсса сэки шуны, мый менам эз вӧвлы некутшӧм грек.

Оз, Виктор ньӧтчыд нэмнас оз вӧч сэтшӧмтор, кодысь лоӧ лёкджык мукӧдлы. Колӧ овны сідзи, медем пыр вӧлі долыд тэкӧд орчча йӧзлы.

Виктор думайтіс и Тамаралӧн да Светланалӧн корӧм йылысь. Асывнас, Полиевт Петровичкӧд сёрнитчӧм бӧрын, сійӧ чукӧртіс ӧтлаӧ ставнас бригадасӧ.

Модест Скрипов матыстчис тайӧ собрание вылас ёна полӧмӧн. Сійӧ думсьыс виччысис татшӧм чукӧртчылӧмсӧ, поліс, мый сійӧс кутасны быть мыжавны. Вӧвлысь донсӧ мынтӧмысь ӧприч сылы, кызди комсомолецлы, сетасны кутшӧмкӧ взыскание.

Но артмис ставыс мӧдарӧ. Виктор Поповлӧн чуйдӧд серти ставӧн ӧтвылысь шуисны пуктыны пай вӧв дон мынтӧмӧ, корас кӧ тайӧс совхозлӧн отделение.

Та бӧрын Виктор индаліс йӧзӧс удж вылӧ. Зонъяс мунӧны ытшкыны, нывъяс — куртны. Модестӧс Виктор кольӧдіс тӧчитчыны: тэ пӧ ӧні тані медся дошлӧйыс, аддзылін Закар дедлысь тӧчитчӧмсӧ. Гелий кутас сылы тӧчиласӧ бергӧдлыны.

Закар да Иван Михайлович воисны витӧд бригада оланіно час квайтын кымын. Пусьысьысь ӧтдор тані некод эз вӧв.

— Бура овмӧдчӧмныд, — ошкыштіс Иван Михайлович, кор кытшовтіс палаткаяс гӧгӧр, матыстчыліс турник дінӧ, видзӧдліс зіб йылын ӧшалысь гӧрд флаг вылӧ.

— Корлӧй татчӧ Полиевт Петровичӧс да Викторӧс, — пусьысь нывлы тшӧктіс Иван Михайлович. — А ме видзӧдыштла пӧртъястӧ.

Недыр мысти воисны татчӧ Полиевт Петрович да Виктор, здоровайтчисны.

— Но, молодецъяс, кызди мунӧны делӧясныд? — юалис Спирин.

— Закар дед, кӧнкӧ, висьталіс нин ставсӧ, — шуис Виктор.

— Игнатъевичлӧн аслас кӧлӧкӧльня, тіян — асланыд жӧ.

— А миян кӧлӧкӧльняыс ӧти, — нюммуніс Полиевт Петрович. — Пуктыны унджык турун.

— Тайӧ зэв бур, — ошкыштіс управляющей, — но висьтасьӧй, мый тані лоис.

— Да нинӧм сэтшӧмыс, — шуис Виктор. — Сідзи ставыс гӧгӧр-воана.

— Эн тэрмась,— торкис управляющой.— Вөлі кө ставыс гө-  
гөрвоана, ме татчөдз эг лок. Сэні уджыс юр выв тыр.

Висьталісны, кыдзи вөлі делөйс, сэсся управляющойөс нуөд-  
лісны сійө местаас, көні джагаліс вөлыс. Виктор висьталіс асья  
собраниелөн решение йылысь.

— Бур, дружнөя оланнөд,— шуис управляющой.— Но, ме  
чайта, удайтчас ладмөдчыны татшөм решениетөг. Сөмын турунтө  
унджык заптөй-а.

— Кутам зільны,— көсйысис Виктор.

Иван Михайлович кытшовтіс зорөдьяс дорті, ытшкытөм на  
видзьяс вывті, сёрнитіс том йөзкөд, узис тані да асывнас бөр  
лэччис.

## **ДАС КВАЙТӨД ГЛАВА**

Управляющой Спирин лэччис верзьөмөн вөрсә туйөд. Вөвсө  
эз тэрмөдды. Думсьыс ещө видзөдаліс на, позяс-ө кыскавны  
таті турунсө төвсә кадө, уна-ө ковмас вын да сьөм, весалыштны  
кө өткымынлаті. Лоас кө кос ар пом, Озью кузяыс он лыб ни  
пыжъясөн ни пуръясөн.

Иван Михайловичлы воис сьөлөм вылө том йөзлөн уджыс.  
Бур, мый ачыс кайліс на дінө.

Сиктөдз вөлі на километр сизим, кор сылы паныдасисны экспе-  
дицияса уджалысьяс. Вөрө мөдөдчөмаөсь. Дыш Опонь накод.

— Быдөнлөн аслас мог,— шуис управляющой.— Öтияс турун  
вөсна төждысьөны, мөдъяслы лоө вөр быдтыны да видзны.

Не кө бөкөвөй йөзыс, эськө Иван Михайлович эз и шыасьлы  
Опоньлы, ордйөдіс сійөс туй бөкөдыс. Лөгыс петө тайө морт  
вылас, коді сөмын дзугө сиктса йөзыслысь оломсө. А өні пукыш-  
тісны, варовитыштісны. Сэсся управляющой бөр сөліс вөв вылө,  
мөдөдчис аслас туйөд, а экспедицияын уджалысьяс асланысөд жө.

Тайө жө кадө Озью кузя тювгис-кыпөдчис татчөс рыбін-  
спекторлөн пыжыс. Моторлөн таргөм шызьөдіс ю пөлөнса вөр-  
васө. Руль сайын пукаліс Никифор Сидорович Скрипов, а воддза  
пуклөс вылын йөжгыльвидзис сьлөн гөтырыс.

Озью векньыд да ляпкыд. Скриповлы весиг ковмис пөрччыв-  
ны гачсө да йөткалөмөн вуджөдны мотора пыжсө изья косьяс  
вомөн. Но вөліны и джуджыд местаяс, весиг йирьяс, көні, төдө-  
мысь, олө оз этша чери. Сөмын кыйсьысьяс эз вөвны. Гөгөр  
лөнь. Дерт, рыбінспекторылө век кажитчө, мый быдлаын бра-  
коньерьяс пакөститчөны. А найө абуөсь.

Көнкө Озью йывланыс Скрипов гөзьялөн Модест пиныс, ко-  
дөс заводитөмаөсь өтдортны. Оз сөмын өтдортны, но и көвъяв-  
лөны сы вылө быдсяма мыжъяссө. Колө дорйыны батъыслы, а  
то йөз серам лоас: нэмыс пө уджаліс органьясын, а дзик нинөмө  
абу велалөма.

Колө Закарыс бөрсә сюсьджыка видзөддыны. Гашкө, ещө тат-  
чө сы вөсна и ачыс вөзйысис, мед кыйсьыштны. Чайтө, та ыл-  
наад некод оз лок, оз кутны.

Скрипов гөзья воөдчисны турун пуктысьяс дінө сёр рытын.  
Нывьяс да зоньяс кылісны моторлысь жургөмсө, ставөн сувта-  
лісны берег дорө, виччысисны локтысьясөс.

— Чайтім, узянынн дин?— пыжысь чечигмоз шыасис Скри-



повлөн гётырыс, сэсса вёлись нин здоровайтчис.— Ещö кö öти час, сэсса эськö эг нин во,— норасьыштис.— Коскö быттö пуляөн лыйлöны. А бензин дукусла веськыда вукöдö.

— Чолöм, мамö,— кутыштис сийöс Модест.

— Мотюкöй тэ менам,— шуис Скрипова да чышкыштіс синвасö.— Лун и вой öд ог узь, век тэ йылысь думайта.— Пыж нырысь судзöдіс вель ыджыд ёкмыль.— На сёйышт, а то дзикöдз омöльтчöмыд. Кулан тані видз вылад. Гашкö, гортö лэччан?

— Мыйла?

Скрипов гётыр нуöдіс писö бокöджык, кутіс вашкöдны:

— Тані öд öтдортöны тэнö. Ставыс öти сиктсаяс, ас йöз, а тэ бокöвöй морт.

— Менö некод оз öтдорт...

— Омöля на тöдан йöзтö. Весьшөрö öд быдсяма актъяс оз гижны.

— Мед, гижöны кö,— Модестöс дöзмöдісны мамыслөн кывъ-ясыс.— Ме ог пышйы. Кор ставөн лэччасны, сэки и ме локта.

Никифор Сидорович петіс пыжысь тэрмасьтöг, сувтыштіс берег дорас, чолöмасис ставыскöд веськыд кисö картуз дорас лэптыштлöмөн, сэсса, кынöмсö водзлань чургöдöмөн, матыстчис Полиевт Петрович дінö, топöдіс сылысь кисö. А Закарлы сöмын кокныдыка довкнитіс юрнас: тэныд пö и тайö тырмас.

— Кыдзи оланнды?— юасис Скрипов.

— Зэв бура,— висьталіс учитель.— Ставным со ловъяöсь. Аппетитъяс бурöсь.

— Черисö он кыйлывлöй?

— Кыйлывлам,— шуис Полиевт Петрович.— Öтчыд весиг юква нин пулім...

— Сідзкö, шедыштлö,— Скриповлөн синмыс мудера дзир-дыштіс.— Кутшöмджык чери?

— Сынъяс, ёкышъяс, кельчияс...

— Сідз, сідз,— коса шуис Скрипов.

Сэсса Скрипов кутіс юасыны, кыдзи тані джагаліс вöвныс. Юасис дзик следователь моз, и тайö кутіс дöзмöдны Полиевт Петровичöс.

— Виктор, воны татчö,— чукöстіс учитель.— Висьтав Никифор Сидоровичыслы миян собрание йылысь.

— Омöль морт ті вöлöмныд, Никифор Сидорович,— пузис Виктор.

— Ме?

— Ті,— скöрысь шуис Попов.— Асьнытö лыддянныд бурөн, а йöзсö преступникъяс пыдди.

— Пакöсть вöчысьясыд и öні на тырмöны,— вежыньтліс вомсö Никифор Сидорович.— Со тай Модестлы...

— Модест йывсьыд ми сёрнитім нин,— сюйсис сёрниö Полиевт Петрович.— Шуим, ковмас кö, кыв кутны ставөн öтвылысь.

— Виктор,— чукöстіс зонмöс Светлана.— Лок мунам, нинöм-ла кыв песны татшöмъясыскöд.

«Еджыд понлы сьöд гөн оз пет!»— думсьыс кинас öвтыштіс Скрипов вылö Закар дед да муніс бипур дорö.

— Мунам палаткаас да шойччам,— Скрипов гозъяöс корис Полиевт Петрович.— Ставным тöрам.

Скрипов раммыштіс.

---

Закар пукаліс бипур дорын, вöлаліс куран пиньяс. Кор ставöн водалісны, сійö кусöдіс бипурсö да водіс жö. Недыр мысти пөтас шонді, заводитчас вьль лун.

Сöмын öтнас Светлана кывліс стариклысь водöмсö. Нывлөн эз узьсьы.

«Медся бур пöдругаöн вöлін,— мөвпаліс сійö Зоя йылысь.— Ме öмöй мыжа сыысь, мый Виктор ачыс матыстчис ме дінö? Сідзкö, сійö радейтö менö. Ме радейта жö сійöс».

## **БÖРКЫВ ПЫДДИ**

### **ПРИКАЗ**

*Совхозысь «Озьюгін» öтделениеса управляющöйлөн*

*Озьюгін сикт*

*Июль 20 лун*

Восьмилетнöй школаса велöдчысьяслөн бригада, кодöс совхоз ыстыліс Озью йылö, пöртіс олöмö сетлöм индöд. Совхозы зорöдалöма 80 тонна бур турун. Та вöсна тшöкта:

1. Бухгалтериялы артыштны тайö турунсö, мынтыны расценкаяс серти да бригадирлөн нарядьяс серти.

2. Став велöдчысьяслы, кодьяс вöліны бригадаын, йöзöдны благодарность да сетны памятной пöдаркияс.

3. Учитель Полиевт Петрович Соколовöс да комсомольскöй организацияса секретарь, бригадир Виктор Поповöс премируйтны деньгаөн.

4. Сетны премия пенсионер Захар Игнатьевич Расовлы.

*Öтделениеса управляющöй И.М.СПИРИН.*



---

#### **ПЫДДИ ПУКТАНА АВТОРЪЯС!**

Редакцияö гижöдьяснытö ыстігөн быть колö юöртны:

1. Ассьыныд ним, вич, ов; кор да кöні чужлöмныд (лун, тöлысь, во).
2. Паспорт юöрьяс: номер, серия, кор да кöні сетісны, гортса адрес (прописка серти).
3. Индивидуальной налогöвöй номер — ИНН (кодлөн эм).
4. Страховöй свидетельство номер.

**Тайöс юöрттöг редакция гонорар оз вешты.**

---

*Журналын йöзöдтöм гижöдьяс  
редакция оз рецензируют и авторыслы найöс оз мöдöд.  
Редакция оз век во öти кывіö авторьяскöд.*

---

Комп. набор и верстка **Н.Кузнецова**. Корректор **Н.Габова**.

---

Адрес редакции: 167982. ГСП-2, г. Сыктывкар, Дом печати, каб. 202.  
Телефоны редакции: 24-47-52 (гл. редактор), 24-51-52 (общ. отд./факс).

**E-mail: kodzuv@mail.ru**

---

Подписано к печати 13.10.2008. Формат 70х108<sup>1</sup>/<sub>16</sub>. Печать офсетная. Усл. печ. л. 7; усл. кр.-отг. 8,4; учетно-изд. л. 7,54. Тираж 984. Заказ № . Регистр. ПИ № ФС 3 - 0226. Выпуск осуществлён при финансовой поддержке Агентства Республики Коми по печати и массовым коммуникациям. Отпечатано в ОАО «Кировская областная типография», 610000, г. Киров, проезд Динамо, 4.